

# المنصة

سيناريو الأحداث الحقيقية  
من واقع ملفات التحقيقات

بشير الديك

مكتبة جزيرة الورد

# بطاقة فهرسة

## حقوق الطبع محفوظة

مكتبة جزيرة الورد

اسم الكتاب : المنصة

سيناريو الأحداث الحقيقية من واقع ملفات التحقيقات

الكاتب الصحفي: بشير الديك

رقم الإيداع: 22950 / 2010

## الطبعة الأولى ٢٠١١



القاهرة، ٤ ميدان حلیم - خلف بنك فيصل

شارع ٢٦ يوليو - من ميدان الأوبرا

٢٧٨٧٧٥٧٤ - ٠١٠٠٠٠٤٠٤٦

Tokoboko\_5@yahoo.com

## مقدمة الناشر

.. إنها ليست محاكمة عادية..

.. بل محاكمة عصر بأكمله.. محاكمة متفردة فى تاريخنا الحديث.. كانت ومازالت كنزاً من الأسرار لم تُفك طلاسمه بعد.. لم تُسبر كل أغواره.. وما بين أيدينا هى محاولة صادقة فى صورة «سيناريو» يأخذنا من خلالها كاتبنا ومبدعنا الكبير الأستاذ بشير الديك فى زورق إبداعه ليطوّف بنا حول شواطئها.. لنتعرف عن قرب.. وكأننا نرى.. نعيش بعين الحقيقة أحداثها صفحة وراء أخرى..

وربما كان تقديم مثل هذا الحدث السياسى، بوقائعه المؤثقة على هيئة سيناريو هو الجديد الذى تقدمه دار جزيرة الورد لقراءها.. وليس هناك من هو أقدر على التصدى لمثل هذه الأحداث من الأستاذ بشير الديك الذى صنع لنا بإبداعه المتميز روائع لا ننساها بعضها سياسى مثل «ناجى العلى» و«ضد الحكومة».. وبعضها اجتماعى مثل «سواق الأتوبيس».. و«الحريف».. و«ضربة معلم».. و«أيام الغضب».. وأعمال أخرى أكثر من أن نحصيتها.

وهو المصنف فى تاريخ السينما العربية بأنه من أهم كتابها فالرجل حصد بقلمه عشرة أفلام كاملة صُنفت ضمن أفضل مائة فيلم فى تاريخ السينما العربية ليكون بذلك من الأهم بين المؤلفين السينمائيين العرب خلال قرن كامل.

وحتى لا نطيل.. نبدأ معاً قراءتنا فى أوراق هذا العمل الذى نقدمه ونحن واثقون أنه سوف يجيب ببساطة وسلاسة مشهودين لكاتبنا الكبير عن الكثير من الأسئلة المتعلقة بواحد من أهم أحداثنا التاريخية المعاصرة.

الناشر



---

## مقدمة المؤلف

فى هذا السيناريو تحرير أقصى ما استطعت من دقة وموضوعية فى رصد ومن ثم سرد وتصوير أهم ما حدث خلال الفترة الأخيرة من حكم الرئيس السابق محمد أنور السادات - رحمه الله - وذلك لأهمية الحدث.. والشخصية..

تبدأ أحداث السيناريو فجر يوم ١٩٨١/٩/٣ عندما قام الرئيس بإلقاء القبض على أهم الرموز الثقافية والسياسية والدينية المعارضة له وألقى بهم إلى عتمة المعتقلات مرة واحدة وبلا سابق إنذار.

فى نفس هذا الوقت كان هناك نفرٌ ممن كان الرئيس يدعوهم بأبنائه الجنود والضباط.. يقومون بالتدبير والتخطيط لاغتياله فى سابقة لم تحدث من قبل فى تاريخ الشعب المصرى الطويل..

خلال الفترة من فجر يوم ١٩٨١/٩/٣ حتى يوم اغتياله ظهر يوم ١٩٨١/١٠/٦ كان الرئيس السادات كثير الظهور على شاشات التليفزيون فى مناسبات اجتماعية متعددة.. وكان - رحمه الله - يوجه كلامه فى هذه المناسبات للأمة المصرية.. وفى أحيان أخرى للأمة العربية التى كان على خلاف معها منذ كامب ديفيد.. وفى كل هذه المناسبات كان يوجه تحذيراته.. وتهديداته للجماعات الإسلامية التى كانت تُعد وتخطط لاغتياله..

كان المناخ العام للبلاد ثقيلًا مسكونًا بهواجس.. ومخاوف.. واحتمالات توحى وتذير بالخطر..

وعندما قررت مع المخرج الصديق منير راضى والكاتب الصديق

الأستاذ/ عادل حمودة عمل فيلم عن حادث المنصة قمت بتجميع عدد كبير من الكتب والمراجع التى كُتِبَتْ عن الحدث.. وسَجَلْتُ ما دار حوله من أحداث ومحاكمات وقد اطلعت على معظم اللقاءات التلفزيونية والبرامج التى ظهر وتحدث فيها الرئيس خلال الفترة الزمنية من ١٩٨١/٩/٢ وحتى نهاية محاكمة القتلة.. وقد كانت المادة غزيرة غزيرة.. وغنية إلى أقصى درجة حتى أننى - ومعى المخرج - قررنا أن نستعين بمشاهد تسجيلية مُنتقاة من اللقاءات والبرامج التلفزيونية التى ظهر فيها الرئيس لنفزلها وسط أحداث السيناريو بحيث تكون جزءاً من نسيج الفيلم.. وكانت المشاهد كثيرة ومتعددة وقد بذلت جهداً كبيراً لأختار من بينها ما يناسب أحداث الفيلم ويتقاطع معها.. وأثناء قيامى بالعمل.. بدا لى أن هناك سباقاً بين المجموعة التى قررت اغتيال الرئيس وبين الرئيس وأجهزته الأمنية وكان السؤال هو.. من منهما يصل إلى الآخر أولاً؟.. وقد استطاع هؤلاء النفر أن يحسموا السباق وبنهوا المطاردة باغتياله يوم عيده ووسط قواته المسلحة وبرؤجه المشيدة..

تحررت أيضاً أقصى ما استطعت من دقة وموضوعية فى نقل كلام وأفكار وظروف تلك العصابة التى دَبَرَتْ وخطَّطَتْ لقتل الرجل.. ولم أكن أبداً - تصريحاً أو تلميحاً - ممن يوافقون على هذا المنهج الدموى الذى اتبعه القتلة فى حل مشاكل السياسة.. كما أننى أيضاً لم أكن من الذين يتفقون مع الرئيس السادات ومنهجه الأبوى الديكتاتورى فى حكم البلاد والذى وصل إلى أقصاه فى أواخر أيامه..

تقريباً وبنسبة لا تقل عن ٩٠% مما ذُكِرَ فى هذا السيناريو هو صحيح وموثَّق فى كتب ومراجع استعنت بها واستقدت منها كثيراً وقد ذكرتها فى نهاية هذا الكتاب..

تبقى نقطة أخيرة عن سبب نشر هذا السيناريو فى كتاب.. الآن..

---

وإجابتي هي أن أتمكن من قول كلمتي التي أؤمن بها وأعتقد فيها وهي أن أحوال مصرنا العزيزة لن تتصلح ولن نتقدم كأمة وكوطن إلا باعتراف الديمقراطية الحقيقية.. الديمقراطية التي لا تكفى بحرية الكلام أو حتى السباب ولكنها تقوم بشكل أساسى على العدالة فى ممارسة الحقوق السياسية كما تقوم أيضاً على تداول السلطة فلا تبقى حكراً على أحد.. مهما كان هذا الأحد..

هذه كلمتي للناس حاولت أن أوصلها عن طريق شاشة السينما التي أعرفها جيداً ولكنى لم أتمكن.. فكان هذا الكتاب...

والله سبحانه من وراء القصد

**بشير الديك**

**القاهرة ٢٧/٧/٢٠١٠**





---

## المنصة

### قبل العناوين

١ - الشاشة سوداء وثمة صوت ريح ينبعث فى الكادر وينزل عنوان جانبي « ٢١ نوفمبر ١٩٨١ » على طرف الشاشة وبخط دقيق بينما تضاء الشاشة تدريجياً ليظهر شبح مبنى السجن الحربى من الخارج فى غبش الفجر حيث وميض الأضواء يتناثر هنا وهناك.. وصوت مواتير بعض العربات الكبيرة لنقل المساجين وهى تدور خارج السجن بينما تُسمع أصوات أبواب تفتح وسلاسل تصدر صليلاً.. ثم باب السجن يفتح ونلاحظ فى اللقطة العامة أشباح العديد من الرجال يخرجون من بوابة السجن وهم مربوطين بالسلاسل ويصعدون إلى إحدى العربات المعدة لنقلهم.

- - -

٢ - داخل واحدة من العربات نرى تفاصيل ربطهم إلى المقاعد بالسلاسل ونستطيع هنا أن نرى وجوه المساجين الشبان بما فيهم «فرج» ذو الساق المدفونة فى الجبس والشيخ الضرير ذو اللحية «عمر عبدالرحمن».

- - -



---

٣ - العربات فى لقطة عامة وهى تتحرك تحوط بها عربات حراسة أمامها وخلفها وهناك عربية إسعاف ضمن أسطول العربات كما نستطيع أن نلمح طائرة هليكوبتر تحلق فوق المشهد والوقت ما زال فجرأ.

- - -

٤ - تبزغ أولى تباشير النهار حال وصول العربات المغلقة إلى ساحة المحكمة العسكرية حيث تتوقف العربات تحوطها فى حركة مدروسة عربات الحراسة وتبدأ عملية إنزال المساجين وسط حراسة مشددة تملأ المكان.

- - -

٥ - عربية شرطة عسكرية تسد طريق الدخول إلى مدينة نصر وتُحوّل الطريق إلى طريق آخر حيث لا يعبر الحاجز الأمنى إلا العربات التى تحمل تصريحاً فقط.

- - -

٦ - عربية أخرى وحاجز آخر فى مكان آخر تسد الطريق وتحوّل العربات العادية.. عربية تصوير تليفزيونى تقدم تصريحاً.. ونلاحظ وجود عربية شرطة بتليفونات وأجهزة لاسلكى تسير المرور.. خرفشات الصوت من خلال أجهزة اللاسلكى تحمل تعليمات بلا توقف.. شبكة من الاتصالات اللاسلكية تقودها عربية راكنة فى داخلها أجهزة اتصال تسيطر على الموقف.

- - -

٧ - طائرة هليكوبتر تحلق على المشهد وفى داخلها إلى جوار السائق شخص ما يلقي بتعليماته اللاسلكية.

- - -

---

٨ - أمام نادى السكة الحديد وقد تجمع عدد كبير من البشر محامين وصحفيين وأقارب المتهمين وهناك عربات أتوبيس أعدت لنقلهم ونلاحظ دقة التفتيش على البطاقات والتصاريح.

٩ - نقطة شرطة عسكرية وحاجز آخر وينزل الجميع حيث يتعرضون لمراجعة الأسماء مرة أخرى ونلاحظ بوابتين لإجراء التفتيش الدقيق.. إحدى البوابتين للرجال والأخرى للنساء ومجنّدات يقمن بتفتيش النساء والنساء معظمهن منقبات أو محجبات.

- - -

١٠ - بوابة المحكمة والرواد يدخلون عبر بوابة إلكترونية تحت مراقبة دقيقة من عيون رجال الأمن ومن خلال شاشات تليفزيونية إلى داخل المحكمة.

- - -

١١ - لقطة كبيرة لخالد الإسلامبولي يرفع مصحفاً صغيراً في يده صارخاً في حركة مسرحية داخل قاعة المحكمة - أنا خالد الإسلامبولي.. أنا قاتل السادات.

يسرع صحفيو العالم بكاميراتهم يلتقطون له الصور وكذلك الكاميرات التليفزيونية لتصوره داخل القفص.. ومن خلال الصور نرى مجموعة المتهمين وعددهم ٢٤ متهماً.. يرتفع صوت خالد منشداً والجميع بما فيهم بعض الموجودين بالقاعة يردون وراءه بشكل منظم:



---

خالد: فى سبيل الله قمنا.. نبتغى رفع اللواء..

لا لأحزاب عملنا.. نحن للدين فداء..

الله أكبر.. الله أكبر.. الله أكبر.. لا إله إلا الله..

الصحفيون والمصورون لا يكفون عن التقاط الصور لمن فى القاعة ولمن خلف القضبان.. ينتهى كل ذلك بتصفية حاجب المحكمة منادياً.. محكمة!! حيث يسود الصمت ويقف الجميع بينما تدخل هيئة المحكمة وكذلك النيابة ويبدأ القاضى فى الجلوس ويشير للجميع أن يجلسوا ثم يعلن افتتاح الجلسة.

باسم الله.. وباسم الشعب.. فَتَحَتُ الجلسة

تبدأ عناوين الفيلم فى النزول على لقطات سريعة ومعبرة عن رحلة الرئيس أنور السادات منذ توليه الأمر بعد وفاة عبدالناصر وحتى قبل ٣ سبتمبر ١٩٨١ حيث تنتهى العناوين ومن الممكن أن يصاحب هذه اللقطات السريعة صوت معبر يتحدث عن ملامح الرحلة والزعيم والمرحلة.

## بعد العناوين

١٢ - ينزل تتر مكتوب عليه تاريخ ٢ سبتمبر ٨١ الوقت ليل وثمة ريح فى الجو.

مشهد فوتومونتاج يبدأ ببحر الإسكندرية المصطخب فى الليل ثم لعمليات إلقاء القبض على عناصر الفتنة الطائفية كما أسماها أنور السادات فى خريف عام ١٩٨١ حيث نرى فى لقطات سريعة وحادة بلا ترتيب عمليات إلقاء القبض على العديد من الشبان والشابات ليلاً.. فى القاهرة والإسكندرية والمدن والريف.. رجال الأمن يتحركون فى أجواء توحى بالخطر والموت.. اقتحامات لبيوت وشقق بالأسلحة.. وجوه متعددة

لرجال ونساء ملتحمين وغير ملتحمين منقبات وسافرات رجال الدين الإسلامي ورجال الدين المسيحي صحفيين ومفكرين ورجال أحزاب. دير وادى النطرون وتحديد إقامة الأنبا شنودة.. مساجد ورجال دين ينزعون منها.. ينتهى هذا المشهد الفوتومونتاجى بمنزل خالد الإسلامبولى فى مدينة ملوى بصعيد مصر حيث يتم إلقاء القبض على أخيه محمد وسط جزع والده ووالدته ممكن أن يستمر نفس صوت المعلق خلف هذه الأحداث موضحاً أن قرارات سبتمبر كانت هى بداية النهاية فى رحلة ذلك الزعيم الأسطورية وما تحويه من تناقضات مدهشة.



الابا شنودة أحد ضحايا أحداث سبتمبر ١٩٨١

---

## ١٣ - طرق سريعة فى الليل..

عربات مقفلة ضخمة تتحرك حاملة غنيمتها من الأسرى وخلفها وأمامها حراسة مشددة التعليق مستمر من خارج الكادر.

-...-

## ١٤ - داخل إحدى عربات نقل المساجين..

داخل إحدى العربات نرى لقطات سريعة لبعض الأسرى من الصحفيين ورجال الأحزاب وقد نسى أحدهم نظارته الطبية وآخر لم يأخذ معه أدوية السكر يسأل إن كان هناك أنسولين ويرد عليه الآخر.. هناك فين..؟ لا يوجد أحد يعرف إلى أين هم ذاهبون ولا لماذا هم مقبوض عليهم.. بينما ثالث يتأمل أحد الصحفيين المشهورين ويبدى له سعادته البالغة أن رآه.. إنه «الأستاذ حسنين هيكل».

-...-

## ١٥ - طرق سريعة فى الليل..

العربات على الطرق السريعة تنطلق إلى المجهول وخلفها عربات الحراسة بجنود مدججين بالسلاح ويدخل صوت القاضى فى المشهد القادم.

**صوت القاضى:** المتهم الأول خالد شوقى الإسلامبولى.

-...-



## ١٦- داخل المحكمة..

وجه القاضى فى لقطة كبيرة وهو يكمل كلامه:

**القاضى:** أنت متهم بقتل الرئيس الراحل أنور السادات مع سبق الإصرار والترصد يا خالد.. مذنّب أم غير مذنّب؟

خالد فى القفص وهو يرد بصوت جهورى:

**خالد:** مذنّب.

ضجة بين المحامين ويقف محامى خالد قائلاً لهيئة المحكمة:

**محامى خالد:** أرجو من هيئة المحكمة ألا تسجل هذه الإجابة وتسمح لى بالحديث مع موكلى.

- يندفع ممثل النيابة واقفاً..

**ممثل النيابة:** النيابة تعترض وترجو من عدالة المحكمة تسجيل اعتراف المتهم كما هو.

**محامى خالد:** المتهم لم يقصد المعنى الذى قاله.

**ممثل النيابة:** ولكنه يعرف ما فعله وقد نطق لسانه بما يشعر به.

- المحامى يتوجه إلى القاضى..

**محامى خالد:** سيدى القاضى.. أرجو إعطائى فرصة الحديث مع موكلى وإلغاء إجابته السابقة من مضبطة الجلسة.

**القاضى:** تلغى الإجابة.. اتفضل يا أستاذ.

- يتحرك المحامى ناحية القفص حيث يقف خالد مع زملائه ويتهامس معه.

**محامى خالد:** غلط اللى بتقوله ده يا خالد..

---

- ويقول خالد فى عصبية وبصوت خافت..

**خالد:** أنا قتلتته ومعترف إنى قتلتته ومش مستعد أنكر لا أنا ولا الناس  
اللى معايا.

**محامى خالد:** يبقى بلاش تقول إنك مذنب.. لأنك لو قلت كده تبقى  
القضية انتهت.

**خالد:** أمال عاوزنى أقول إيه.

- لقطة متوسطة القاضى يتابع ما يدور وكذلك جميع الموجودين  
بالقاعة وينادى القاضى متسائلاً وهو يوجه كلامه إلى المحامى..

**القاضى:** خلاص يا أستاذ..؟

- يقول المحامى وهو يعود إلى مكانه..

**محامى خالد:** خلاص يا فندم سيادتكم ممكن تطرح عليه السؤال تانى.

**القاضى:** يا خالد أنت متهم بقتل الرئيس أنور السادات عمداً ومع  
سبق الإصرار والترصد مذنب أم غير مذنب.

- ويقول خالد..

**خالد:** أنا أعترف بالقتل ولكنى غير مذنب.

القاضى ينظر إلى خالد يهز رأسه وينظر إلى كاتب الجلسة الذى  
توقف عن التدوين ويشير إليه أن يكتب فيكتب ثم يلتفت إلى عبدالحميد..



القاضى: وأنت يا عبدالحميد.

عبدالحميد: أنا أعترف بالقتل ولكنى غير مذنب. ..

- لقطة كبيرة لوجه عطا طایل ثم لوجه حسين عباس يعترفان ولكن

بدون صوت حيث يعلو صوت الموسيقى..

### ١٧ - مبنى مجلس الشعب..

لقطة عامة لمجلس الشعب من الخارج ينزل عليها تتر تاريخ ٥ سبتمبر

١٩٨١ ونسمع صوت السادات - بسم الله.. الإخوة والأخوات أبنائى وبناتى..

- - -



## ١٨ - داخل مجلس الشعب..

داخل مجلس الشعب واسادات فى لقطة كبيرة ويكمل الخطاب -  
مادة تسجيلية..

السادات: ممثلو شعب مصر فى مجلس الشعب وفى مجلس الشورى  
وفى هيئة المستشارين.. أعتذر لكم أولاً أننى قطعت أجازتكم.. ولكن كما  
سمعتونى فى خطابى فى جامعة الإسكندرية وأنا أتناول موضوع الفتنة  
التي قامت فى الزاوية الحمراء.. رأيت من واجبى وكما تعودنا سوياً أن  
أعرض هذا الأمر عليكم ومن خلالكم إلى شعبنا كله..

أثناء خطابه تكون الكاميرا قد استعرضت الموجودين فى القاعة..

---

## ١٩ - وحدة عسكرية..

لقطة عامة لإحدى الوحدات العسكرية وصوت السادات مازال يتردد  
عالياً حماسياً..

---

**صوت السادات:** «لقد استشعرت أن الأمر خطير ويستحق منا جميعاً أن نقف وقفة نحاسب فيها أنفسنا نحاسب أيضاً كل عابث بمصير هذه البلاد».

تقترب الكاميرا أثناء هذا الكلام من ميس الضباط

## ٢٠- داخل ميس الضباط بالوحدة العسكرية

- داخل ميس الضباط حيث بعض الضباط يتناولون طعام غذاتهم بينما الحديث مستمر على شاشة التلفزيون وخالد الإسلامبولي وبعض زملائه الضباط يتناولون صاعهم ويتابعون ما يقوله الرئيس الذي بدأ يحتد ولهجته تقسو وتعكس عصبية بالغة..

**السادات:** «لما يقف راجل معمم ومن الأزهر الشريف عشان يقول بنود سرية وهى مش موجودة.. والله.. فى هذا بالذات وفيما سبق واللى جاي ما حرحمه أبداً.. وبالقانون»..

- خالد فى لقطة كبيرة يتمتم:

سبحان من بيده الرحمة

- ردود أفعال على وجوه الضباط والرئيس يزداد حدة.. وهو يكمل

«أهو مرمى فى السجن زى الكلب»

يقوم خالد تاركاً المكان وهو فى حالة من الضيق..

- - -

## ٢١- مكتب القائد بالوحدة العسكرية

- لقطة كبيرة لجريدة مطوية على إحدى الصفحات ونلاحظ وجود

خط أسفل اسم «محمد شوقي الإسلامبولي»..

---

تتراجع الكاميرا لنرى خالد يقدم الجريدة لقائده فى مكتبه بالوحدة  
ويتساءل القائد ..

القائد : إيه ده؟

خالد : أخويا يا فندم اتقبض عليه من يومين ضمن الجماعات الإسلامية.  
القائد : ناس كثير اتقبض عليهم.

خالد : بعد إذن سياتك يا فندم عاوز أجازة أطل على الناس فى البلد

- - -

## ٢٢ - منزل خالد الإسلامبولى ..



محمد الإسلامبولى

---

- لقطة كبيرة لوجه سيدة فى الخمسين من عمرها تتشج بالسواد  
وتتظر خارج الكادر ..

- من وجهة نظرها نرى خالد داخلاً بملابسه العسكرية وتتساءل  
السيدة فى حزن ..

أم خالد: عندك أخبار عن أخوك .. يا خالد؟؟

ويجلس خالد مهدوداً وهو يجيب ..

خالد: لا .. أنتم ما بلفكوش حاجة؟؟

أم خالد: أبوك حاول يعمل شوية اتصالات ما فيش فايده.

وجه خالد يحمل علامات الفيظ وهو يقول لأمه ..

خالد: جهزى نفسك وبكره نساfer مصر نشوف حل هناك.

- - -

## ٢٣ - سلالهم منزل أنيسة أخت خالد ..

- لقطة قريبة لخالد وهو يساعد والدته على صعود سلم ضيق ومظلم رغم

أن الوقت نهاراً بينما خالد يحمل فى يده حقيبة هاندباچ وهو يقول لأمه ..

خالد: حامد جوز أنيسة أختى له قرايب ممكن يساعدونا.

- - -

## ٢٤ - شقة أنيسة أخت خالد ..

- لقطة كبيرة لوجه حامد زوج أنيسة وهو يقول زائف النظرات ..

حامد: أنا؟؟ دانا اسمى واسم أبويا اتتشروا النهارده فى الجرايد

ضمن المطلوب القبض عليهم.

---

وتقول أنيسة أخت خالد فى أسف..

**أنيسة:** حامد محضر شنطة هدومه عشان ممكن يطلبوه فى أى وقت.

**أم خالد:** والحاجة اللى أنا جايياها لمحمد؟ ده ما عندوش هدوم ثقيلة والبرد داخل..!!

تقول الأم ذلك وهى تشير إلى الحقيبة الهاندباج.. يقوم خالد خارجاً

من المكان متضايقاً وتتساءل أخته أنيسة - على فين يا خالد..؟؟

**خالد:** حاطع لعبدالحميد يمكن يلاقى لنا صرفة.

— • • —



## ٢٥- شقة عبدالحميد..

لقطة كبيرة لكوب ينسون أو شيء مشابه والسكر يقلب فيه وعندما تتراجع الكاميرا نكتشف أن عبدالحميد هو شاب أكبر قليلاً من خالد ملتحي يقلب السكر ويقترب من خالد محدثاً إياه وهو يعطيه الكوب..

**عبدالحميد:** البلد مقلوبة وما حدش قادر يكلم حد.. ربنا يعدى الأيام دى على خير.

ويتناول منه خالد الكوب متسائلاً..

**خالد:** يعنى إيه..

ويقول عبدالحميد وهو يجلس قريباً..

**عبدالحميد:** يعنى موش حاتقدر تعرف مكان محمد علشان تقابله وتديه هدوم وأكل.

ويشرد خالد متأثراً وهو يقول متتهداً..

**خالد:** أمى قلقانة عليه.. يا أخى محمد ده طول عمره متهور وعصبى.

**عبدالحميد:** بصراحة الوضع كل مادا بيسوء.. الراجل هايعمل استفتاء يوم الخميس اللي جاي.

**خالد:** على إيه؟؟

**عبدالحميد:** على إجراءات الوحدة الوطنية زى ما بيسميتها... بعض الناس قالوله إن ده تصرف غير دستورى.. قالك أتوجه لشعبى وأستفتيه.

ويقول خالد ساخراً..

**خالد:** بكره يطلع النتيجة ٩٩,٩٪ زى كل مرة..

ويتهدد خالد فى حرقه وهو يهمس..

**خالد:** البلد دى بتدور فى دوامة يا عبدالحميد وموش باين لها آخر..

## ٢٦ - مادة تسجيلية

عنوان جانبى ٩ سبتمبر - ميت أبو الكوم ..



السادات فى مؤتمر ميت أبو الكوم

السادات يحيط به رجال الصحافة الأجانب والمصريين بأعداد كبيرة  
وكاميرات العالم تصوره وهو يتحدث عن مبررات وضروف إلقاء القبض  
على عناصر الفتنة الطائفية ..

---

**السادات:** البعض يقول أن قرارات التحفظ على عناصر الفتنة الطائفية غير دستورية وهذا غير صحيح فأنا استعملت حقى الذى منحنى إياه الدستور فى المادة ٧٤ منه.. ومع ذلك فأنتم والعالم كله بكره حايعرف رأى شعبى فى هذه القرارات..

أحد الصحفيين يطلب الكلمة ويقف ليقول..

**المراسل:** سيدى الرئيس إن المادة ٧٤ من الدستور تستخدم فى الضرورة القصوى فقط.. هل كانت هناك ضرورة قصوى تستوجب إجراءات التحفظ.

يرد السادات بشئ من الانفعال..

**السادات:** البلد كانت حاتقلت.. كانت حاتضيع على إيدين شوية ولاد ما عندهم أى إحساس بالمسئولية «الاسترشاد بالمادة التسجيلية».

يقف أحد المراسلين الأجانب فى إذاعة ABC الأمريكية.

**مراسل آخر:** سيدى الرئيس لقد كنتم فى أمريكا منذ مدة قريبة هل استشرتم الرئيس ريجان فى هذه الإجراءات.

يكفهر وجه الرئيس السادات وتتوتر ملامحه بشدة وهو يرد عليه..

**السادات:** لولا إننا فى دولة ديمقراطية وبلد حر لأخرجت مسدسى وضريتك بالنار.

-...-

## ٢٧- داخل المحكمة..

وجه القاضى فى لقطة كبيرة وهو يقول..

**القاضى:** ما هى الأسباب التى دفعتك لقتل الرئيس الراحل أنور السادات.

خالد الذى يقف فى القفص وسط زملائه يقول..

**خالد:** هناك ثلاثة أسباب دفعتنى لقتل فرعون أول هذه الأسباب أنه لا يحكم بشرع الله ولا يطبق الشريعة الإسلامية.

ويقاطعه القاضى قائلاً..

**القاضى:** هل تعلم يا أخ خالد أن الدستور الذى صدر عام ١٩٧١ فى

عهد الرئيس الراحل نص لأول مرة على أن الشريعة

الإسلامية هى المنصر الرئيسى للتشريع.

ويرد فرج معلقاً من القفص.

**فرج:** وقد عدل هذا الدستور عام ٧٩ ليسمح له بحكم مصر مدى الحياة.

وينهره القاضى..

**القاضى:** ما تتكلمش إلا لما تستأذن الأول أو يوجه إليك السؤال.

ويلق خالد فى شىء من السخرية..

**خالد:** حكاية الشريعة الإسلامية اللى نص عليها السادات فى دستوره

دا كلام للاستهلاك المحلى.. ما هم التتار قالوا إنهم مسلمين

وبينطقوا الشهادة هل معنى كده إنهم موش كفار..؟

**ويتساءل القاضى:** جبت المعلومات دى منين؟

وقد فوجئ بالسؤال ولكنه يتمالك نفسه بسرعة.. مما يوحى بأنه

لا يعرف.

---

**خالد:** علماء المسلمين يقولوا كده.

**القاضى:** مين فيهم بالضبط..

وينظر خالد تلقائياً إلى فرج ثم يقول فى شىء من الارتباك..

**خالد:** موش فاكرا الأسماء.. لكن أنا عرفت الكلام ده من قراءاتى.

ويبتسم القاضى ثم يقول متجاوزاً..

**القاضى:** إذن السبب الأولانى إنه ما بيعكمش بالشريعة.. إيه السبب الثانى.

**خالد:** إنه اتصالح مع اليهود وهذا ينافى صحيح العقيدة الإسلامية.

ويرد القاضى فى شىء من السخرية..

**القاضى:** ما عرفتش من قراءاتك إن الرسول عليه الصلاة والسلام

عقد صلح مع اليهود لما كان فيه ضرورة لذلك.

ويقول خالد فى حدة واضحة..

**خالد:** الرسول لا يقارن بالطاغوت.. كيف يقارن رسول الإسلام

صلوات الله عليه وسلامه برجل كافر؟؟

ويرد القاضى فى حدة..

**القاضى:** كيف تحكم على إنسان بالكفر وهو يصى ويصوم ويقرأ

القرآن ويستشهد به فى كل خطبه؟؟

ويزداد انفعال خالد..

**خالد:** كل ده نفاق وكذب.

ويتدخل وكيل النيابة قائلاً فى انفعال..

**وكيل النيابة:** «هلا شققت عن قلبه» قالها رسولنا الكريم للصحابى

---

الجليل أسامة بن زيد عندما قتل أحد المشركين بعد أن  
نطق الشهادتين أثناء القتال.. هلا شققت عن قلبه؟؟

**خالد:** لقد أفتى علماء المسلمين بكفره واستحلال دمه.

ويعود الهدوء لصوت القاضي..

**القاضي:** مين علماء المسلمين اللي أفتوك بالفتوى دي.. يا خالد؟؟

تبدو الحيرة على خالد وهو ينظر ناحية فرج..

ينبعث فجأة صوت عبدالحميد مؤذناً للصلاة.. إنهاء للموقف..

«الله أكبر.. الله أكبر.. أشهد أن لا إله إلا الله»..

ينظر القاضي في ساعة يده.... يتنهد وهو يقوم قائلاً..

**القاضي:** رُفِعَت الجلسة للصلاة..

يهب الجميع وقوفاً بينما عبدالحميد في لقطة كبيرة وقد أحاض

وجهه الملتهب بكلتا يديه..

«أشهد أن.. محمداً رسول الله».

— • • —



















---

## ٢٨ - محطة مصر..

داخل محطة القطار و«خالد» يقف إلى جوار والدته على رصيف محطة القطار حيث القطار يستعد للمغادرة.

خالد يخرج لها مبلغاً من المال ويعطيه لها وتتساءل الأم..

أم خالد: إيه دول؟

خالد: دول سبعين جنيه.. اشتريتنا خروف وأنا حانزل فى العيد نأكله مع بعض.

أم خالد: وأخوك؟

خالد: إن شاء الله ربنا يكون فك ضيقته.. لو لقيت فرصة أعرف أى حاجة حابلك.. مع السلامة..

تصعد الأم إلى القطار الذى يطلق صفارته استعداداً للمغادرة ويودعها خالد ملوحاً لها..

— — —

## ٢٩ - ميدان رمسيس - القاهرة..

محطة القطار من الخارج «وخالد» يخرج من مبنى المحطة مثقل القلب بالحزن.. يتوه وسط زحام الميدان..

يترامى صوت «الشيخ كشك» صارخاً محرضاً فى إحدى خطبه النارية.. يلفت ذلك انتباه خالد الذى يتلفت حوله باحثاً عن مصدر الصوت.. أحدهم يرفع ريكوردر صغير يريه لخالد والصوت ينبعث منه وسط الزحام بينما العربات المصفحة والمليئة بالجنود تقف على بعد وثمة سارينة عربية بوليس تتردد فى البعيد وسط هذا الضجيج يهمس خالد سائلاً ذلك الرجل الضئيل الرث الهيئة الذى يحمل الريكوردر..

خالد: ما نتاش خايف؟؟

يشفط الرجل الرث الهيئة دخان سجارته باستمتع وهو يقول..

الرجل: قالوا للقرد ربنا حايسخطك.. قالهم مانا قرد هياسخطنى إيه؟؟

يا عم صلى على اللى هایشفع فيك..

يتمتم خالد مصلياً على النبی بينما الرجل حامل الريكوردر يذوب وسط زحام الناس.. يحاول خالد عبور الميدان يلاحظ رجلاً آخر يرتدى جاكيت عسكري وبنطلون بيجامة متسخ وقد رصع الجاكيت بكميات من أغطية الكازوزة وهو يسحب خلفه خيطاً فى نهايته علم أمريكا يزحف على الأرض وقد اتسخ وتركز الكاميرا على علم أمريكا المتسخ..

- - -



### ٣٠- مادة تسجيلية - ميت أبو الكوم



النبوي إسماعيل

ينزل تاريخ جانبى وعنوان « ١١ سبتمبر ١٩٨١ - ميت أبو الكوم »  
« مادة تسجيلية »..

لقطة كبيرة لوجه النبوى إسماعيل وهو يتحدث..

**النبوى:** عدد الذين اشتركوا فى الاستفتاء على قرارات الوحدة  
الوطنية بلغ ١١ مليون و ٥٩ ألف و ٨٢٧ مواطناً ومواطنة.

تتراجع الكاميرا لتكشف أن أنور السادات يقف أمامه والكاميرات  
تصورهما على خلفية حديقة منزله بميت أبو الكوم وأنور السادات يتابع  
بيانات النبوى فى اهتمام واضح.

**النبوى:** بلغ عدد الأصوات الصحيحة ١١ مليون و ٢٦ ألف و ٢٦٦ وبلغ  
عدد الموافقين..

### ٣١- شوارع القاهرة..

باقى البيان يسمعه خالد مع عبدالحميد فى عربة عبدالحميد والنبوى يكمل من خلال الراديو..

النبوى: عدد الموافقين ١٠ ملايين و٩٦٥ ألف و٩٢٣ مواطناً أى بنسبة ٩٩,٤٥%.

ويقول خالد غاضباً وهو يغلق راديو العربة..

خالد: الناس دى بتضحك على مين.. دا لو أهل المقبوض عليهم بس قالوا لا أو حتى ما راحوش موش هاتطلع النتيجة كده..

عبدالحميد: الراجل ده يتخاف منه يا خالد.. بدأ يضرب فى كل الاتجاهات.

### ٣٢- مبنى التلفزيون المصرى..

تاريخ ١٤ سبتمبر ١٩٨١ على لقطة عامة لمبنى التلفزيون من الخارج ونسمع صوته.

بسم الله.. أهلى وشعبى..

---

### ٣٣- داخل مبنى التلفزيون - مادة تسجيلية..

- لقطة كبيرة لوجه السادات وهو يتحدث..

«أبنائى وبناتى.. رأيت أن أتحدث إليكم بعد ظهور نتيجة الاستفتاء حتى أعبر أولاً عن عرفانى وشكرى الخالص.. حتى انحنى أمام هذا الشعب وأمام إرادته وأمام ما أحاط به مصر من تكريم فوق تكريم»..

---

---

## ٣٤- فوتومونتاج..

يستمر صوت السادات على لقطات تسجيلية تعكس بعض ملامح الشارع المصرى فى هذه الفترة.

السادات: لماذا كان الاستفتاء.. خصوصاً وأن إرادة الشعب معروفة لى.. وللشعب.. البعض قال أن الوضع غير مستقر وأن السادات . عاوز يضرب ضربه يقضى بها على المعارضة..

ماfish معارضه.. شعبنا هنا بيعيش الديمقراطية.. يعيش الأمن والأمان وجو العائلة المصرية.

يستمر الصوت على لقطات متنوعة توضح مناخ الفترة.. مثل الاستحكامات العسكرية وجنود الأمن المركزى التى تنتشر فى كل مكان..

- - -

## ٣٥- داخل مبنى التلفزيون-

### مادة تسجيلية

السادات وهو مايزال يتحدث أمام كاميرات التلفزيون وقد وصل إلى قمة عصبية فتصاعدت نبرته وهو يسب رجال السياسة..

السادات: إذا كان لويس السادس عشر يرجع.. يبقى سراج الدين يرجع.. سراج الدين اللى لازم يحمى ربنا إن ثورة يوليه ما قطعشى رقبتة.. وسابته يتمتع بملايينه..

والله من هنا ورايح ما حارحم.. وبالقانون.. وإذا كانوا بيعتلموا بالديمقراطية فأنا بأقول لهم الديمقراطية ليها أنياب.. أشرس من الديكتاتورية.. ليه بقى؟؟

- - -

## ٣٦ - قاعة المحكمة..

وجه محامى خالد فى لقطة كبيرة وفى انفعال يتحدث فى قاعة المحكمة..  
**محامى خالد:** حتى عندما أراد أن يتحدث إلى شعبه حديثاً من القلب لم يستطع وإنما أخذ يهاجم رجال الفكر وقيادات الأحزاب وعلماء الدين الإسلامى والمسيحى وكل من اختلف معهم فى رأى.. كيف لرئيس دولة أن يهاجم خصوصاً أغلق عليهم بوابات سجنونه ويسبهم سباً علنياً يعاقب عليه القانون دون أن يملكو لسبابه وعدوانه رداً. لقد أصبح هو مصر ومصر هو.. من اختلف معه فقد اختلف مع مصر وأصبح عدواً لمصر.

ويقاطعه ممثل النيابة قائلاً..

**النيابة:** بعد إذن الهيئة الموقرة دا كلام فى المرافعة ولم يحن أوانها بعد .. ويقول القاضى للمحامى..

**القاضى:** لما تيجى مرافعتك إبقى اتكلم وحلل زى ما أنت عاوز..

ثم يوجه كلامه لخالد.. قولى يا أخ خالد إمنى بالظبط نبتت فى رأسك فكرة اغتيال الرئيس الراحل أنور السادات ٩٩..

خالد يتذكر للحظة ثم يقول..

**خالد:** ما كانش فى ذهنى أى حاجة.. كنت مخنوق زى أى شاب مصرى عايش مشاكل بلده لغاية ما فوجئت يوم ٢٣ سبتمبر إنهم مرشحنى أشارك فى العرض العسكرى.

- - -

---

## ٣٧- الوحدة العسكرية

لقطة عامة للمعسكر وينزل عنوان وتاريخ ٢٣ سبتمبر ١٩٨١ -  
الهايكستيب.. ثم داخل المكتب ونرى - لقطة كبيرة لوجه خالد وهو يسأل قائده..

خالد: أخبار الأجازة بتاعتى إيه يا فندم..

ويتساءل قائد خالد..

القائد: أجازة إيه..

خالد: أنا مقدم أجازة لسيادتك عشان أقضى عيد الأضحى مع  
الجماعة فى البلد.

القائد: والعرض العسكرى؟ ده العرض يوم الوقفة يا خالد..

خالد: ما هو أنا بعذر عنه السنة دى يا فندم..

القائد: موش حاينفع يا خالد.. ما عنديش حد يحل محلك..

- رد فعل على وجه خالد متضائقاً..

- - -

## ٢٨- قاعة المحكمة..

- لقطة كبيرة لوجه محامى خالد فى المحكمة وهو يقول فى حدة..

**محامى خالد:** كيف يمكن لضابط له أخ مقبوض عليه بتهمة الانضمام إلى جماعة معادية أن يعين فى العرض العسكرى وبهذا الإلحاح؟

- لقطة كبيرة للقاضى وهو يتساءل..

**القاضى:** الشاهد موجود؟

قائد الكتيبة يقوم رافعاً يده.

**الشاهد:** موجود يا قنندم.

**القاضى:** احلف اليمين..

يتقدم الشاهد ليحلف اليمين بينما تتقارب رؤوس المحامين ويتهامسون ويتبادلون الأوراق فيما بينهم.

- خالد ورفاقه فى القفص يتابعون ما يحدث بشغف..

القاضى يشير إلى محامى خالد.. اتفضل يا أستاذ.. الشاهد معاك.

يقوم محامى خالد مقترباً من الشاهد..

**محامى خالد:** حضرتك كنت قائد الكتيبة اللى كان يتبعها خالد فى فترة العرض؟

**الشاهد:** أيوه.

**محامى خالد:** خالد كان مقدم أجازة تبعده عن حضور طابور العرض مظلوط؟

**الشاهد:** أيوه.

---

**محامى خالد:** أرجو إثبات أن موكلى كان يرفض الاشتراك فى العرض «ثم يكمل» قال إيه فى أسباب طلبه للأجازة؟

**الشاهد:** قال إنه عاوز يقضى عيد الأضحى فى البلد على ما أذكر.

**محامى خالد:** ويا ترى سلطة قبول الأجازة أو رفضها كانت فى إيدك ولا فيه رتبة أو جهة أعلى لازم تعرضها عليها؟

**الشاهد:** أنا اللي ممكن أوافق أو أرفض بعد كده نبلي قيادة اللواء للعلم.

**محامى خالد:** يعنى إنت اللي فى إيدك القبول أو الرفض؟

**الشاهد:** أيوه..

**محامى خالد:** وأنت رفضت.

**الشاهد:** ما كنتش ممكن أستغنى عنه..

**محامى خالد:** ليه؟

**الشاهد:** ما عنديش حد يحل محله..

**محامى خالد:** ضابط الأمن رشح لك أكثر من واحد.

**الشاهد:** ما فيهمش حد يصلح.. والكلام ده قلته قبل كده فى التحقيقات.

- يقترب المحامى منه محاولاً التأثير فيه.

**محامى خالد:** إحنا موش عاوزين الكلام اللي قلته قبل كده.. لا.. إحنا عاوزين الكلام اللي ما قلتوش.

يقف رئيس النيابة معترضاً..

**النيابة:** النيابة تعترض وترفض هذا الأسلوب فى الغمز واللمز.. ولتكن أسئلة الدفاع صريحة ومباشرة وفى الموضوع.

---

---

يقول القاضى مشيراً إلى الدفاع..

**القاضى:** الاعتراض مقبول.. خليك مباشر يا أستاذ.

يقترب المحامى أكثر من الشاهد وهو يلين من لهجته ويقرأ من قصاصة صغيرة فى يده.

**محامى خالد:** اللى أنا عرفته عنك أنك راجل مجتهد فى شغلك.. ومنضبط.. وعندك أسرة.

**الشاهد:** الحمد لله.

**محامى خالد:** وبما إنك حطيت إيدك على المصحف وحلفت إنك تقول الصدق والصدق فقط أرجوك أن تتذكر معى.

ألم يحدث أن بلغك أحد ولو شفاهة أو بالإشارة إنك ترفض الأجازه بتاعة خالد..

يقول الشاهد مستفزاً..

**الشاهد:** لا.. لم يحدث شىء من هذا.

ويجتد المحامى..

**محامى خالد:** ما كنتش تعرف إن له أخ مقبوض عليه فى الجماعات الإسلامية؟؟

**الشاهد:** كنت أعرف..

تتصاعد حدة المحامى..

**محامى خالد:** وما تعرفش إن أبسط قواعد الأمن إن واحد زى كده ممنوع يطلع طابور العرض..؟؟

**الشاهد:** خالد من يوم ما طبوه فى المخابرات وهو ماشى بأسلوب



---

سليم جداً وما فيش أى حاجة بتظهر منه غير إنه ملتزم  
زيادة شوية.

**محامى خالد :** يعنى إيه ملتزم زيادة شويه؟

**الشاهد :** يعنى.. بيصلى ويصوم ويؤم الناس فى الصلاة ويتلو القرآن  
مع بقية الجنود..

**محامى خالد :** وده اللي خلاك ترفض أجازته.

**الشاهد :** دى سلطة تقديرية.. وأنا ما كنش عندى اللي يحل محله  
وبعدين ما كانش باين عليه حاجة خالص.

المحامى يوجه كلامه إلى القاضى..

**محامى خالد :** سيدى الرئيس بم تفسر ذلك الإصرار على إشراك  
موكلى فى العرض رغم كل المحاذير.. شكراً..

- وجه رئيس النيابة فى لقطة كبيرة يسأل خالد..

**النيابة :** لما طلبوك فى المخابرات يا خالد طلبوك ليه.

**خالد :** ما عرفش بالضبط.. لكن أنا خمنت علشان محمد أخويا كان  
فى الجماعات.

**النيابة :** هل قبض على محمد أخوك قبل اعتقالات سبتمبر..

**خالد :** أيوه.. لما كان طالب فى جامعة أسيوط انتزع من على جدران  
محطة القطار صور السادات وقطعها اتقبض عليه واتقدم  
للمحاكمة لكن طلع براءة.

**النيابة :** قالوا لك إيه فى المخابرات لما رحى؟

**خالد :** سألونى أسئلة عادية وحذرونى أقرب من الجماعات أو أصلى

---

فى مساجدهم.

القاضى: طب كمل حكايتك.. يوم ٢٣ رفضوا أجزتك.. وبعدين؟؟

- يقول خالد متذكراً..

خالد: تانى يوم وفى طابور الصباح جانى الضابط المسئول عن  
التمام.

- - -

---

### ٣٩ - الوحدة العسكرية - نهار خارجي ..

- طابور الصباح والجنود مصفوفين ويتحرك ضابط إلى حيث يقف خالد ويؤدي له التمام ..

**الضابط:** تمام يا فندم .. فيه ثلاث عساكر غياب.

- ويقدم لخالد ورقة بالعساكر الغائبين .. خالد يتناول الورقة ويتطلع إليها ثم يقول له ..

**خالد:** طيب اصرف الطابور واستعد للبروفة ..

ويؤدي الضابط التحية ثم يستدير عائداً بينما الكاميرا تقترب من وجه خالد ..

- . . -

## ٤٠ - منطقة المنصة:

### «مدينة نصر» - نهار/ خارجى

لقطة عامة لمنطقة المنصة.. عربية جيب تتوقف وينزل منها قائد الكتيبة وعدد من الضباط.. قائد الكتيبة يشرح لهم..

**قائد الكتيبة:** الكتيبة بتاعتنا حاتطلع باتناشر مدفع باتناشر عربية.. ترتيبهم حايكون كالاتى:

يضيع صوت القائد على وجه خالد الذى تقترب منه الكاميرا حتى لقطة كبيرة وهو يتطلع إلى المنصة الخالية ولا يسمع صوت القائد فهو غارق فيما يبدو فى داخل نفسه ونسمع صوته من خارج الكادر.

**صوت خالد:** فى اليوم ده ثلاث عساكر غايبين.. والمنصة قدامى فاضية.. استولى على خاطر إنى أقتله.. حاولت أبعد خاطر ده عن رأسى.. لكن كنت شايف الصورة.. كنت شايفها قدامى بتحصل.

- - -

### ٤١ - مشهد متخيل.. كابوس..

- لقطات سريعة خاطفة من وجهة نظر خالد أقرب إلى الومضات يبرق فيها الرصاص وتنفجر قذابل ما.. لقطات لا علاقة لها بما حدث بالفعل ولكنها قريبة منه بشكل ما ومستدعاه من خلال مخيلة خالد وتنتهى اللقطات على وجه خالد فى لقطة كبيرة وهو يغمض عينه ليفرق الكادر فى الظلام.

- إظلام -

## ٤٢ - شارع رمسيس - القاهرة - محل عبد الحميد لبيع الكتب قرب مسجد للأخوة..

يضاء الكادر حيث ينزل تاريخ «الجمعة ٢٥ سبتمبر ١٩٨١ ..

لافتة تحمل عنوان «مكتبة ابن كثير» ثم تنزل الكاميرا إلى أسفل حيث نرى خالد يرتدى الملابس الملوكى فى داخل المحل وإلى جواره عبد الحميد يلبي طلبات بعض الزبائن الذين يشترون الكتب الدينية وهم ملتحون ومنقبات.. يقول أحدهم.

شاب ملتحي: الفتاوى لابن تيمية من فضلك.

عبد الحميد: حاضر.

فتاة منقبة: ونيل الأوطار للشوكانى موجود؟

عبد الحميد: إن شاء الله.

خالد يصعد على سلم ليحضر أحد الكتب ونسمع صوته يأتى من خارج الكادر..

خالد: ليلتها ما نمتش طوال الليل.. تانى يوم من الصبح رحت لعبد الحميد فى الدكان بتاعه فى رمسيس.. عاوز أقوله بس موش لاقى فرصه.

ينزل خالد ومعه نسخة من «نيل الأوطار» ينفض عنها التراب وهو يقول لعبد الحميد..

خالد: ما فيش غير النسخة دى يا عبد الحميد..

عبد الحميد: حانبت نجيب إن شاء الله.. الكتب موجودة المهم اللي يقرأ.. يعطى النسخة إلى إحدى المنقبات.. ونسمع الأذان فى المسجد

---

الملاصق للمحل..

عبدالحميد: عفواً يا جماعة.. صلاة الجمعة حاتباً.. يلا يا خالد.

وبينما يغلغان الباب يتساءل خالد فى شئ من الانبهار.

خالد: إنت قریت الكتب دى كلها يا عبدالحميد.

عبدالحميد: من يوم ما استقلت من الجيش وأنا ما وراييش غير

قراية الكتب وبييعها للإخوة.

ويتنهد خالد وهو يقول..

خالد: يا بختك يا أخى..

- - -

## ٤٣ - مسجد من مساجد الإخوة..

شاب ملتحي عنيف فى نبراته.. حاد فى طريقة إلقائه لخطبة الجمعة.. قسوة بالغة وصراخ حاد.. وتهديد بالسحل والحرق يوم القيامة وفى القبر.. معظم المصلين من الشباب الملتحي الذى يرتدى الجلابيب البيضاء وبعضهم يبكى تأثراً.. نلاحظ وجود العديد من أجهزة التسجيل من كل الأنواع وهى تدور مسجلة خطبة الشيخ القاسى.

- عبدالحميد ينصت بشغف للخطبة وخالد إلى جواره غير منتبه..  
يميل على عبدالحميد هامساً.

خالد: عبدالحميد.

عبدالحميد: خير.

خالد: أنا جالى هاتف إننى أخلص مصر من فرعون.

- ينظر إليه عبدالحميد وقد فوجئ بشدة..

عبدالحميد: إيه؟؟

خالد: فرعون يا بنى آدم.

عبدالحميد: فرعون مين؟؟

خالد: السادات.. حاشترك فى العرض العسكرى بتاع ستة أكتوبر  
وممكن أقتله أثناء العرض.

عبدالحميد: إنت بتخرف تقول إيه..

خالد: من ساعة ما اتعينت فى العرض والهاتف ده بيلح على.

---

عبدالحميد: دا هاتف من الشيطان.. اسمع الخطبة وسيبك من  
التخريف دى.

- ولكن خالد لا يستطيع أن يركز انتباهه فى كلام الخطيب الذى  
ما زال ملتهباً.. صارخاً..

-...-

## ٤٤- خارج المسجد..

خارج المسجد وهما يتجهان إلى عربة عبدالحميد الفيات ويقول له  
عبدالحميد والإخوة ينصرفون من المسجد..

عبدالحميد: مراتى عاملة لنا فتة تعالى أغديك..

خالد: ماليش نفس.

عبدالحميد: طب ما تيجى.. أروّحك..

خالد: موش عاوز أروّح..

عبدالحميد: مِ الحق.. الأخ فرج كان سأل عليك.

خالد: فرج؟.. فرج مين..

-...-



## ٤٥ - مسجد صغير - فلاش باك - نهار

- لقطة كبيرة لوجه فرج وهو يتحدث بصوت مؤثر ومشحون..

**فرج:** المجتمع يا إخوان مثل السمك يفسد من رأسه.. فإذا تخلص المجتمع من الرأس الفاسد صلح حاله وأصبح في مقدوره أن ينتهج الطريق الصحيح.. طريق الله وشريعته الفراء.. وذلك يستلزم الجهاد لإقامة الدولة الإسلامية والحكم بما أنزل الله.. إن حكام المسلمين اليوم في ردة وهم أشبه بالتتار يُحرّم التعامل معهم أو معاونتهم أو الخدمة في جيش يسيطرون عليه، إن الخروج على الدولة الكافرة وقتالها فرض على كل مسلم غيور على دينه حريص على آخرته.. وقد بينت هذه الأحكام في كتابي «الفريضة الغائبة».

- الكاميرا تستعرض العديد من الوجوه الشاخصة إلى فرج بينها وجه خالد..



فرج عبدالسلام

---

## ٤٦- شوارع- بولاق الدكرور- نهار..

- بولاق الدكرور وزحامه غير الطبيعى حيث تختلط أصوات الباعة بأغاني الكاسيت الزاعقة بالخطب والمواظ وأصوات الكلاكسات.. جو عام يختلط فيه كل شىء فى تنافر مدهش..

- خالد يسير وسط الناس ونسمع صوته من خارج الكادر..

**صوت خالد:** ما عبد الحميد جاب لى سيرة فرج لمعت الفكرة فى دماغى وقلت أعرضها عليه. «خصوصاً وأنا باحترمه وباعتبره فقيه وعلمه واسع»

- يدخل صوت القاضى على نفس المشهد..

**صوت القاضى:** يا أخ فرج.. إنت تعرف خالد من إمتى؟؟

- - -

## ٤٧ - قاعة المحكمة - نهار..

- لقطة كبيرة لوجه فرج فى القفص بالمحكمة وهو يرد..

فرج: من كام شهر قبل الأحداث كان أخوه الشيخ محمد يعتهولى  
عشان أساعده فى الحصول على شقة يتجوز فيها.. لقيته شاب  
متفتح وعاوز يعرف.

وكيل النيابة ساخراً..

وكيل النيابة: قمت عرفته!!

فرج فى دهاء وضع..

فرج: أعطيته بعض الكتب يقرأها.

القاضى: فى التحقيقات قال خالد إنه خد منك كتاب الفريضة  
الغائبة..

فرج: فى البداية أعطيته بعض كتب السلف الصالح وبعد شوية  
أعطيته الفريضة الغائبة.

النيابة: تأليفك؟

فرج: هذا شرف لا ادعيه.. هو مؤتى تاييد.. هو تجميع لاقوال عدد  
من علماء المسلمين مثل ابن تيمية هادى المودودى  
وعبد رهما وهو يدور حول الفريضة الغائبة عن  
مجتمعتنا الجاهلى..

رئيس النيابة واقفاً مستأذناً..

النيابة: لو أذنت لى يا سيادة الرئيس استفسر من الأخ فرج عن  
صاحب هذا التعبير «مجتمعتنا الجاهلى».

**فرج:** علماء المسلمين حددوا ملامح المجتمع اجاهلى بدءاً من ابن تيمية وانتهاء بالشهيد الشيخ سيد قطب ومن سار على دربهما من الإخوة.

**النيابة:** هذا الفكر يتبناه تتظيم الجهاد اللى إنت الفيلسوف بتاعه..

**فرج:** نعم.

**النيابة:** وهذا الفكر بيعتبر إن مجتمعنا مجتمع جاهلى وبالتالي يجب الخروج عليه وقتاله.

**فرج:** نعم.

**النيابة:** وهذا ما خططتم له وقمتم بتنفيذه بالفعل يوم حادث المنصة..

يصمت فرج قليلا ثم يقول.

**فرج:** نعم.

**النيابة:** شكر سيدى الرئيس.

القاضى ينظر إلى فرج..

**القاضى:** هل خطر على ذهنك فكرة قتل الرئيس السادات قبل زيارة خالد لك فى اليوم ده..

**فرج:** الفكرة طرأت لناس كثير لكن إحنا كنا هدفنا كتنظيم هو الثورة الإسلامية الشاملة وكنا شايفين إنه لسه بدرى عليها لكن بعد اعتقالات سبتمبر وإلقاء القبض على بعض قيادات التنظيم عرفنا إن التنظيم انكشف وبقى فى خطر.. لما الأخ خالد جانى وعرض على فكرته حسيت إنها جت فى وقتها بالضبط.

- - -

## ٤٨ - شقة فرج

وجه خالد فى لقطة كبيرة وهو يقول..

خالد: أنا جالى هاتف إنى أقتل السادات..

وعندما تتراجع الكاميرا نكتشف أنه فى شقة فرج الذى يجلس أمامه..

وينظر إليه نظره باردة لا تعبر عن أى شىء وكأنه يضع قناعاً على وجهه.

فرج: وبعدين؟

خالد: عرضت الموضوع على أخونا عبدالحميد فالى إنه هاتف من الشيطان.

فرج لا يرد ولا يعبر وجهه عن شىء.. يقول خالد بعد لحظة.

خالد: أنا حاطع طابور العرض يوم ستة أكتوبر..

- تبرق عينا فرج.. يكمل خالد فى حماس.

خالد: دى موش أول سنة أطلع عرض أكتوبر.. ي تالت سنة وحافظ كل خطوة فيه وعارف اللى بيحصل بالظبط.

- تلين ملامح فرج ويكمل خالد فى انفعال صادق.

خالد: أنا شفته..

فرج: شفت إيه؟

خالد: شفت اللى هايجصل بعينى.. صدقتنى يا أخ فرج.. شفته بالظبط..

يتململ فرج وهو يقيس رد فعل كلامه على وجه خالد يتساءل..

فرج: وسط طابور العرض والحراسات..؟

خالد : أيوه .

يصمت فرج لحظة مفكراً ثم يقول ..

فرج : العملية موش سهلة يا أخ خالد ..

خالد : العملية نفسها موش مستحيلة .. الخروج منها هو اللي

مستحيل .. وأنا ما عنديش أمل أخرج منها .. ولا رغبة ..

ينظر فرج فى عينيه متسائلاً وهناك حشرجة فى صوته ..

فرج - قصدك إيه ..

خالد : إنت موش قتلتي مرة إنه طاغوت وإن قتله حلال ؟؟

فرج : موش بس حلال .. دا واجب على كل مسلم صحيح الإسلام ..

خالد : وإن مت فيها أبقي شهيد ؟

فرج : ﴿وَلَا تَحْسَبَنَّ الَّذِينَ قُتِلُوا فِي سَبِيلِ اللَّهِ أَمْوَاتًا بَلْ أحيَاءٌ عِنْدَ رَبِّهِمْ

يُرْزَقُونَ﴾ .

خالد : وأنا نفسى أنولها .

فرج : هر إيه دو

خالد : الشهيد

يصمت عبدالسلام فرج طاريلاً ويعبث بلحيته صغيرة متفكراً وشيئاً

فشيئاً تجيش مشاعره ويتوقد وتبرق عيناه ببرقة غريب وهو يتمتم ..

فرج : ولكنك موش هاتقدر عليها لوحدك .

ويقول خالد مستمراً فى حماسة ..

خالد : فيه مصادفة غريبة حصلت .. عندي ثلاث عساكر غاييين من

---

غير إذن.. والمفروض إنهم ينتدبوا ثلاثة غيرهم من بره اللواء  
أنا موش حاخليهم ينتدبوا حد .  
فرج يتابعه بشغف شديد وهو يكمل..  
خالد: ممكن ندخل ثلاثة بدالهم من الإخوة الجاهزين للشهادة..  
يهمس فرج فى فرح طاغى..  
فرج: مستحيل يبقى ده هاتف من الشيطان..

- - -


## ٤٩ - قاعة المحكمة..

قاعة المحكمة فى لحظة عامة ساكنة تماماً ونسمع صوت فرج يتحدث..  
**فرج:** أنا اقتنعت بالفكرة جداً.. وحسيت أنها فرصة لابد من  
استغلالها.. لكن كان لازم أعرض الفكرة على الإخوة فى  
التتظيم عشان يقرئها.. بعث رسالة للأخ عبود الزمر..  
**القاضى:** بصفته إيه..

**فرج:** بصفته 'المستؤل العسكرى للتتظيم بتاعنا..  
- يتوجه القاضى بنظراته إلى عبود الزمر الذى يقف فى القفص..  
**القاضى:** قولى يا أخ عبود.. إمتى وإزاي عرض عليك الأخ فرج الموضوع..  
عبود يصمت قليلاً ثم يقول بعد أن يبسم بصوت خافت..  
**عبود:** فى الفترة دى وبعد القبض على الأخ نبيل المغربى بقينا ننتقل  
من مكان لمكان وما نستقرش فى مكان واحد.. وفى يوم دبر لنا  
واحد من الإخوة لقاء مع الأخ طارق الزمر فى قهوة فى شبرا.

- - -





عبود الزمر من وراء القضبان

## ٥٠- مقهى بشبرا..

إحدى المقاهى الكبيرة فى شبرا.. طارق الزمر وهو يدخل المقهى ونسمع صوت عبود على هذه اللقطة..

**صوت عبود:** فى الفترة دى طبعاً كل الإخوة وخصوصاً القياديين حلقوا لحاهم ولبسوا ملابس عادية وبقوا يشربوا سجائر وشيشة شكل من أشكال التخفى يعنى..

- يصل طارق إلى أحد الأركان فى عمق المقهى حيث يجلس عبود الزمر ثم يجلس إلى جواره مصفقاً للجرسون.. ثم يقول له..

**طارق:** شيشة وشاى يا قمر وحياة والدك..

- ويعلق عبود على مرحة الظاهر هذا..

**عبود:** شكلك مبسوط.. وإلا ده تبع التمثيل برضه..

**طارق:** أنا مدووش.. عندى أخبار.. مدهشة من فرج.

**عبود:** خير.

**طارق:** ربنا بعت له ملازم فى المدفعية يتلفت طارق يميناً ويساراً ثم يخفض صوته وهو يميل عليه قائلاً ناوى يقتل السادات فى المنصة يوم العرض العسكرى فى ستة أكتوبر.

- رد فعل على وجه عبود باندهاش بالغ يتساءل..

**عبود:** ملازم؟

**طارق:** ملازم أول اتعين فى العرض العسكرى..

- يلفت نظرهم أصوات عالية فى تليفزيون المقهى فينظرون تجاهه..

- التليفزيون يذيع رحلة السادات إلى المنصورة وافتتاح مصنع السماد

---

حيث نراه فى سيارة مكشوفة يجوب شوارع المنصورة والجماهير حوله  
تصرخ.. بالروح بالدم.. والمعلق يصرخ فى حماس معلقاً على ذلك الحدث  
النادر.. يعلق عبود..

**عبود:** عاوز يعرف العالم كله إن شعبه بيحبه وإن اللى قبض عليهم  
دول شوية منحرفين وإرهابيين.

**طارق:** تلاقى ثلث أرباع اللى حوالية دول مباحث والباقي مطلعينهم  
من مدارسهم ومصالحهم عشان يهتفوا.

**عبود:** صحافة الدنيا كلها قلبه عليه عشان كده ممكن يعمل أى  
حاجة.. لو خدت بالك اليوميين دول ما يبطلش حركة النهارده  
فى المنصورة ومن كام يوم كان فى مدينة السلام وأسوان..  
واسكندرية وبعد كام يوم رايح العامرية.. وفي كل مكان بيتكلم  
وبيخطب وبيصور وبيعمل مؤتمرات صحفية وبرامج تلفزيونية  
تتذاع فى العالم.. الراجل ده بيدبر لضربة كبيرة يا طارق..

**طارق:** عشان كده نتغدى بيه قبل ما يتغشى بينا..

ويقول عبود فى احتداد صارخاً وإن كان بصوت خافت..

**عبود:** حايعمل إيه حته ملازم أول وسط هيلمان العرض.. الظاهر  
فرج خرف..

**طارق:** طب اسمع لغاية الآخر..

**عبود:** إحنا موش ناقصين قرارات متسركة يا طارق.. الداخلية ما  
بتكشش والورق اللى خدوه من شقة الجيزة كشف كتير  
من أسرارنا.

---

طارق: يعنى إيه..

عبود: قول لفرج إنى موش موافق على الخطوة دى لأنها بتعرض كل  
خططنا للخطر..

- ويأتى الجرسون بالشيشة والشاى فيضحكان عالياً ويقول عبود  
للجرسون..

عبود: هاتلنا طاولة لو سمحت يا ذوق.

- ونسمع صوت عبود على اللقطة يأتى من خارج الكادر بينما  
الجرسون يلبى لهما طلبهما..

صوت عبود: «كان تقديرى إن الثورة الإسلامية الشاملة لسه قدامها  
على الأقل سنتين عشان نقرر نقوم بيها».

— • • —

## ٥١- شقة عبدالحميد..

- لقطة كبيرة لوجه عبدالحميد وهو يقول فى حدة وعصبية..

**عبدالحميد:** موش حاتنجح..

يرد عليه فرج الذى يعدل ساقه المدفونة بالجبس..

**فرج:** اتقى الله يا عبدالحميد.

**عبدالحميد:** اتقى الله أنت يا فرج.. إزاي وسط كل الحراسة دى حاتنفذ العملية.

- تتراجع الكاميرا ونكتشف أننا فى شقة عبدالحميد وقد اجتمع عبدالحميد وفرج وخالد ومعهم عبدالناصر درة وهو فتى فى حوالى الثامنة عشرة من عمره ونلاحظ أنه لصيق بفرج ومسحور به.. ويقول خالد محاولاً إقناع عبدالحميد بمنطقه..

**خالد:** أنا شفتها يا عبدالحميد بنفسى..

**عبدالحميد:** بلاش تخريف يا خالد.. وبعدين دى تهلكة وربنا سبحانه وتعالى قال: ﴿ولا تلقوا بأيديكم إلى التهلكة﴾..

- ويحتد فرج وتلتمع عيناه.

**فرج:** دى موش تهلكه يا أخ عبدالحميد.. ده استشهاد.

**عبدالحميد:** طب ما تعملها إنت وتستشهد - والا أنت عليك تفكر وتخطط وتستنى اللحظة المناسبة عشان تتط وتركب.

وينفعل فرج بشدة..

---

فرج: إنت إزاي تكلمنى بالطريقة دى.

- ويتدخل خالد بينهما..

خالد: يا جماعة أرجوكم ما تختلفوش.. اسمعنى يا عبدالحميد أنا خبير فى العرض العسكرى وأقدر أقولك بالضبط إيه اللى حاحصل خطوة بخطوة.. أنا عامل حسابى على كل حاجة..

- يدق الباب دقات متفق عليها.. ينتبه الجميع.. ثم يذهب عبدالحميد ليفتح الباب ويجد أمامه طارق الزمر الذى يبدو أنه لا يعرفه..

عبدالحميد: نعم؟

ويأتى صوت فرج من الداخل مرحباً.

فرج: أهلاً يا أخ طارق.. تعالى.

- يدخل طارق وعبدالحميد يشعر بشيء من الضيق.. يفلق الباب خلفه ثم يتوجه إلى خالد هامساً..

عبدالحميد: هو بيتصرف فى البيت زى ما يكون بيته ليه كده.

خالد: ما تدقش يا عبدالحميد.. دا طارق الزمر.. أخونا.. تعالى معايا أشرح لك الترتيبات اللى أنا عاملها..

- خالد يأخذ عبدالحميد ويدخلان إلى حجرة أخرى بينما طارق الزمر يجلس إلى جوار فرج وفرج يشير إلى عبدالناصر ليعده.

فرج: قوم أعملنا شاي يا عبدالناصر..

يقوم عبدالناصر متجهاً إلى المطبخ مخلياً لهما المكان ويقول طارق فى صوت خافت..

طارق: عبود بيقولك إنه موش موافق على عملية خالد.

---

فرج فى شىء من الضيق: ليه؟

**طارق:** بيقولك إن نجاحها صعب ولو فشلت هاتعرض التنظيم كله للخطر.

تبرق عينا فرج فى حدة غريبة وعصيبة وهو يقول فى صوت خافت ولكنه متكوم وغاضب..

**فرج:** لا أنت فاهم حاجة ولا عبود فاهم حاجة.. مالهم دول ومال التنظيم.. دول ما لهمش أى علاقة بينا ولا يعرفوا عننا أى حاجة.. وبعدين تفتكر ناس حايدخلوا جوه المولد ده والحراسات دى كلها ويطلعوا منها سُلام.. دول ناس حايموتوا حايموتوا نجحوا أو فشلوا حايموتوا..

- - -

---

## ٥٢- حجرة داخلية بشقة عبدالحميد..

خالد مع عبدالحميد وقد فرد ورق رسم كبير وقد رسم عليه الوحدات المدرعة بشكل كروكى وكذلك المنصة وانهمك فى الشرح بينما عبدالناصر يتطلع إلى الرسم والرجلين فى انبهار وضح..

خالد: العربية هاتقف هنا.. قدام المنصة.. الهدف هايبقى هنا.. هانزل أنا من هنا.. أرمى قبلة يدويه تعمل ارتباك ولخبطة فى ثوان أكون واخد الرشاش وجارى ناحية الهدف.. فى نفس اللحظة دى يكون الإخوه اللى معايا من فوق العربية بيتعاملوا مع الهدف.. بس لازم يكون فيهم واحد بيعرف ينشن..

يشرد عبدالحميد بنظراته بينما عبدالناصر يربت على خالد فى إعجاب بالغ وهو يهمس فى شبه تقديس والدموع تترقرق فى عينيه..

عبدالناصر: بارك الله فيك يا بطل..

— • • —



## ٥٣- مقهى أو شارع..

- مقهى آخر.. أو مكان عام آخر شارع مثلاً أو ميدان مزدحم بالمارّة..  
لقطة كبيرة لوجه عبود.

عبود: يعنى إيه..

طارق: يعنى خالد واللى معاه هايموتوا هايموتوا وبالتالي موش  
حايقولوا عننا أى حاجة.. دى مهمة استشهادية وسرهم  
حايئدفن معاهم..

عبود يفكر بعض الوقت ثم يلتفت ناظراً إليه فى عدم اقتناع..

عبود: إحنا دورنا إيه فى العملية؟؟

طارق: حاندهم بالذخيرة وكام قنبلة يدويه وتلات إبر ضرب نار..  
حتى الإخوة اللي حايشاركوا مع خالد مش من عندنا..

عبود: فرج اللي قالك كده؟

طارق: أيوه..

عبود: آمال هايحييهم منين؟؟

طارق: إنت عارف فرج.. عنده جيش من المتعاطفين مجهزهم  
للاستشهاد..

ويغرق عبود فى أفكاره مرة أخرى هامساً والكاميرا تقترب من  
وجهه..

عبود: لو قدروا يدخلوا أرض العرض العسكري من غير ما ينكشفوا  
يبقوا قطعوا أكثر من نصف المسافة..

- - -

## ٥٤- قاعة المحكمة..

لقطة كبيرة لوجه القاضى وهو يوجه سؤالاً لعبدالحميد..

**القاضى:** يا أخ عبدالحميد.. إنت ما كنتش موافق على الاشتراك مع خالد.. إيه اللى خلاك غيرت موقفك..

ويقول عبدالحميد..

**عبدالحميد:** أنا كنت مقتنع إن السادات وصل لدرجة لا يمكن السكوت عليها وكنت متأكد إنه أصبح خطر حقيقى على الإسلام والمسلمين ويكفى إنه قبض على علماء المسلمين وسبهم علناً وقال عليهم مجانين وسخر منهم.. ثم إنه كفر بشريعة الإسلام..

ويقول رئيس النيابة محتدأ..

**رئيس النيابة:** موش من حَقك إِنْكَ تكفره ولا من حَقك إِنْكَ تأخذ القصاص بإيديك حتى لو اقتتعت إنه كافر..

**عبدالحميد:** قال رسول الله صلوات الله عليه وسلامه.. من رأى منكم منكراً فليغيره..

**النيابة:** فيمن له سلطة عليه وإلا تحولت الحياة إلى غابة..

يقوم عبدالناصر منادياً من القفص..

**عبدالناصر:** يا سعادة القاضى.. سعادة القاضى..

**القاضى:** إيه يا عبدالناصر..

---

**عبدالناصر:** أنا محصور..

وترتفع الضحكات فى القاعة ويدق القاضى بقادومه ليعيد الهدوء..

**القاضى:** بتقول إيه يا عبدالناصر ما سمعتكش..

**عبدالناصر:** عاوز أفك حصر ولا مؤاخذه.. أقضى حاجتى يعنى..

- يشير القاضى إلى أحد الحراس.. الذى يقوم بفتح القفص ويخرجه وأثناء ذلك نلاحظ أن «عبدالناصر» ينظر إلى سيدة فى القاعة.. وهى تنتظر إليه.. يخرج عبدالناصر من القاعة تحت الحراسة ونلاحظ أن السيدة التى أشار إليها تتحرك خارجه هى أيضاً «وهى منقبة»..

ويقف محامى عبدالحميد قائلاً..

**محامى عبدالحميد:** لو سمحت لى عدالة المحكمة.. إحنا طلبنا شيخ الأزهر للشهادة وكذلك فضيلة المفتى وبعض علماء المسلمين..

**القاضى:** فضيلة المفتى بعث رده على دعاوى المتهمين وعلى فكرهم النظرى.. متمثلاً فى كتاب الفريضة الغائبة والمحكمة اكتفت بهذا الرد..

**محامى عبدالحميد:** ولكن الدفاع لا يكتفى بهذا الرد ويريد أن يناقش صاحبه..

— — —

## ٥٥- خارج قاعة المحكمة..

خارج القاعة وعبدالناصر مربوط بيد الحارس بالكلابشات يتجهان إلى حيث دورات المياه بينما السيدة المنقبة تسير وراءه على مبعدة.. وعندما يلحقها عبدالناصر بطرف عينيه تقترب منه.. يفتح قبضة يده لتسقط منها ورقة مطوية لا يلحقها الحارس.. تتقدم السيدة المنقبة وتدوس على الورقة بقدمها ثم تسقط من يدها منديلاً أو شيئاً مشابهاً وتحنى لتلتقط الورق ثم تعود إدراجها إلى قاعة المحكمة..

---

## ٥٦- داخل قاعة المحكمة

داخل القاعة ورئيس النيابة يقف متحدثاً..

**رئيس النيابة:** النيابة تريد رأى الدكتور عمر عبدالرحمن بصفته عالم دين كان يُدرّس الشريعة الإسلامية بالجامعة فيمن يكفر مسلماً ينطق الشهادتين ويصلى ويصوم ويقرأ القرآن.

- عمر عبدالرحمن وسط زملائه من المحبوسين داخل القفص يقوم واقفاً والكاميرا تقترب منه..

**عمر عبدالرحمن:** فى العموم لا يجوز تكفير المسلم إلا إذا أعلن كفره أو أنكر ما هو معلوم من الدين بالضرورة..

**رئيس النيابة:** وإذا أعلن ذلك ماذا يكون التصرف معه..

**عمر عبدالرحمن:** يستتاب.. وإذا لم يعلن توبته ويرجع عن هذا الكفر يكون خارجاً عن الملة ومرتبداً وعقوبة المرتد أشد من عقوبة الكافر..

**رئيس النيابة:** وفى حالتنا ما رأيك فى تكفير الرئيس الراحل أنور

---

السادات.. وهل أفتيت للجماعة بقتله.

يدخل عبدالناصر فى هذه اللحظة مع الحارس صانعاً ضجة منادياً على القاضى..

عبدالناصر: نريد معاملة إنسانية يا سيادة القاضى.. إزاي بنى آدم يقضى حاجته وهو مقيد بالشكل ده وفيه واحد شاييل رشاش وواقف له والحمام من غير باب هل ده فعل مسلمين؟؟ دا اليهود ما يعملوش كده..  
- ضجة فى المحكمة وضحكات ويدق القاضى بقادومه ليعيد الهدوء..  
ثم يشير إلى النيابة التى تشير إلى عبدالرحمن..

**النيابة:** نحن فى انتظار رأى الدكتور عمر عبدالرحمن..

**عمر عبدالرحمن:** أنا رأى فى هذا الموضوع سبق وقلته صراحة للأخ عبدالسلام فرج والأخ الدواليبى عندما استفتيتانى فى حل دم الرئيس الراحل فأفتيت بعدم حل دمه لأنه وإن كان كافراً إلا أن كفره ليس كفراً بواحاً يخرج من ملة الإسلام.. غاية الأمر أنه ارتكب معاصى وكبائر حكمها حكم الفسق..

**رئيس النيابة:** شكراً يا شيخ عمر.. شكراً سيدى الرئيس..

ويجلس رئيس النيابة.. وكذلك عمر عبدالرحمن..

ثم ينظر القاضى إلى عبدالحميد وهو يقول:

**القاضى:** نرجع للأخ عبدالحميد.. إيه اللى خلاك تغيّر رأيك وتوافق على الاشتراك فى عملية المنصة يا عبدالحميد..؟

**عبدالحميد:** أنا والأخ خالد أصحاب من زمان قوى وأعرفه عن قرب.. خالد كان متحمس ومخطط للعملية بإحكام.. حماسه وتخطيطه خلونى أفكر..

## ٥٧- شقة عبدالحميد..

لقطة كبيرة لموس يكشف الشعر الكثيف.. تتراجع الكاميرا لتكتشف أن عبدالحميد هو الذى يحلق لحيته ويبدو عليه الألم وهو يحلق ذقنه بسبب نقاط الدم التى تنبثق من خلال مسام جلده ينتهى من تلك العملية وينظر إلى نفسه فى المرآة فيبدو الفرق كبيراً بين شكله وهو ملتحي وبين شكله وهو بدون لحية.. يبدو أصغر بسنوات.. يفاجـ ونفاجاً معه أن وجه خالد ينعكس على صفحة المرآة وقد بدت عليه الدهشة.. عبدالحميد يلتفت إليه.. تبدو الدهشة الشديدة على وجه خالد ويتساءل..

خالد: إيه ده؟؟

عبدالحميد: إيه رأيك ما نفعلش نجم سيما..

ويدرك خالد الموقف.. يتساءل فى كثير من الفرح..

خالد: إنت غيرت رأيك؟؟

ويهز عبدالحميد رأسه موافقاً ويحتضن خالد متأثراً وهو يهمس..

خالد: بقينا اثنين..

عبدالحميد: والثالث حاجيبهولك بإذن اله.. إنت موش عاوز

واحد نشنجى..

خالد: أيوه..

عبدالحميد: إيه رأيك فى واحد واخد بطولة الجيش فى

الرماية سبع سنين متصلة..

— • • —

## ٥٨- مسجد صغير «من مساجد الإخوة»..

لقطة متوسطة لشاب نحيل جداً وهو ينحني ساجداً فى خشوع يصلى.. تتراجع الكاميرا لنكتشف إننا فى أحد المساجد الصغيرة «مساجد الإخوة» ويدخل عبدالحميد من باب المسجد ويقترب ليجلس إلى جواره والمسجد خالى تقريباً إلا منهما..

- حسين ينهى صلاته مسلماً يميناً ثم يساراً ويلاحظ وجود عبدالحميد إلى جواره ولكنه لا يفطن إليه.. يتمتم عبدالحميد..

عبدالحميد: تقبل الله..

حسين: منا ومنكم..

ويعاود حسين النظر إليه فنبرة الصوت والهيئة معروفة لديه.. يكتشفه.. ليتساءل فى دهشه وهو يشير إلى ذقنه الحليقة..

حسين: عبدالحميد؟؟ إيه اللي عامله فى روحك ده؟؟

عبدالحميد: إزيك يا أخ حسين وإزى مراتك..

حسين: والله تعبان يا عبدالحميد على وشك الوضع.

عبدالحميد: ربنا يتولاها برحمته.. إمسك..

- يخرج مضطرباً ويقدمه إلى حسين.

حسين: إيه ده.

عبدالحميد: دا مبلغ جمعوه الإخوة لأختك وأولادها..

حسين يضعه فى جيبه متأثراً وهو يقول..

حسين: بارك الله فيكم جميعاً..

عبدالحميد: كل شهر بإذن الله حايبقى فيه مبلغ زيه لغاية ربنا ما

---

يفك أسر جوزها ..

حسين: ويفك أسر المسلمين .. لكن إنت ما رديتش على سؤالى .. إنت  
حلقت لحيتك ليه .. ما أنت كنت رافض قبل كده ..

عبدالحميد: هاشرح لك كل حاجه .. بس أنا عاوز أعرض عليك  
مأمورية لا يقدر عليها إلا أولى العزم من الرجال ..

ينتبه حسين بشدة وهو يتساءل ..

حسين: خيراً إن شاء الله ..

- - -



---

## ٥٩- قاعة المحكمة..

لقطة كبيرة لوجه القاضى وهو يسأل عطا طایل الذى يقف فى القفص وسط زملائه..

**القاضى:** وانت يا أخ عطا.. كيف تم تجنيدك لهذه المهمة..

**عطا:** بسم الله الرحمن الرحيم والصلاة والسلام على سيد المرسلين النبى الأمى وعلى آله وأصحابه أجمعين وبعد.. أنا زميل وصديق قديم للأخ فرج من أيام ما كنا طلبة فى مدرسة الدلنجات بحيرة فنحن من بلد واحدة ولم نفترق إلا فى الجامعة فهو دخل هندسة القاهرة وأنا دخلت هندسة الإسكندرية ومع ذلك لم ننقطع عن بعضنا البعض خاصة بعد أن التزمنا دينياً.. الأخ فرج طول عمره ثورجى.. لما زرتة فى جامعة القاهرة فى أوائل السبعينيات لجيته مشكل مجموعة من الإخوة الملتزمين كان هدفها التصدى للشيوعيين الكفرة والناصريين اللى كانوا مسيطرين على الجامعة أيامها وناشرين الفساد والعياذ بالله فى جناباتها..

- مزج إلى -

---

## ٦٠- ساحة جامعة القاهرة- فلاشباك

لقطات سريعة وحادة داخل الجامعة لمجموعة من الطلاب الملتحين بعضهم بالجلابيب وبعضهم بالبنطلونات وهم يستخدمون الجنازير والأحزمة لضرب فريق من الأولاد والبنات وتمزيق مجلات الحائط التي يلصقونها نلاحظ كمية من الغل والحقد على جماعة الأولاد الملتحين بقيادة عبدالسلام فرج ونلاحظ وجود عطا طایل يتفرج مبهوراً والأولاد يهتفون «الله أكبر.. الله أكبر» وهم يضربون زملاءهم ويفرقونهم ويمزقون مجلات الحائط.. ومن الجائز أن يكون موضوع التفريق والتحطيم خاص بفرقة مسرحية على مسرح الجامعة أو حفل أو شيء مشابه.. المهم أن تكون اللقطات سريعة وحادة ومعبرة لأنها تستدعى من خلال ذاكرة عطا طایل.

— — —

## ٦١- قاعة المحكمة - عودة من الفلاش باك

وجه عطا طایل فى لقطة كبيرة وهو يكمل حديثه فى قاعة المحكمة..

عطا: لما اتخرجنا من الجامعة أنا اتعينت فى اسكندرية فى شركة  
بترول وهو اتعين فى جامعة القاهرة.

ويتساءل رئيس النيابة: معيد فى الجامعة؟؟

عطا: لا موظف فى الإدارة الهندسية.

ينظر القاضى إلى كاتب الجلسة الذى يبدو منهمكاً بالكتابة بما يعنى  
أنه يسجل.. ويقول رئيس النيابة..

النيابة: يا أخ عطا هل كنت مع الأخ فرج فى تنظيم الجهاد؟؟

عطا: لا..

النيابة: آمال ليه اختارك أنت بالذات عشان يطلب منك الاشتراك فى  
عملية المنصة؟

عطا: يمكن زيادة ثقة فى.. يمكن عارف إنى بصدقة فى كل حاجة..  
لأن الأخ فرج لكل اللى يعرفه منطقه قوى جداً ومقنع..

- - -

---

## ٦٢- مسجد صغير- فلاش باك

- وجه فرج لقطة قريبة وهو يقول فى حماس وبصوت هادئ..

- أثناء حديث فرج كان العديد من الإخوة جالسون يتابعون كلامه فى شغف بالغ ومعظمهم حديثى السن نرى بينهم عطا طایل.

**فرج:** إن أخطر أنواع الحكام هم أولئك المنافقون الذين يتظاهرون بأنهم يحكمون بما أنزل لله بينما هم فى الحقيقة يحكمون بما يخدم مصالحهم مثل أولئك كمثل التتار حكمهم جاهلية تستغل الإسلام لقهر ديار الإسلام والمسلمين.

إن الفرصة سانحة يا إخوان وباب الجهاد مفتوح ينتظر القادرين على التضحية لإنقاذ بلادهم بالخلاص من الرعوس الفاسدة واعتماد الشريعة الإسلامية قانوناً للحياة.

- - -

## ٦٣- قاعة المحكمة - عودة من الفلاش باك

وجه عطا طایل فی لقطة كبيرة وهو يهمس فی انبهار وابتسامة على ملامحه..

عطا: كان بحرأ لا ضفاف له.. كان قادراً على التأثير فی مستمعيه.

القاضى فی تحديد وحدة: كيف تم تجنيديك؟؟

عطا: بعث لى واحد ماعرفوش قالى إنه عاوزنى ضرورى وأعطانى العنوان..

القاضى: ما قالكش عاوزك ليه..؟

عطا: لأ..

- يتدخل رئيس النيابة قائلاً فى سخرية..

رئيس النيابة: لكن نفذت

- عطا يلتفت إلى رئيس النيابة قائلاً فى تصميم هادئ وابتسامة على وجهه.

عطا: الأخ فرج لو طلب منى أرمى نفسى فى البحر حارمى نفسى..

رئيس النيابة يقول مندهشاً..

رئيس النيابة: من غير ما تفكر؟؟

عطا فى تأكيد..

عطا: مش محتاج أفكر لأننى واثق منه ومن أفكاره لأنها تقريباً هى

نفس أفكارى بس هو ما شاء الله بيصدر يعبر عنها أكثر منى وأفضل منى.

ويتدخل القاضى متسائلاً فى نفاذ صبر..

القاضى: وبعدين يا عطا..

عطا: خدت العنوان ونزلت مصر أدور عليه.

- - -

## ٦٤- شقة فرج..

عدد كبير من طلاقات الرصاص فى لقطة كبيرة وأصابع تعدها وترصها إلى جوار بعضها البعض.. عندما تتراجع الكاميرا نكتشف أن خالد هو الذى يعد الطلاقات ويجنب العدد الذى يريده..

خالد: دول ٨١ طلقة..

يقول ذلك ويبعد الباقي ويقول فرج..

فرج: ما تأخذ كمان احتياطى.

عطا طایل جالس معهم ويبدو عليه عدم الفهم.. ينقل نظراته بينهم..

خالد: أنا عندى ثلاث بنادق آلى كل بندقية الخزنة بتاعتها بتأخذ ٢٧ طلقة.. أى طلقة زيادة ممكن تسبب لى مشكلة.

ويتساءل صالح جاهين الذى يراقب الموقف..

صالح: ناقصك إيه تانى..؟

خالد: ١٩ طلقة للمدفع الرشاش القصير منهم ٤ خارق حارق..

صالح يقدم له كيساً آخر به هذه الطلاقات ويفرغها خالد.. ويرصهم إلى جوار بعضهم..

صالح: أهم.

عبدالناصر الشاب ذو التسعة عشر عاماً يتأمل الطلاقات الخارقة الحارقة ويرصها إلى جوار بعضها..

عبدالناصر: ليه الخارق الحارق ده يا أخ خالد..؟

---

**خالد:** السادات بيلبس قميص واقى من الرصاص يا عبدالناصر .

يهز رأسه فاهماً ثم يتأمل الرصاصات متسائلاً..

**عبدالناصر:** يا ترى أنهى واحدة فى دول هاتسكن فى قلبه..

نسمع صوت عطا يأتى من خارج الكادر وهو يتأمل ما يدور مدهوشاً  
صامتاً..

**صوت عطا:** إنى تعبت على ما لجيت العنوان.. فكرت أرجع أكثر من

مرة لكن حاجة كانت بتدفعنى أدور لغاية ما وصلت لجيت

الأخ فرج ومعه ناس ما عرفهمش ويبجولوا كلام

غريب جوى.

نسمع ضجة على باب الشقة من الخارج ينتبه الجميع فى توتر عندما

يدق الباب ويتسائل خالد..

**خالد:** مين.

ويأتى صوت عبدالحميد من الخارج..

**عبدالحميد:** افتح يا خالد ما فيش حد غريب.

يفتح خالد الباب ويدخل عبدالحميد ومعه حسين ويقول مقدماً إياه

للموجودين..

**عبدالحميد:** الأخ حسين عباس.. من ملوى زيينا يا خالد .

تبدأ عملية السلامة..

ويقول عبدالحميد..

**عبدالحميد:** وعلى فكره هو بقى أب من كام ساعة بس.. ربنا رزقه

بمحمود..

---

يقول خالد وفرج وعطا بدون حماس وهم يتأملون ذلك الشخص الضئيل جداً..

الثلاثة: مبروك..

يقول حسين فى انفعال وتوتر وشىء من الارتباك والتلعثم يسيطر عليه طوال المشهد..

حسين: الله يبارك فيكم يا إخوان.. أنا زى ما أكون فى حلم والله. عطا يراقب ما يدور غير فاهم أى شىء.. ويستمر حسين على توتره.. حسين: من مدة طويلة وأنا باطلب من ربنا يوفجنى أجتل الراجل ده.. الكاميرا تلتقط رد فعل عطا على كلمة القتل..

حسين: لكن إزاي ما عرفش.. وفجأة لجيت أخوى فى الله عبدالحميد بيقولى إن فيه فرصة للاستشهاد فى عملية لقتل السادات؟ الدهشة تتزايد على ملامح عطا طایل الذى ينقل نظراته بين حسين وبين فرج..

حسين: ساعة ما قالى الكلام ده حسيت إن ربنا استجاب لدعائى. فرج يرد على عطا طایل المدهوش..

فرج: عشان كده أنا طلبتك يا أخ عطا فى مهمة استشهادية فى سبيل الله.

عطا: لجتل السادات؟؟

يهز فرج رأسه موافقاً ثم يسأله..

فرج: إيه رأيك؟؟

عطا يصمت تماماً يحنى رأسه قليلاً يغالبه إحساس ودهشة ونسمع صوته من خارج الكادر.

---



---

**صوت عطا:** فجأة.. حسيت إن الظلام اللي كان مسيطر على حياتي كلها انقشع.. مرة واحدة بجت كل حاجة ظاهرة وواضحة وبسيطة وجريئة ممكن ألسها بيدي.

الجميع يرقبون عطا وقد خيم صمت ثقيل على المكان.. يقوم عطا من مكانه وسط انتظارهم وتوترهم وخوفهم إلى فرج ليقبّله بينما صوته محبوس بالانفعال وعيناه تلمعان بالدموع..

**عطا:** بارك الله فيك يا شيخى.. بارك الله فيكم جميعاً.. يا إخوانى.. يسترخى الجميع وتنفرج أساريرهم ويمد عبدالحميد يده..  
**عبدالحميد:** نقرأ الفاتحة يفضل السر بيننا ما يخرجش؟؟  
تمت الأيادى فوق يده.

— • • —

---

## ٦٥- قاعة المحكمة..

القاضى فى لقطة متوسطة يسأل فرج..

**القاضى:** السؤال دلوقت للأخ عبدالسلام فرج.. كيف تم تدبير الأسلحة والذخيرة اللازمة لتنفيذ العملية.

**فرج:** بالنسبة للأسلحة ما كانش فيه مشكلة الأخ خالد قال إنه حايستعمل الأسلحة الموجودة فى الكتيبة.. المشكلة كانت فى الذخيرة وإبر ضرب النار.. الذخيرة كانت متوفرة والحمد لله عندنا. ويقوم ممثل النيابة مستأذناً من المحكمة..

**النيابة:** بعد إذن المحكمة والأسلحة كمان كانت متوفرة عندكم وبكثرة يا أخ فرج موش كده؟.. يفاجأ فرج بالسؤال يصمت قليلاً ثم يقول..  
**فرج:** الحمد لله خير ربنا كثير.

**النيابة:** منين؟؟

**فرج:** المصادر كثيرة.

**النيابة:** أهم هذه المصادر؟

**فرج:** كنا بنشتري..

**النيابة:** بفلوس مين؟؟.. «يفرد ورقة يقرأ منها»: ذكرتم فى التحقيقات أن عندكم مخازن للسلاح والذخيرة فى محافظات كثيرة.. يُقدَّر ثمن المضبوط منها بعشرات الآلاف من الجنيهات.. منين؟؟

يصمت فرج قليلاً ثم يتنهد وهو يقول..

**فرج:** تبرعات الإخوة فى الله كثيره.

**النيابة:** سيدى القاضى.. النيابة هنا لها كلمة يجب أن توضحها

وتضعها أمام عدالتكم وأمام التاريخ عن وسائل تمويل هذه الجماعات  
لعملياتها التخريبية حتى تتضح صورتها الحقيقية.

يقوم محامى خالد مندفعاً..

**دفاع خالد:** الدفاع يعترض فالنيابة تتراجع وهذا ليس أوان مرافعتها..

**النيابة:** النيابة لا تتراجع ولكنها تسأل وتعلق..

**دفاع عبدالحميد:** ما ذكرته النيابة يُعدُّ خروجاً عن موضوع القضية.

**النيابة:** بل هو فى صلبها وسترون.. سيدى الرئيس أرجو أن تتاح

للنيابة فرصة الكلام..

**القاضى:** خلاص يا أساتذة - نسمع من غير مقاطعة.. اتفضل يا أستاذ.

القاضى يشير إلى النيابة لتكمل..

رئيس النيابة يتحدث فى هدوء وتأثر..

**النيابة:** المأل والرجالُ زينةُ التنظيمات التى تعيش تحت الأرض.. ولم

يكن صعباً على تنظيم الجهاد أن يجد الرجال خاصة وعلى

رأسه من هو على شاكلة الأخ عبدالسلام فرج.. زعيماً مفوهاً

تمرّس على تهيج الشباب واستغلال عاطفته الدينية وتوجيهها

لخدمة أغراضه منذ بدايات السبعينيات.. ولم تكن المشكلة

فى الرجال ولكن الشبكة الحقيقية التى واجهت تنظيم الجهاد

كانت فى المال.. الذى هو الوسيلة لشراء الأسلحة والذخيرة

والقنابل والسيارات.. بدون المال لا تنظيم هناك ولا فاعلية..

جربوا التبرعات من الأصدقاء والمتعاطفين وحتى من الناس

فى الشارع.

- مزج إلى -

---

## ٦٦ - أحد ميادين العاصمة المزدهمة..

- وسط زحام العربات فى ميدان رمسيس أو التحرير نسمع صوته..  
ثم نراه وهو يمسك بيده مكروفون ينادى من خلاله..  
الصوت: تبرع يا مؤمن لبناء مسجد الرحمن..  
تبرع يا مؤمن..

شخص ملتحي يرتدى جلباباً أبيض اتسخت ياقته من كثرة اللف فى  
الشوارع يحمل صندوقاً يضع فيه التبرعات ويدس نظراته القاسية فى  
عيون راكبى العربات وهو يهجم عليهم بصندوقه وميكروفونه.. وتمتد  
الأيدى بالنقود.

- مزج إلى -

## ٦٧- قاعة المحكمة..

قاعة المحكمة ورئيس النيابة ما يزال يتحدث..

**النيابة:** بذلوا أقصى ما يستطيعون ولكن الحصيلة لا تكفى خاصة وإذا عرفنا أن ثمن بندقية آلية واحدة لا يقل عن ثلاثة آلاف جنيه فما بالك بالرشاش.. وكانت الفكرة الجهنمية هي الحل.. ولكن.. ما هي هذه الفكرة.. هي استحلال أموال غير المسلمين.. ومحلات الصُّياغ الأقباط تحوى الكثير من الذهب. عندما عُرِضَت الفكرة على قيادات وجه قبلى وافقوا عليها.. ثم عُرِضَت على قيادات القاهرة فرحب بها الأخ عبدالسلام فرج وأستحسنها الأخ عبود الزمر وباركها.

يقوم دفاع عبدالحميد معترضاً..

محامى عبدالحميد: الدفاع يعترض على هذا الكلام المرسل..

يرد عليه ممثل النيابة فى تأثر واضح بعد أن يتنهد فى حرقه..

**النيابة:** ليته كان كذلك يا سيدى.. ولكنها للأسف حقائق مثبتة فى محاضر البوليس والنيابة والتحقيقات وستترك النيابة لعادلة المحكمة ملفاً يثبت هذه القضايا.. بالأسماء والتواريخ..

سيدى الرئيس.. أرجو الأمر بعدم المقاطعة حتى أفرغ من كلمتى..

القاضى: بلاش مقاطعة من الدفاع.. من حقك تعلق بعد النيابة ما تخلص..

القاضى يشير إلى النيابة لتستكمل كلامها بينما المحامون تتقارب

---

رؤوسهم ويتهامسون..

**النيابة:** بعد أخذ الموافقة من الرؤوس الكبيرة توجه اثنان من القياديين مع عبدالسلام فرج إلى الدلنجات لشراء بندقية آلية بمبلغ ٢٧٠٠ جنيه ومسدسين بمبلغ ٦٠٠ جنيه وألف طلقة رصاص.. وكانت العملية الأولى فى نجع حمادى يوم ١٦ يونيو ١٩٨١ .

- مزج إلى -

## ٦٨- إحدى المدن الصغيرة فى محافظة البحيرة..

عربة بيجو فى داخلها عدد من الشبان يقومون بارتداء شرابات نايلون حريمى سوداء على وجوههم ويخفون بها ملامحهم ثم يرتدون جواناتيات فى أيديهم ونلاحظ أنهم يرتدون الجينز والملابس الملونة ومسلحون.

تتوقف العربة أمام محلين للذهب متجاورين.. ينزلون جميعاً ما عدا السائق الذى يبقى فى السيارة مترقباً..

كل اثنين من المسلحين يدخلان محلاً.

- مزج إلى -

## ٦٩- داخل محل الذهب الأول..

أحد المحلين فى داخله أصحابه وبعض المشتريين.. يفاجأ الجميع باثنين من الشباب يدخلان المحل شاهرين سلاحهما.

«كله يرفع إيديه لفوق ويطلع بره».

رد فعل بالرعب على وجوه الموجودين بالمحل وهم يرفعون أيديهم ويحدث تقطيع متوازى بين المحلين.. لقطة كبيرة ليد أحد أصحاب المحلات تمتد ليلتقط سلاحاً أو شئ مشابه.. وعلى إثر هذه الحركة تنفجر الطلقات فى أحد المحلين..

- مزج إلى -

## ٧٠- محل الذهب الثانى بالمدينة الصغيرة بمحافظة البحيرة

فى المحل الآخر يسمعون صوت الطلقات فتنفجر الرصاصات أيضاً كالمنظر رغم عدم وجود مقاومة ولكن بسبب حالة الذعر.

لقطات سريعة وحادة للرصاصات تنهمر وكل شئ يتناثر ويختلط

وتطرطش الدماء على الحوائط.. ربما بالتصوير البطيء فى بعض اللحظات لإظهار مدى بشاعة تلك المذبحة المروعة.. بعد لحظات من بداية المشهد ينسحب الصوت ونسمع صوت النيابة يأتى من خارج الكادر على لقطات للضحايا بالتصوير البطيء..

صوت النيابة: فى هذه المذبحة المروعة قُتل فوزى اسكاروس وجرجس فوزى مسعود وبشير شنودة وسليم محمد على وعبد الحميد أحمد جهلان وأصيب كلاً من بثينة مسعود اسكاروس وأفراح محمد على.

- مزج إلى -

## ٧١- قاعة المحكمة

ممثّل النيابة فى لقطة كبيرة يقول فى أسى..

النيابة: استشهد خمسة مواطنين أبرياء وأصيب اثنان لا ذنب لهم سوى أن أربعة منهم يملكون الذهب الذى سوف يتحول إلى مال بحتاحه التنظيم.. الهدف نبيل والتضحية بأرواح الأبرياء واحة «بسحر فر مرادة».

وتتعدد السرقات.. فالعمية سهلة وحصيلتها وفيرة حتى جاء يوم ٣١ يوليو ١٩٨١ وكان ذلك اليوم هو اليوم الأخير من شهر رمضان المعظم.

- مزج إلى -



## ٧٢- إحدى العمارات الصغيرة..

لقطة كبيرة لمُدفع الإفطار وهو يدوي مطلقاً مقذوفه..

الشوارع خالية من المارة لحظة انطلاق مُدفع الإفطار بينما نسمع صوت الشيخ سيد النقشبندى يصدح بالابتهالات من خلال أجهزة الراديو فى المنازل.

تدخل الكادر عربة داتسون يسير خلفها موتوسيكل يركبه اثنان للتغطية.. فى داخل العربة وعلى الموتوسيكل الجميع يضعون الشرابات السوداء الحريمى ويمسكون سلاحهم.

وتتوقف العربة والموتوسيكل أمام محل مجوهرات معلق عليه لافتة «مجوهرات روما» ينزل ركاب العربة اثنان بالرشاشات يدخلان المحل واثنان يراقبان فى الخارج وراكبو الموتوسيكل يؤمنان المنطقة.

— — —

---

## ٧٣- داخل محل مجوهرات..

داخل محل روما للمجوهرات هناك صاحبتة وطفلتها تعطيها باكو بسكويت فى كوب لبن وتطعمها وهناك مساعد يرتب المعروضات، وفى لحظة يقتحم المكان حاملو الرشاشات ويقول أحدهم..

**أحدهم:** كله يثبت مطرحة ما حدش يتحرك..

ونكن المساعد يهم بوضع المعروضات والمرأة تصرخ ممسكة بابنتها فى نفس اللحظة التى تنهمر فيها الرصاصات وتطرطش الدماء على الحوائط.

==

## ٧٤- الشارع فى المدينة الصغيرة - غروب خارجى..

خارج المحل وبعض الناس يلفت نظرهم صوت الرصاص يحاولون الاقتراب من المكان ولكن الإثنان اواقفان بالخارج يطلقان الرصاص على السماء.. فيهرب الجميع.

==

---

## ٧٥- داخل محل المجوهرات..

داخل المحل القتلَى ينزفون والحقيبة تمتلئ بالمجوهرات.. يدخل صوت رئيس النيابة..

**صوت النيابة:** كانت الحصيلة هذه المرة أكثر من اثنين ونصف من الكيلوجرامات مشغولات ذهبية.

- - -

## ٧٦- قاعة المحكمة..

رئيس النيابة فى المحكمة يكمل كلامه فى أسى وحزن..

**النيابة:** وعدد من الأرواح البريئة لا قيمة لها فى سبيل الهدف الذى يسعى إليه قادة هذا التنظيم الشيطانى وهو الاستيلاء على الحكم لتحويل البلاد إلى غابة يرتعون فيها.

وينفعل فرج صارخاً..

فرج: هذا تدليس.

**النيابة:** ليته كان كذلك أيها الزعيم الطامح والطامع فى السلطة والحكم ولكنه للأسف ليس كذلك.. فباسم الجهاد فى سبيل الإسلام الذى هو برىء منكم انطلقتم تعيشون فى الأرض فساداً وإفساداً... سرقة.. قتل.. ترويع للآمنين.. وإذا كان مبرر السرقة هو إقامة الدولة الإسلامية المزعومة فإنه لم يكن هناك أى مبرر لأن تذهب المسروقات أو قطع منها لشقيقة رئيس التنظيم السيدة نبيلة عبدالسلام فرج.

يسود الصمت تماماً للحظات ثم يندفع فرج صارخاً.

فرج: كذب وافتراء وتلفيق..

يبتسم ممثل النيابة فى أس وهو يقول:..

**النيابة:** ستودع النيابة ملفاً يحوى محضر ضبط وتحقيق من المباحث الجنائية التى ضبطت عند السيدة المذكورة شقيقة الأخ فرج ما وزنه ٥١,٥ جرام من المسروقات الذهبية و٢٨,٧ جرام

---

لدى زوجة الأخ فى الله أيضاً عصمت رمضان.

سىدى الرئيس.. هل هناك شىء يُقال بعد هذا عن أهداف نبيلة  
ومجتمع منشود تسعى هذه الفئات الضالة المضلة لإقامته.. شكراً سىدى  
الرئيس وأعتذر عن الإطالة..

— • —

## ٧٧- شقة متوسطة المستوى

### « شقة ممدوح أبو جبل »

باب شقة يفتح يطل منه وجه شاب فى السابعة والعشرين من عمره تزوغ نظراته ويرتبك عندما يرى صالح جاهين ومعه خالد الإسلامبولى.. يفتح الباب ويدخلان ويقول الشاب فى خوف بالغ..

**ممدوح:** إيه اللى جابكم لغاية هنا؟

- ويقول صالح جاهين فى نبرة لوم..

**صالح:** لأنك ما جيتش إمبراح قدام رابعة العدوية حسب الميعاد.

- يقول ممدوح فى ارتباك وهو خائف..

**ممدوح:** أنا أصلى كان عندى.. ظروف.. و.. لسه ما دبرتش المطلوب.

**خالد:** الوقت بيعدى يا أخ ممدوح النهارده ٢٩ والعرض بعد أسبوع.

**ممدوح:** عدُّوا على بكره زى دلوقتى هاتلاقوا المطلوب.

ويقول خالد مؤكداً...

**خالد:** ثلاث إبر ضرب نار وتلات خزن لبندقية آلى وخزنة للرشاش القصير..

**ممدوح:** ربنا يسهل..

**صالح:** الأخ فرج عايز ميت جنيه.

ينبش ممدوح فى جيوبه فلا يجد سوى خمسون جنيهاً يعطيها له..

---

ممدوح: كل اللي معايا خمسين جنيه.. أهم..

- صالح يضربها فى جيبه وهو يقوله له بنبرة فيها تهديد..

صالح: لو الحاجة المطلوبة ما جتش بكره الأخ فرج هايضل.. وأنت عارف زعل فرج.. سلام.

يخرج صالح جاهين وخالد الإسلامبولى ويغلق ممدوح أبو جبل الباب وراءهما ويستند على الباب بظهره.. وهو يتنفس الصعداء..

- الكاميرا تقترب من وجه ممدوح أبو جبل حتى لقطة كبيرة وهو يتذكر مرعوباً.

- - -

## ٧٨ - مكان عام - فلاش باك

- لقطة كبيرة لوجه فرج وهو يقول بصوت خافت ينذر بالشر..

فرج: فهمت دورك يا أبو جبل..

تتراجع الكاميرا لنرى خالد وفرج وممدوح أبو جبل وعبدالناصر دره ويقول ممدوح متردداً زائغ النظرات..

ممدوح: أيوه يا جماعة.. بس أنا وضعي حساس..

لقطة كبيرة لفرج وهو ينظر إليه نظرة صاعقة وفيها تهديد واضح..

فرج: يعنى إيه.. هاتسحب..؟

يزداد ارتباك أبو جبل وهو يجفف عرقه..

ممدوح: لأ.. ما قصدش.. لكن.. ربنا يسهل.. ربنا يعمل اللي فيه الخير.

ويقول فرج بصوت متحشرج ومنذر..

فرج: بكره الأخ عبدالناصر دُرّة هيسستاك قدام مسجد رابعة العدوية الساعة أربعة بالضبط ما تتأخرش عليه..

==



---

## ٧٩- شقة ممدوح أبو جبل-

### عودة من الفلاش باك

وجه ممدوح والعرق والتوتر يسيطران عليه وهو ما يزال يسند ظهره على باب شقته المغلق وإحساس عميق بالخوف يسيطر عليه.. ينظر فى اتجاه التليفون..

لقطة كبيرة لجهاز التليفون.. ويتجه ممدوح إليه متردداً.. يرفع السماعة ثم يرزعها فى مكانها ويجلس شارد النظرات بينما يدخل صوت رئيس النيابة فى المشهد التالى..

**صوت النيابة:** المقدم ممدوح أبو جبل تقدمه النيابة كشاهد إثبات فى القضية..

==

## ٨٠- قاعة المحكمة..

لقطة كبيرة لوجه الدفاع محامى خالد فى المحكمة وهو يقف معترضاً..

**محامى خالد:** الدفاع يعترض على تقديم السيد ممدوح أبو جبل كشاهد إثبات فهو عضو فى تنظيم الجهاد وعضو مشارك بدليل تقديمه إبر ضرب النار وخزن البنادق والرشاش للمتهمين.

**النيابة:** أبو جبل قدم تقريراً للنيابة عن الجريمة وأطرافها فاعتبرناه شاهداً..

**محامى خالد:** متى قدم هذا التقرير..

**النيابة:** اليوم..

**محامى خالد:** واليوم هو ٢١ أكتوبر ١٩٨١ كيف يقدم المتهم تقريراً بتاريخ ٢١ أكتوبر عن جريمة ارتكبت بالفعل يوم ٦ أكتوبر أين كان طوال هذه المدة ولماذا لم يقدم تقريره قبل وقوع الجريمة.. حتى يمنع وقوعها..

يقول رئيس النيابة فى لهجة حادة ونهائية..

**النيابة:** هذا الشاهد شاهد نيابة وقد حلف اليمين بهذه الصفة ولا بد من معاملته على هذا النحو.

**محامى خالد:** الدفاع يعترض على تقديمه كشاهد ويطلب اعتباره متهماً.

**القاضى:** فى استجوابك للشاهد قول اللى أنت عاوزه..

---

**الدفاع:** هو ليس شاهداً يا سيدى.. وأرجو تسجيل اعتراض الدفاع على هذه الصفة..

القاضى يشير إلى كاتب الجلسة أن يسجّل ثم يقول ناظراً ناحية النيابة..

**القاضى:** النيابة تتفضل.

النيابة تتوجه إلى الشاهد بالسؤال..

**النيابة:** متى بدأت التزامك الدينى يا أخ ممدوح؟

**أبو جبل:** من زمان.. من بداية السبعينيات..

**النيابة:** كنت تعرف أى من المتهمين فى الوقت ده..

**أبو جبل:** لأ.. أنا التزمت من نفسى وبعيد عن أى حد ومن سنة ١٩٧٧ بدأت أواظب على خطب الدعاة..

**النيابة:** زى مين؟

**أبو جبل:** الشيخ كشك والشيخ المحلاوى وطه السماوى وغيرهم..

**النيابة:** إمتى اتعرفت على مجموعة الجهاد؟

يتذكر أبو جبل ثم يقول..

**أبو جبل:** فى مارس ٨١ التقيت بالأخ عطا طایل لما كان فى الجيش فى مسجد الوحدة.. استريحت له واطمأنينا لبعض.

**النيابة:** من ناحية إيه؟

**أبو جبل:** من ناحية الالتزام الدينى يعنى.. وقالى أنه له صاحب مُتَّفَقْهُ فى الدين عرفنى عليه.. اللى هو الأخ عبدالسلام فرج.. عرفنى عليه وأنا بقيت أقابله بعد كده لوحدى..

---

فهمنى الأخ فرج إنه مشارك مع ناس وهايعملوا ثورة شعبية  
على أساس تبقى ثورة إسلامية..

النيابة: هل ضمك للمجموعة بتاعته..؟

أبو جبل: يعنى.. تقريباً.

النيابة: يعنى إيه تقريباً حدد كلامك..

أبو جبل: أنا اتحمست لفكرة الثورة الإسلامية الشعبية.. ولما قالى  
أنهم ممكن يحتاجوا أسلحة وذخائر أنا قلت طيب.. لكن  
بصراحة ما كنتش مقدر الموقف صح.

النيابة: يعنى إيه ما كنتش مقدر الموقف صح؟.. إشرح لهيئة المحكمة.

أبو جبل: الأخ فرج بالنسبة لى كان بحر معلومات.. وأنا كنت عاوز  
أعرف.. لما فاتحنى فى حكاية الأسلحة.. ما قلهاش من أول  
مرة ولا من تانى مرة.. ما فاتحنيش فى حكاية الأسلحة دى  
إلا يوم ما قرروا يقوموا بالاغتيال.. وأنا ما كنتش موافقه  
على الاغتيال..

النيابة: لكن أعطيتهم إبر ضرب النار..

أبو جبل: مانا كنت بدأت أخاف منهم على نفسى وعلى أسرتى عشان  
كده بدأت أفكر فى خطة مضادة تحبط خطتهم..

النيابة: عملت إيه..؟

أبو جبل: جبت لهم إبر ضرب نار من الكهنة وموش موافقة للبنادق  
بتاعتهم عشان يروحوا يضربوا تقوم ما تضربش.. وغير كده  
حاولت أتأخر بالإبر لغاية آخر لحظة عشان أحبط العملية.

النيابة: لماذا تصورت إن خالد موش حاينتبه لإبر ضرب النار البايضة.

---

أبو جيل: لأن النقطة دى ما يفهمهاش إلا خبير أسلحة.

النيابة: لكن خالد ظابط..

أبو جيل: بس موش خبير أسلحة..

النيابة: النيابة تكتفى بهذا القدر.. شكراً سيدى القاضى..

يجلس رئيس النيابة بينما القاضى يشير إلى الدفاع.. قائلاً:

القاضى: الشاهد للدفاع.

يقوم محامى خالد ويتجه إلى الشاهد بالسؤال..

محامى خالد: يا أخ ممدوح.. هل أنت عضو بتنظيم الجهاد..

أبو جيل: كنت.. لغاية قبل الاغتيال لأنى ما وافقتش عليه..

محامى خالد: لماذا أعطيت للأخ صالح جاهين ٥٠ جنيه يعطيها لفرج.

أبو جيل: مسaire له..

محامى خالد: ليه ما قتلوش إنك موش موافق.

أبو جيل: كنت فاكرك إنى أقدر أحبط خطتهم فى آخر لحظة.

محامى خالد: طب ليه ما بلغتس عنهم..؟

أبو جيل: خفت على نفسى وعلى أسرتى.

محامى خالد: خفت من إيه بالظبط..

أبو جيل: معروف عنهم العنف..

محامى عبد الحميد: ولكنك أبلغت عنهم حسب كلام النيابة النهارده

يوم ٢١/١٠/١٩٨١ يعنى بعد الواقعة ما

حصلت بـ ٢٥ يوم كاملين.. ليه..؟

---

أبو جبل: خطأ منى.

محامى عبدالحميد: من يوم ٦ أكتوبر تاريخ الحادث لغاية النهارده كنت فين..

أبو جبل: لا رد..

محامى عبدالحميد: إنت بتشتغل إيه دلوقت..

أبو جبل: أنا.. ظابط فى القوات المسلحة..

محامى عبدالحميد: لغاية دلوقتى؟

أبو جبل: لا رد..

ويقوم محامى ثالث متسائلاً..

المحامى: وأنت ظابط فى القوات المسلحة ما خفتش من فتح بيتك للجماعات الإسلامية حتى بعد أن هدد الرئيس الراحل هذه الجماعات وقال إن تحركاتهم مرصودة.

- أبو جبل صامت تماماً ولا يرد..

المحامى: ما خفتش إذا ما بلغتش عن واقعة الاغتيال أن التنظيم ينضبط وتبقى شريك فيه..

أبو جبل: لا يرد..

محامى خالد: ما مدى هيمنة عبدالسلام فرج عليك..

أبو جبل: أنا كنت معجب بأفكاره فى حكاية الثورة الشعبية الإسلامية..

محامى خالد: إنت فين دلوقتى..

أبو جبل: أنا.. هنا.. فى المحكمة العسكرية العليا..

---

**محامى خالد:** قبل ما تيجى المحكمة كنت فين.. الإخوة اللى جابوك النهارده جابوك منين.

**أبو جبل:** لا يرد وقد زاغت نضراته وهو ينظر ناحية النيابة..

**محامى خالد:** من بيتك ولا من مكان تانى..

**أبو جبل:** لا يرد..

**محامى خالد:** الدفاع يصير على إجابة هذا السؤال بعد إذن المحكمة.

ويتدخل القاضى موجهاً كلامه إلى أبو جبل..

**القاضى:** ما تقول إنت جاي منين يا أخ أبو جبل..

ويندفع ممثل النيابة صائحاً..

**النيابة:** النيابة تحتج.. الدفاع يحاول أن يثبت أموراً خارج نطاق هذه الدعوى..

- يقول القاضى فى استغراب.. لماذا ترفض النيابة إجابة السؤال؟

**النيابة:** الحقيقة أن الشاهد متحفظ عليه فى مكان أمين لحمايته..

يثور اللفظ فى المحكمة ويتدخل القاضى بقادومه ليعيد الهدوء إلى

القاعة ويقول أبو جبل وهو زائغ النظرات..

**أبو جبل:** أنا متحفظ على لدواعى الأمن ولست مسجوناً.. وأنا معزز

مكرم وأقصد بدواعى الأمن الخاص بشخصى.

يبتسم محامى خالد قائلاً..

**محامى خالد:** الشاهد لم يعترف بوضعه تحت التحفظ إلا بعد أن

أشارت النيابة إلى ذلك.. والدفاع يتمسك بإثبات هذه

النقطة لتبيان مدى صدق الشاهد من عدمه..

يقوم محامى عبدالحميد ليسأل الشاهد..

م. عبد الحميد: وانت متحفظ عليك يا أخ أبو جبل هل يصلك مرتبك؟؟

- يفاعاً أبو جبل للحظة.. ثم يقول بعد أن يتحنج.

أبو جبل: نعم..

م. عبد الحميد: وهل يصل لكل المحبوسين معاك مرتباتهم..

النيابة تعترض مقاطعة الدفاع..

النيابة: النيابة تعترض على هذا السؤال فالشاهد ليس محبوساً..

المحامى: هل أسرتك تزورك حالياً..

أبو جبل: نعم.. لا.. لا..

يصل أبو جبل إلى مشارف الانهيار ولكنه يتمالك نفسه بصعوبة..  
ويتدخل صوت خالد منادياً من القفص..

خالد: يا جماعة كفاية حرام عليكم.. الأخ أبو جبل أخ فى الجهاد  
واحنا أدري بظروفه.

يقف ممثل النيابة فجأة ليسأل الشاهد..

النيابة: يا أخ ممدوح هل تشكو أى شكوى وهل أنت صاحب الحرية  
فيما يتعلق بحالتك الآن؟؟

أبو جبل: الحمد لله لا ينقصنى شىء ويصلنى مرتبى وأرى أهلى..

النيابة: شكراً سيدى الرئيس.

القاضى: الدفاع عاوز يقول حاجته تانى..؟؟

محامى خالد: أرجو إثبات التناقض فى أقوال الشاهد وأطرح  
التساؤل.. لماذا تصر النيابة على تقديمه كشاهد



---

بينما هو ضالع فى الجريمة.. وما معنى ذلك..

بصوت مرتفع يقول عبدالحميد..

**عبدالحميد:** إحنا صايمين والمغرب قرب يدن هاتفطرونا هنا ولا  
هترجعونا اللومان عشان نفطر هناك. ٩.٩.

ينظر القاضى إلى عضو اليمين متسائلاً..

**القاضى:** هو النهارده إيه..؟

**عضوا اليمين:** النهارده الخميس.. الظاهر بيصوموا اثنين وخميس..

يقف القاضى وهو يقول..

**القاضى:** رُفِعَتَ الجلسة على أن يستأنف انعقادها غداً..

وتتعالى الأصوات..

**الأصوات:** بكره الجمعة.. كمان يوم الجمعة.. ٩٩.

ولكن القاضى يخرج فيسود الهرج القاعة..

— — —

## ٨١- مادة تسجيلية..

لقطة عامة لموكب الرئيس السادات.. وينزل عنوان جانبى وتاريخ ٣ أكتوبر ١٩٨١ - مدينة السلام ضجة إعلامية وهتافات وناس كثيرون يهتفون ويلوحون «بالروح.. بالدم.. نفديك يا سادات..» الموكب يسير وسط شوارع المدينة الجديدة.. «مادة تسجيلية».

- - -

## ٨٢- أمام المنصة..

عربة عبدالحميد الفيات ١٢٤ وفى داخلها عبدالحميد - خالد - حسين - عطا.. يتوقف عبدالحميد بالعربة أمام المنصة.. ينزل الجميع من العربة يتأملون المنصة الخالية وخالد يقوم بالشرح..

خالد: العربية.. هاتقف هنا.. على بعد عشرين متر من المنصة تقريباً.. عبدالحميد وعطا كل واحد معاه قبلة يدويه.. وأنا معايا اثنين.. ساعة العربية بتاعتى ما تقف هاتبقى دى ساعة الصفر بالنسبة للجميع.. أنا هنزل وارمى القبلة.. كذلك عبدالحميد وعطا لازم نعمل ساتر دخان وربكة فى نفس اللحظة اللى حسين بيضرب من فوق أول دفعة.. فين يا حسين.

- يشير حسين إلى رقبته وهو يقول..

حسين: فى رقبته..

ينسحب صوت خالد وتبقى لصورة وهو يشير من غير صوت ويدخل صوت السادات من خارج الكادر فى المشهد التالى..

صوت السادات: وأنا الآن بسبيلنا لجنى ثمار المعاناة التى عاينها..

- - -

---

## ٨٣- مادة تسجيلية..

وجه السادات فى لقطة كبيرة وهو يتحدث فى مدينة السلام وسط الحشود.. «مادة تسجيلية»

هتافات وتهليلات وتصفيق

السادات: كان مفروضاً أن تكون السنة الماضية سنة ٨٠ هى السنة التى نبدأ فيها جنى هذه الثمار بل السنة التى نصل فيها إلى مرحلة الإنطلاق ولكن سامحهم الله الإخوة العرب لم يستطيعوا أن يوفوا لا بوعدهم ولا بتقدير ما أوفته مصر من أجلهم..

- - -

## ٨٤- القاهرة.. مصر الجديدة..

لقطة عامة لمدينة القاهرة فى الصباح الباكر «منطقة مصر الجديدة» وينزل تاريخ ١ أكتوبر سنة ١٩٨١ بينما نسمع أصوات أجراس الكنائس فالיום هو الأحد.

على محطة الأتوبيس يقف خالد وقد ارتدى ملابس العسكرية فى انتظار الأتوبيس الذى سوف يقله.. يصل الأتوبيس فيركبه.. ويتحرك الأتوبيس منطلقاً.

- - -

## ٨٥- داخل الأتوبيس..

داخل الأتوبيس وخالد يقف فى الدرجة الأولى ناظراً من نافذة الأتوبيس.. يتوقف الأتوبيس عند تقاطع طرق ليعبر طابور من الأطفال يرتدون ملابس الراهبات يقودهم راهب.. خالد يتطلع إليهم باسماء فشكلهم جميل ومنظم يتنهد خالد وينظر إلى جريدة منشورة فى يد راكب مانشيت الجريدة يقول.. «السادات: بدأنا عصر الإنجاز» وأخبار عن زيارته للنوبارية..

- شحاذة بذراع واحدة تشحذ من الركاب.. تقترب من خالد الذى يخرج ما معه من نقود وهى قليلة ويعطيها لها.. الشحاذة تدعو له بطول البقاء..

**الشحاذة:** ربنا يديك طولة العمر ويسترها معاك أنت واللى زيك يا بنى قادر يا كريم..

يبتسم خالد لدعوتها..

الأتوبيس من الخارج وهو يتوقف على المحطة وينزل منه خالد..

- - -

---

## ٨٦- مادة تسجيلية..

الرئيس السادات وهو يفتح مشروع النوبارية للشباب.. ويتحدث عن هذا المشروع على اعتبار أنه ثورة زراعية جديدة تثبت قدرة الإنسان المصرى على صنع المعجزات..

ينسحب الصوت من المشهد وتثبت الصورة حيث الرئيس يتحدث بلا صوت وال جماهير تصفق (مادة تسجيلية).. ونسمع صوت المعلق من خارج الكادر يقول..

**صوت المعلق:** إن حركة الرئيس خلال هذه الفترة كانت لا تتوقف ولا تهدأ وخاصة فيما يتعلق بمشروعات الشباب وبالرخاء القادم لا محالة.. لقد بدا أنه يصارع قدراً رهيباً بدأ يشعر بدبيب خطواته ترحف حثيثاً.. وتقترب ثقيلةً ومؤكده..

- - -

## ٨٧- ميدان العباسية..

أحد الميادين العامة المزدهمة فى موقف للأتوبيسات.. شخص ما غير محدد الملامح يقترب من خالد الاسلامبولى الذى يقف منتظراً وسط زحام الناس.. الشخص يقترب منه.. يحتك به للحظة خاطفة ثم يتركه مبتعداً عنه مخلفاً مظلوماً أصفر فى يد خالد.. خالد يأخذ المظروف ويتجه إلى أحد الأتوبيسات الواقفة.. ويركبه ويفيب بداخله..

- - -

---

## ٨٨ - شقة عبدالحميد..

المظروف الأصفر وهو يفتح وتخرج منه بعض البطاقات وخطاب..  
تراجع الكاميرا لنرى خالد هو الذى يفتح المظروف ويستخرج منه  
البطاقات ذات الصور..

خالد: كل حاجه رسمى ميه الميه.. وادى جواب الالتحاق مختوم بختم  
النسر..

حول خالد يوجد عبدالحميد وعطا وحسين.. ويبدأ خالد فى توزيع  
البطاقات وكل واحد يقرأ اسمه الجديد..

خالد: عبدالحميد..

- عبدالحميد يقرأ بطاقة..

عبدالحميد: عزت..

خالد: عطا..

عطا: أحمد..

خالد: حسين..

حسين: جمال..

يقول خالد فى جدية بالغة وإحساس بالخطورة يسيطر على المكان..

خالد: نحفظ الأسماء دى كويس قوى من دلوقتى لغاية بالليل..

ويتسائل عطا..

---

عطا: إحنا هانروح الكتيبة الليلة؟؟

خالد: بإذن الله ..

عبد الحميد: طب أنا الأفول اللي عندي ما ينفعش

خالد: أنا عامل حسابي عندنا ترزى ممتاز هيقف لك أفول هناك ..

يسود صمت ثقيل .. يقول خالد بعد لحظة وهو ينظر فى ساعة يده ..

خالد: الساعة دلوقتى خمسة ونص .. ما حدش عاوز يزور قرايبه؟؟

عطا: أنا زرتهم إمبراح ..

حسين: وأنا .. جاى من هناك لسه ..

خالد: كتبتم الوصايا بتاعتكم ..

عطا: أنا كتبتها وسلمتها للأخ فرج بييجى بيعتها لأهلى ..

حسين: وأنا وصيتى هاتوصل لزوجتى يوم العرض ..

الجو ثقيل وجاثم يحاول عبد الحميد الخروج منه وإخراج المجموعة

كذلك يقول:

عبد الحميد: وأنا عندي بطة هنا بلدى إنما إيه .. على رأى الحاجة ..

عتيقة ..

يذهب إلى الشلاجة ويفتحها ويستخرج من الفريزر بطة مثلجة

ومذبوحة ومنظفة وكبيرة الحجم.

خالد: ما فيش وقت يا عبد الحميد إحنا المفروض نمشى من هنا

ثمانية بالليل.

عبد الحميد: حلة الضغط ممكن تسويها فى ربع ساعة.

---

ويقول حسين فى أسى: مين اللى له نفس ياكل؟؟ ويقول عبدالحميد  
مازحاً..

عبدالحميد: أنا لى نفس وعطا طايلى.. صح يا عطا.  
عطا مازحاً هو الآخر..

عطا: فى حالة البط لا يمكن الواحد نفسه تنسد يا عبدالحميد  
وخصوصاً إنه جايز يكون آخر أكل ملكى نكله..  
ويعلق حسين قائلاً وهو يتهد..

حسين: ويمكن ميرى كمان..  
يعود الصمت جاثماً وثقيلاً وخانقاً ويقول خالد بعد لحظة..  
خالد: ياخوانا.. لو فيه حد متردد يقول.. إحنا لسه على البر..  
ويهمسون معاً بكلام غير مفهوم..  
ويتجه خالد إلى حسين..

خالد: ابنك أخباره إيه يا حسين؟  
يبتسم حسين وهو نادراً ما يفعل..  
حسين: حلو.. طالع شبهى الخالنج الناطج سبحانه الله..  
عبدالحميد مازحاً يحاول تخفيف الكآبة المسيطرة..  
عبدالحميد: ما بيقاش حلو لو شبهك يا حسين..  
حسين مستمر فى ابتسامته..

حسين: ياخى حتى الكالو فى صباع رجلى الكبير.. عنده واحد زيه..  
تصدق؟!



---

ويعلق عطا ضاحكاً..

**عطا:** هو لحج يلبس جزمه عشان يطلع له كالوا يا سحس؟  
يضحكون ثلاثتهم ويريت عليه خالد متعاطفاً وهامساً بصوت خافت..  
**خالد:** ما تفكر يا حسين..

حسين يقاطعه منفعلاً وبصوت مرتفع..

**حسين:** أرجوك يا أخ خالد ما تكملش.. أنا فكرت خلاص..  
يتردد آذان المغرب فى الخارج.. ويقول عبدالحميد وهو يتجه بالبطة  
ناحية المطبخ..

**عبدالحميد:** على ما نصلى المغرب تكون البطة استوت.. يلا اللى  
موش متوضى.. يتوضا..

— • • —

## ٨٩- شقة عبدالسلام فرج « عيادة أسنان بها مكان لنوم فرج ».

حقيبة سامسونايت تُرص فيها أربع قنابل يدوية.. كيس به الرصاصات ال ٨١ آخر به رصاصات الرشاش ال ١٩ .. كيس صغير به إبر ضرب النار.. عدد ٣ خزن فارغة.

عندما تتراجع الكاميرا نكتشف أن عبدالسلام فرج وعبدالناصر دره يساعدان خالد على رص هذه الأشياء داخل الحقيبة.. ويتساءل فرج..

**فرج:** ناقص حاجة؟

**خالد:** لأ.. كله تمام..

ينظر خالد إلى ساعة يده وهو يفلق الحقيبة.. ثم يقول..

**خالد:** يادوب أنزل.. عبدالحميد منتظرني بالعربية قدام الميرلاند..

فرج في تأثر يحتضنه مودعاً..

**فرج:** ربنا يوفقكم..

عبدالناصر والدموع تفر من عينيه..

**عبدالناصر:** مع السلامه يا بطل..

خالد يهرب من هذه المشاعر الثقيلة ويسارع بالخروج..

أثناء حركة الكاميرا وتحرك الشخصيات نكتشف أن المكان عبارة عن عيادة أسنان أعد بها مكان لنوم فرج..

## ٩٠- شوارع مصر الجديدة- معسكر التجمع.

شوارع مصر الجديد وعربة عبدالحميد تسير وسط العربات وفى داخلها خالد وعبدالحميد وعطا وحسين تتوقف فى إحدى الإشارات إلى جوارها عربة شرطة عسكرية.. خالد الذى يقود ينظر إلى ضابط الشرطة العسكرية محيياً ويرد عليه ضابط الشرطة العسكرية التحية.. خالد ينظر إلى رفاقه مازحاً..

خالد: إيه رأيكم أقول له إنكم رايعين تقتلوا السادات.

عطا: حايقول عليك مجنون.

تفتح الإشارة وتتحرك العربات قريباً من المعسكر يتوقف خالد بالعربة ويشير إلى المعسكر.. «معسكر تجمع القوات المشاركة فى طابور العرض.

خالد: المعسكر هناك أهه.. جواب الإلحاق معاك يا عبدالحميد..؟؟

عبدالحميد مصححاً له فى جدية..

عبدالحميد: عزت يا فندم..

خالد: برافو.. والبطايق معاكم طبعاً.. ما تقدموش جواب الإلحاق إلا إذا انطلب منكم.. وأول ما تدخلوا الكتبية أسألوا على الضابط خالد أحمد شوقى.. بلاش الإسلامبولى.. ما تتكلموش مع العساكر لغاية ما جيلكم.. أنا موش هاتأخر..

ينزل الثلاثة ويتجهون إلى المعسكر بينما خالد يخرج من العربة ويراقب الموقف عن كثب.. الثلاثة يقتربون من بوابة المعسكر حيث يوقفهم جندى

---

الشرطة العسكرية القلق والتوتر على وجه خالد .

الجندي يتسلم خطاب الإلحاق من عبدالحميد ويتأمله .. الضابط  
الذي يجلس قريباً من البوابة يشير بيده إلى الجندي الذي يذهب إليه  
ويسلمه الخطاب .. والضابط يقرأ الخطاب ..

- خالد يزداد توتره وهو يراقب من مكمنه ..

الضابط يطلب الكارنيهات من الثلاثة والثلاثة يتقدمون منه ويعطونه  
الكارنيهات ..

- - -

## ٩١- قاعة المحكمة

وجه القاضى يبرز من الكادر متسائلاً..

**القاضى:** من الذى زور خطاب الإلحاق يا خالد؟

يقول خالد فى غموض..

**خالد:** الإخوة فى الله كثير.

يقوم محامى خالد طالباً الكلمة..

**محامى خالد:** أرجو إثبات أن خطاب الإلحاق مختوم بشعار

الجمهورية وكذلك الكارنيهات وأن هذا الخاتم لا

يوجد إلا فى أماكن محددة جداً وليس من السهل

الوصول إليها..

ويتساءل القاضى..

**القاضى:** عاوز توصل لإيه بالضبط؟

**محامى خالد:** أنا فقط أثير سؤالاً.. كيف وصل خالد ورفاقه إلى

المكان الذى به خاتم شعار الجمهورية.. ومن ساعدهم على ذلك.. وهذا

السؤال مع غيره من الأسئلة ستشكل الأعمدة

الأساسية لدفاعى الذى سأقدمه فى حينه.

— — —

## ٩٢- معسكر التجمع بمدينة نصر

ضابط الشرطة العسكرية بالمعسكر يعيد الأوراق والكارنيهات إلى عبد الحميد ويدخل الثلاثة أرض المعسكر..

خالد يتنهد فى راحة ويفتح شنطة العربية ويخرج الغطاء القماشى ويبدأ فى تغطيه العربيه.

-...-

## ٩٣- داخل معسكر التجمع بمدينة نصر..

فى المعسكر.. حسين وعطا وعبد الحميد وهم يجلسون إلى جوار خيمة خالد يدخلون السجائر ويتهايمسون.. يأتى خالد حاملاً حقيبة السامسونايت المعبأة بالمتفجرات ويؤدى له الجندى التحية وهو يقول له..

**الجندى:** الثلاثة الملحقين من اللوا ١٨٨ وصلوا سيادتكم..

يقول خالد ساخراً وبصوت مرتفع..

**خالد:** لسه بيفتكروا؟ فين هم؟

- الجندى يشير إلى عبد الحميد وعطا وحسين..

**الجندى:** هناك أهم يا فندم..

خالد يصرخ فيهم موبخاً بشدة..

**خالد:** انتباه يا عسكري إنت وهو.

يقوم الثلاثة انتباه ويؤدون التحية.. يهمس الجندى صبحى لخالد..

**الجندى صبحى:** بيقولوا يا فندم إنهم مخابرات..

**خالد:** مين اللى بيقولوا..

---

الجندي صبحي: العساكر.

خالد: جايـز.. أقف يا عسكري إنت وهو عدل.. إيه اللي أخركم كده؟!

كان مفروض تتضموا للكتيبة من امبارح.

عبدالحميد: ما بلغوناش إلا النهارده يا فندم..

خالد: انت إيه الأفرول العرّة اللي لابسه ده..

يا عسكري صبحي..

صبحي: أيوه يا فندم..

خالد: خد مقاس الأفندي ده وشوفله أفرول يطلع به العرض وقيفه

على مقاسه..

صبحي: حاضر يا فندم..

خالد: شوف لهم حد يحلق لهم شعرهم بلاش بوظان..

صبحي: حاضر يا فندم..

خالد ينظر إلى حسين ملياً.. ثم يسأل..

خالد: اسمك إيه يا عسكري..

حسين: جمال يا فندم..

خالد: شكلك كده مش مريحني.. إنت ما بتاكلش ياله..

حسين: باكل سيادتك يا فندم..

خالد: إنت هاتشتغل المراسلة بتاعى عشان أغذيك شويه.. انصرف

يا بنى آدم إنت وهو..

يؤدون التحية ويتحركون وينادي خالد لحسين..

---

خالد: استنى إنت يا عسكرى.. إنت شغلك تبقى لازق فى.. ومكانك  
على باب الخيمة بتاعتى.. أما انتم بقى فتطلعوا خدمة على  
السلاح فى الخيمة نمرة ستة.

يتحرك خالد فى اتجاه الخيمة وخلفه حسين..

- صبحى ياخذ الباقي إلى خيمة أخرى «خيمة نمره ٦».

- خالد يضع الحقيبة السامسونائيت أسفل سريره ويسترخى نائماً  
على السرير بملابسه بينما نلاحظ حسين يقف على باب الخيمة..

- \* \* -



## ٩٤- المعسكر فى الصباح التالى..

صباح باكر ولقطة على المعسكر حيث ينزل تاريخ جانبى ٥ أكتوبر

١٩٨١ ..

ينتهى طابور رياضة الصباح ويتجمع الجنود فى طابور حاملين بنادقهم.. يتحرك قائد الطابور ليؤدى التمام إلى خالد..

خالد يتسلم الطابور ثم ينادى على الجميع..

خالد: كل العساكر تسلم السلاح بتاعها فى الخيمة ستة انزع إبر  
ضرب النار.. اتحرك فى طابور أنت وهو.. يلا..

يتحرك الطابور ناحية الخيمة المذكورة حيث يقف عبدالحميد وعطا  
على باب الخيمة يتسلمان البنادق من الجنود وخالد يراقب تنفيذ الأمر..  
عبدالحميد يفاجأ بشيء ما خارج الكادر يتوارى مسرعاً مديراً خلفه..  
وهو يتمتم خائفاً.

عبدالحميد: يا نهار أسود.

عطا: فيه إيه يا عزت..

تسلم آخر بندقية وبعض الجنود يقتربون.. خالد يقترب من  
عبدالحميد مسرعاً يتساءل فى خوف وبصوت خافت..

خالد: إيه يا عسكرى فيه إيه.

عبدالحميد الذى مازال يدارى وجهه يقول لخالد فى صوت خافت..

عبدالحميد: عثمان الجرجاوى جاى على هنا.

---

خالد: ومالك مرعوب ليه كده.

عبدالحميد: دا كان زميلى فى نجع حمادى وعارف إنى سبت الجيش.. لو شافنى كل حاجة حاتبوظ..

خالد: طب إدارى جوه.. يلا.

خالد يدفعه إلى الداخل ثم.. يلتفت لنرى.. الضابط الجرجاوى مع قائد الكتيبة يقتربان فى اتجاه الخيمة التى توارى فيها عبدالحميد ويشير إليها قائلاً:

قائد الكتيبة: فضى الخيمة دى يا خالد عشان الملازم أول جرجاوى ينزل فيها..

خالد يقطع عليهما الطريق قبل أن يصلا إلى الخيمة منادياً وهو يفتح ذراعيه مرحباً..

خالد: أهلاً يا جرجاوى..

جرجاوى: كيفك يا أبو خالد.

القائد: انتم تعرفوا بعض..

خالد: طبعاً يا فندم آمال إيه.. إحنا بلديات بس هو يمكن أقدم منى بدفعة فى التخرج.

القائد: الملازم أول جرجاوى كتيبته هتأمن العرض من الخارج يا خالد.. وهانام عندنا الليلة..

خالد: يشرف يا فندم..

القائد: طب خده وريه الخيمة الفاضية دى وحضر له نومة ينام فيها الليلة..

---

يقول القائد ذلك وهو يشير إلى الخيمة التى يتوارى فيها  
عبدالحميد.. ويتجه عثمان إلى الخيمة ولكن خالد يأخذه من ذراعه..

خالد: يا فندم خيمة إيه اللى هايبيت فيها.. أنا هايبته فى خيمتى  
أنا.. الخيمة دى ما فيهاش استعداد.. سيبه معايا أنت بس يا  
فندم وأنا هتصرف دانا ما صدقت أشوفه..

القائد: أنتم أحرر.. لما تجمع إبر ضرب النار أبقى هاتها لى يا خالد..  
خالد: حاضر يا فندم.. تعالى يابو جرجاوى.. أنت فين من زمان واحشنى.  
خالد يأخذه ويتجهان إلى خيمته هو.. ويتنفس عبدالحميد الصعداء.

— — —

داخل خيمة خالد وخالد يتنفس هو الآخر الصعداء مقدماً له المقعد  
الوحيد فى الخيمة.

خالد: اتفضل يا جرجاوى تاخذ إيه بقى.. أجيب لك شاي ولا حاجة  
ساقعة ولا أبعث أجيبك كباب من العباسية.

عثمان: ولا كباب ولا غيره.. أنا موش فاضى.. أنا بصراحة عاوز منك خدمة..  
خالد: أنت تأمر يا زُمل.

عثمان يتلفت حوله ثم يقول فى صوت خافت...

عثمان: أنا.. موش حاقدّر أبيت عندك هنا..

خالد يفرح ولكنه يدارى فرحته ويتصنع الحزن.

خالد: ليه ياله؟؟

- يقترب منه عثمان هامساً..

عثمان: عندى ميعاد مع جو جديد نوفى ويمكن أبيت عنده.. إيه رأيك

---

ممکن تغطینى لو حد سأل على؟

خالد: یا سلام.. من عینى یا جرجاوى.. بس قل لى إمتى عرفت  
الجوده.. وفین؟

عثمان: بعد العرض هاجيلك واحكى لك على كل حاجة..

يقوم عثمان من على الكرسي وقد بدا متردداً ومرتبكاً يسأل خالد:

عثمان: أنا.. ممكن أمشى دلوقتى..

خالد يقول فى حماس..

خالد: طبعاً يابنى فى أى وقت أنا رقابتى سداده ويقبل عليه عثمان  
محتضناً فى إمتنان وهو يقول:

عثمان: ربنا ما يحرمنيش منك.. سلام..

خالد: مع السلامه..

يتحرك عثمان خارجاً.. ويبقى خالد وحده يجلس على المقعد  
مسترخياً وابتسامه على ملامحه وتقترب الكاميرا من وجهه..

— • • —

## ٩٥ - معسكر التجمع

لقطة عامة للمعسكر فى الليل .. وقد هداً الجو تماماً وينزل عنوان جانبى «ليل خمسه أكتوبر ١٩٨١».

- ترانزىستور صغير فى يد أحد جنود الحراسة يحرك مؤشره فيصنع خرفشة .. الجندى حسين وهو يقف زنهار يتنهّد وهو يدخن سيجارة ..

- خالد داخل الخيمة راقداً على سريره مفتوح العينين .. يلاحظ حسين .. خالد يقوم من مكانه مقترباً منه يحاول المزاح معه ..

خالد: وبعدين يا سحس .. هاترجع للسجاير تانى وأنت عندك القلب .  
حسين يلقي السيجارة يطفئها بقدمه .. ويظل صامتاً .. يقول خالد فى تعاطف ..

خالد: بتفكر فى إيه ..

يتنهّد حسين قائلاً ..

حسين: ولا حاجة يا فندم ..

خالد: إيه أفندم دى يا عسكرى ..

حسين: الحيطان لها ودان يا فندم ..

خالد: وإحنا ما عندناش حيطان .. كله قماش .. بتفكر فى محمود؟

يتلفت حسين حوله ثم يقول ..

حسين: حماتي عاوزه تعمل له سبوع.. مراتي رافضة الحكاية دى خالص.. ولكن أمها مصرة.. موش عارف عملوا إيه.. انت ما تجوزتش ليه يا أخ خالد..

ويتهد خالد فى حرقة وهو ينظر إلى البعيد.

خالد: المفروض كنت أتجوز.. لكن ربك ما أرادش.. موش كده أحسن.  
حسين: على رأيك.

---

- عبد الحميد وعطا داخل خيمتهما وهما يرقدان على ظهريهما شاردين ينظران إلى أعلى.. يقول عطا بعد لحظة..

عطا: أنا كان مفروض أتجوز الصيف اللى فات ده..

عبد الحميد: وإيه اللى حصن.

عطا: شوية خلافات هبله أجلت الجواز..

عبد الحميد: لإمتى؟

يتهد عطا طایل وهو يقول متهداً فى حزن..

عطا: للأبد.. ولا تقولن لشيء إنى فاعل ذلك غداً.. إلا أن يشاء الله.

عبد الحميد: صدق الله العظيم..

عطا: عندك أولاد؟

عبد الحميد: عبد السلام.. هايكمل تسع شهور بعد كام يوم..

يرين الصمت عليهما.. ثم يقول عبد الحميد وهو ينام على جنبه الآخر..

عبد الحميد: حاول تنام يا عطا.. تصبح على خير.

---

- صوت الأخبار فى الراديو الصغير يتردد فى الخارج على لقطة عامه للمعسكر.

**صوت الراديو:** مبارك يقدم تقريراً للرئيس السادات عن زيارته الهامة لأمريكا.

- إعدام ٦٦ من المعارضين الإيرانيين.

البعث السورى يعلن أن صدام حسين يعدم ٢٨ من معارضيه.. وفى النشرة طائفة أخرى من الأنباء.

لقطة كبيرة لإصبع يحرك مؤشر الراديو الصغير إلى محطة المملكة العربية السعودية..

**صوت الراديو:** وصول آخر فوج من الحجاج إلى ميناء جدة.

تتعالى من الراديو أصوات التهليلات والتكبيرات والتلبية..

«لبيك اللهم لبيك.. لبيك لا شريك لك لبيك.. إن الحمد والنعمة لك والملك.. لا شريك لك».

- لقطة عامة للمكان وتتردد هذه التهليلات والتكبيرات.. ويظلم الكادر تدريجياً

- اظلام -

## ٩٧- شقة عبود الزمر.. ليل داخل

- يضاء الكادر على لمبه كهرباء فى شقه عبود الزمر ثم تتحرك الكاميرا إلى..

- لقطة كبيرة لجهاز ريكوردر يصدر عنه صوت عبود الزمر..

**صوت عبود:** يعلن مجلس قيادة الثورة الإسلامية تفجير الثورة.. وقيام الدولة الإسلامية التى غابت عن سماء هذه الأمة وبعد فترة من السواد والجاهلية ساد فيها الظلم وعلا فيها الفساد وعُذِّب فيها المسلمون، قرر المجلس إعلان الثورة مرضاة لرب السماء والأرض ويعلن المجلس أن أى إنسان تسوّل له نفسه التصدى لهذه الثورة سوف يواجه بكل قوة.

أثناء إذاعة البيان تستعرض الكاميرا وجوه الموجودين فى إحدى الشقق التى يتنقّل بينها عبود الزمر.. ونلاحظ بين الموجودين بعض قيادات وجه قبلى والقاهرة ويوقف عبود التسجيل ثم يتحدث إليهم بهدوء شديد وتركيز..

**عبود:** يوم ستة أكتوبر ومع سماع طلقات الرصاص فى التلفزيون أو من الإذاعة هايقوم الأخ صالح والأخ محمد إمام بتحريك مجموعات القاهرة والجيزة لضرب عربيات الأمن فى ميادين الجيزة والدقى والتحرير بالمفرقات.. الفرض من ده ضرب حاجز الخوف قدام الشعب حتى يمكن السيطرة عليه وتحريكه.. الأخ طارق فى نفس اللحظة حينفذ خطة السيطرة على مبنى الإذاعة والتلفزيون بمساعدة الأخ زهران وينزع



---

البيان اللى سمعناه دلوقت..

- نستطيع أن نرى أحلام هذه المجموعة من خلال صور متلاحقة وبالتصوير البطيء.. مثل خروج أعداد ضخمة من الشبان مرتدين الجلابيب البيضاء فى جماعات تسيطر على كل شىء وتحطم كل شىء وخصوصاً أثناء إذاعة بيان الثورة.. بالتقطيع ما بين المجموعة الموجودة وبين أحلامهم بشكل تأثيرى يعكس ما يخلمون به.

يقول عبود ذلك ويشير إلى أحد الشبان الذى يهز رأسه ويقول زهران..

**زهران:** أنا حضّرت تصريح دخول الأخ طارق باسمه الحركى واتفقت معاه على المكان اللى حانتظر فيه بعد ساعة الصفر مباشرة. يكمل عبود مشيراً إلى شاب آخر..

**عبود:** فى نفس اللحظة دى هايكون الأخ عمر بيحرك مجموعة السيطرة على المساجد اللى هاتنادى من الميكروفونات لاستنفار المسلمين وإخراجهم لمناصرة الثورة.. لابد من استغلال فترة الارتباك اللى هاتحصل بعد مقتل السادات.. يتحدث كريم زهدى متسائلاً..

**كريم:** ده بالنسبة للقاهرة والجيزة.. إيه اللى حايجصل فى الصعيد؟  
**عبود:** بالنسبة للصعيد.. الإخوة قيادات الصعيد هايتحركوا بنفس الطريقة فى أسيوط والمنيا بحيث يتم السيطرة على مديريات الأمن حسب الخطة الموضوعة.. لو اشتغل جهاز الإعلام بتاعنا صح.. الإخوة كلهم حايتحركوا بسهولة.. لذلك السيطرة على المساجد فى وقت مناسب هاتسهّل الأمورية كثير خصوصاً إننا

---

ثانى يوم صلاة العيد حانقيم الصلاة فى كل مساجد الجمهورية  
وبعدها يذاع البيان التالى فى الإذاعة ويكرر مرات.. ومرات..  
يضغط بإصبعه على زرار الريكوردر لينطق صوته..

**صوت عبود:** الثورة الإسلامية تشيد بمواقف التأييد والمؤازرة من قادة  
القوات المسلحة وتناشد جماهير شعب مصر المسلم  
الخروج فوراً إلى الشوارع مهللين مكبرين فرحين بنصر  
الله المؤزر..

«الله أكبر.. الله أكبر.. والله الحمد»..

أثناء إذاعة هذا البيان تستعرض الكاميرا وجوه عبود ورفاقه وهم  
يحلّمون..

— • • —

## ٩٧- معسكر التجمع بمدينة نصر..

لقطة عامة للمعسكر فى الصباح الباكر وينزل عنوان «صباح ٦ أكتوبر ١٩٨١» لقطة كبيرة ليد تملأ خزينة بالطلقات.. تتراجع الكاميرا لنرى خالد فى خيمته وقد ارتدى الملابس الميرى بينما حسين يقف منتبهاً متوتراً على باب خيمة خالد يراقب..

نسمع صوت القاضى من خارج الكادر وهو يقول..

**صوت القاضى:** إحكى لنا يا خالد وبالتفصيل كل اللى حصل فى اليوم ده..

**صوت خالد:** فى اليوم ده صحينا بدرى قوى بعد ما صلينا الفجر..

كان لازم كل حاجه تتحضر.. وبهدوء

خالد يضع الخزنة المملوءة بالرصاص فى شرابه ويربط فوقها بأستك ثم يتناول الكيس الذى به الـ ٨١ طلقة.. ثم يفلق الحقيبة السامسونائيت ويعيد وضعها أسفل السرير ثم يخرج من الخيمة إلى حيث خيمة عبدالحميد وعطا حيث قد استيقظا وأخذا يعدان البنادق لتسليمها إلى الجنود..

خالد يلقي إليهما بتحية الصباح..

**خالد:** السلام عيكم..

**عبدالحميد:** وعليكم السلام ورحمة الله وبركاته..

**خالد:** نمتوا كويس..

**عبدالحميد:** أنا نمت زى القتيل..

---

عطا: شخيره كان واصل لآخر المعسكر.. أنت ماسمعتوش..

بيتسم خالد ويلقى إليهما بكيس الطلقات..

خالد: عمّروا الثلاث بنادق بتاعتكم واستعدوا لتوزيع البنادق الثانية على العساكر.. إوعوا تلخبطوهم فى بعض..

عطا: ما تخافش.. إحنا علّمانهم بكُنهة من لون مختلف..

يقول عطا ذلك ويشير إلى البنادق الثلاثة وقد تم تمييزها بخرقة من لون مختلف عن باقى البنادق.

— — —

## ٩٨- مادة تسجيلية..

موكب الرئيس وحوله رجاله فى سيارة مكشوفة وهو يخترق مدينة القاهرة متوجهاً إلى منطقة العرض العسكرى يصحب ذلك صوت المعلق الذى يعلق على المناسبة واليوم ويمكن هنا أن نسمع صوت معلق الفيلم حيث ينسحب الصوت عن صورة موكب الرئيس ونسمع المعلق يشير إلى أن الصراع قد بدأ يتجه إلى قرب نهايته.. على لقطات لوجه الزعيم يحى الجماهير.. وذلك فى حالة استخدام صوت معلق عام على أحداث الفيلم..

- - -

## ٩٩- معسكر التجمع..

أربع قنابل يدوية توضع فى داخل الخوذة ثم تغلق الحقيبة السامسونايت وتعود إلى مكانها أسفل السرير.. خالد يتناول الخوذة ويتحرك بها خارجاً عن الخيمة وحسين مازال فى مكانه يقف مراقباً..

- خالد يتجه إلى العربة التى سوف يركبها ويضع الخوذة أسفل الكرسي الذى سوف يجلس عليه ونلاحظ أن عملية تسليم البنادق تتم أمام الخيمة التى فيها عبدالحميد وعطا.. ويعود خالد مرة أخرى أمام الخيمة حيث نلاحظ أن السيارات فى المعسكر تستعد للتحرك.. ينادى خالد على طاقم عربته..

خالد: كله استلم بندقيته؟

يقترّب منه العريف زكريا رشاد بينما يصطف الجنود صفّاً.. وزكريا يؤدى التحية..

زكريا: كله تمام يا فندم..

خالد: كل واحد يتمم على بندقيته ويتأكد إن إبرة ضرب النار منزوعة منها.. يقوم الجنود بفك الأجزاء والتأكد من نزع إبرة ضرب النار ويتم ذلك

---

تحت إشراف خالد.. نلاحظ قائد الكتيبة فى الخلفية يوزع الأوامر فى ميكروفون ببطاريات..

القائد: كله يركب العربيات ويستعد عشان حانتحرك لأرض الطابور..

خالد: طقم المدفع كله تمام؟

زكريا: تمام يا فندم..

خالد: كله يركب فى صندوق العربية فى المكان الللى حددناه..

- يتحرك الجنود مسرعين ليركبوا فى صندوق العربية..

- - -

## ١٠٠- مادة تسجيلية..

موكب الرئيس يصل إلى مبنى وزارة الدفاع.. ينزل من العربية ويستعرض حرس الشرف.. «مادة تسجيلية».

-...-

## ١٠١- أرض الطابور..

العربات وهى تتحرك ببطء.. تتوقف عربية خالد مع توقف الطابور.. يقول خالد لسائق العربية..

خالد: بيتهىالى فردة الكوتش الورانية نائمة يا عصام إنزل بص عليها كده.  
ينزل السائق ويستغل خالد الفرصة ليقوم بتغيير خزانة رشاش السائق بالخزانة التى يحتفظ بها فى جواره ويضع الخزانة الفارغة فى تابلوه العربية يعود السائق ويطمئن خالد على كاوتش العربية.

السائق: كله تمام يا فندم..

خالد: طب روح هات لى علبة السجاير بتاعة الرائد شريف صبحى.  
يذهب السائق ليحضر له السجائر ويقوم خالد بإخراج الخوذة التى فى أسفل مقعده ويضع القنابل الأربعة فى سترته.

- خالد ينادى على عبدالحميد..

خالد: يا عسكري عزت.

- عزت يقفز نازلاً من العربية ويقترّب منه مؤدياً التحية..

عزت: أيوه يا فندم..

خالد يسأله..

---

خالد: السلاح كله تمام يا عسكري؟

خالد يعطيه قنبلتين يخبئهما في ملابسه وهو يقول بصوت عالي.

عزت: تمام يا قندم.

خالد: راجع لي عليهم ثاني يا عسكري.

عزت حاضر يا قندم.

يسرع عزت عائداً إلى مكانه في الصندوق الخلفي للعربة حيث يجلس عطا وحسين.. ويعود السائق ومعه علبة السجائر فيعطيهما لخالد الذي يشعل سيجارة ثم يدير مؤشر لراديو حيث يذيع رحلة الرئيس السادات في طريقه إلى طابور العرض.

عبدالحميد يأخذ القنبلتين ويخفيهما في ملابسه ويطمئن عليهما..

— • • —



## ١٠٢- قاعة المحكمة..

لقطة كبيرة لوجه محامى خالد وهو يتساءل..

محامى خالد: كيف استطاعت عربية خالد أن تمر عبر جهات التفتيش فى طابور العرض ونحن نعلم أنها جهات متعددة وليست جهة واحدة.

القاضى ينظر إلى القاعة متسائلاً.

يقف أحد الأشخاص قائلاً..

**القاضى:** الخبير موجود؟

يشير إليه القاضى.

**الخبير:** موجود يا فندم..

**القاضى:** اتفضل.. قول لنا ما هى الجهات المسئولة عن التفتيش فى طابور العرض يوم ٦ أكتوبر سنة ١٩٨١م.

**الخبير:** المسئول عن التفتيش عدة جهات على عدة مراحل المرحلة الأولى هى مرحلة التمرکز وفى المرحلة دى المسئول عن التفتيش هم قادة السرايا وقائد عناصر الوحدة.

---

## ١٠٣- معسكر التجمع..

لقطة سريعة لخالد وهو يراجع إبر ضرب النار المنزوعة من بنادق طاقم المدفع الذى يرأسه هو ونسمع باقى صوت الخبير.

**صوت الخبير:** وهو بالنسبة لكتيبة خالد كان خالد نفسه هو المسئول عن التفتيش..

---

---

## ١٠٤- قاعة المحكمة..

وجه الخبير فى لقطة كبيرة فى المحكمة يكمل حكايته..

**الخبير:** المرحلة الثانية هى مرحلة الخروج من أرض التمرکز وهنا اللى بيفتش هم ضباط الحرس الجمهورى.

---

## ١٠٥- أرض الطابور..

أرض الطابور.. الجنود ينظفون ويلمعون المدافع بينما خالد يستمع إلى راديو العربية بينما العربية واقفة فى مكانها وكذلك كل العربات كلها.. حسين يقترب من خالد فى حركة غير محسوسة ويهمس له..

**حسين:** الحق يا فندم.. الحرس الجمهورى وصل..

خالد ينظر خارج الكادر لنرى من وجهة نظره عدد من الضباط راكبي الموتوسيكلات ويقومون بتفتيش العربات.. وقد وصلوا للعربة السابقة لعربة خالد مباشرة..

خالد ينزل من العربة متوتراً..

---

## ١٠٦- أرض الطابور مكان آخر..

موكب السادات فى طريقه إلى النصب التذكارى للجندى المجهول وصوت المذيع يلعلع شارحاً ما يحدث بحماس (ماده تسجيليه)

---

---

## ١٠٧- أرض الطابور..

عبدالحميد يطل من صندوق العربة خائفاً.. وكذلك عطا.. حيث يريان عمليات التفتيش على البنادق وإبر ضرب النار والذخيرة للرشاشات.. عطا يقترب من عبدالحميد.. الجالس فى صندوق العربة ويقول له هامساً فى رعب..

**عطا:** دول بيفتشوا بجد يا عبدالحميد.. هانعمل إيه..

ويهمس عبدالحميد فى رعب وهو يخبئ القنبلتين..

**عبدالحميد:** سيبها على ربنا.. ولو شافونى نايم ومانزلتش قولهم إنى عيان..

يقول ذلك ويغلق سترته على القنبلتين.. ثم يستلقى فى ذاخل صندوق العربة فوق البنادق الثلاثة ثم يأخذ فى التمتمة بصوت خفيف ببعض الأدعية.. والكاميرا تقترب من وجهه وهو يتمم بأدعية خافته..

- خالد وعطا وحسين والتوتر يزداد مع اقتراب الذين يفتشون وهم ثلاثة ضباط من عربة خالد وقد انتهوا من العربة السابقة لها.. ينادى أحدهم على جنود خالد ليتقدموا ببنادقهم..

أحد الضباط: أفراد الطاقم يتقدموا رافعين بنادقهم خطوتين لقدام.

يقترب واحد ثم الثانى.. يفتشون على إبر ضرب النار.. التوتر يتصاعد على خالد وزملائه خاصة عبدالحميد الذى أغلق عينيه وأخذ يتمتم.. ويقترب أحد الضباط من حيث ينام عبدالحميد ويتساءل..

---

**ضابط:** مين الأخ اللي نايم جوه ده.. ونايم ليه.. ٩٩

**خالد:** دا تعبان شويه يا فتند.. عنده إسهال..

ويتقدم الضابط من العربة فى نفس اللحظة التى تتدلع فيها أصوات سيارات النجدة المصاحبة لموكب الرئيس.. يتوقف الضابط ناظراً خارج الكادر حسب مصدر الضجة.. ثم يخرفش الجهاز اللاسلكى الذى فى يده يفتحه ويتحدث فيه..

**ضابط:** أيوه يا فتندم.. جاهز..

توتر خالد فى قمته وكذلك المجموعة.. يتحرك الضابط ذو الجهاز اللاسلكى إلى الموتوسيكل الخاص به.. ويشير إلى زميليه أن يتبعاه ثم ينطلق الثلاثة مبتعدين..

- تسترخى عضلات وجه خالد ونسمع صوت المحامى فى المشهد التالى..

**صوت المحامى:** سيدى القاضى لماذا لم تفتش عربة خالد بالذات..

— • • —

## ١٠٨ - قاعة المحكمة..

لقطة كبيرة لوجه القاضى وهو يوجه كلامه إلى الخبير.

**القاضى:** السؤال ده يوجه إلى الخبير.. لماذا لم يتم تفتيش عربة خالد بالذات؟

**الخبير:** المفروض تكون اتفتشت زى غيرها من العربيات المشتركة فى العرض..

- القاضى يوجه كلامه إلى خالد..

**القاضى:** إيه اللى حصل يا خالد وليه عربيتكم بالذات ما تفتشيتش..؟

**خالد:** الدوشة اللى حصلت ساعة وصول موكب الرئيس أرض الطابور

لخمتهم وعمت عينيهم عننا..

يقوم محامى خالد قائلًا..

**محامى خالد:** لا نستبعد أن يكون هناك سبباً آخر..

القاضى يقاطعه..

**القاضى:** بلاش نقفز إلى استنتاجات.. كمل يا سيادة الخبير.. هل

فيه تفتيش تانى؟

**الخبير:** أيوهيا فندم.. التفتيش فى المرحلة التالية بيتم بشكل

عشوائى.. وبالعينة..

**القاضى:** اشرح لنا..

- - -

## ١٠٩- أرض الطابور..

العربات تتقدم فى أرض الطابور.. هناك عدد من ضباط وجنود الشرطة العسكرية يفتشون على البنادق فى أيدي الجنود.. وتقترب العربة الخاصة بخالد.. يوقفها الضابط بإشارة من بره.. ويعاين اثنين من البنادق ونلاحظ أن الرعب يكاد أن يقتل الثلاثة الذين يركبون فى صندوق العربة.. ويفتش الضابط بنادق الجنود الآخرين.. الذين يركبون معهم على العربة أو يسيرون إلى جوارها.. على هذه اللقطات يأتى صوت الخبير موضعاً من بداية المشهد..

**صوت الخبير:** اللجان اللى بتفتش بتختار بعض البنادق اللى موجودة فى أيدين العساكر وبشكل عشوائى ويتأكدوا من خلوها من الذخيرة وإبر ضرب النار..

---

## ١١٠- قاعة المحكمة..

لقطة كبيرة لوجه القاضى وهو يسأل الخبير..

**القاضى:** هل فيه تفتيش تانى؟

**الخبير:** أيوه يا فندم.. وهى المرحلة الأخيرة قبل الوصول للمنصه على طول.. وفى المرحلة دى بيكون التفتيش أكثر دقة وغير عشوائى وتستخدم فيه أجهزة الكترونية حديثة..

- يقوم محامى خالد معلقاً فى شىء من الحدة..

**محامى خالد:** ومع ذلك العربية عدت بدون إزعاج من هذه المرحلة أيضاً..

القاضى يوجه كلامه إلى الخبير..

**القاضى:** لماذا يا سيادة الخبير.. لماذا لم تفتش العربة فى هذه المرحلة أيضاً.

---

يبدو القلق على الخبير وهو ينظر حوله فى شىء من الحرج.. ثم يقول..

**الخبير:** واللّه يا فندم.. أنا ما عرفش.. المفروض كانت العربيات كلها تتفتش..

**القاضى:** إيه تفسيرك لعدم تفتيشها بهذا الشكل المعيب.

**الخبير:** واللّه يا فندم هو تردد إنه صدرت الأوامر فى هذا اليوم بتركيز الحراسة خلف المنصة.. وليس أمامها..

- القاضى فى استغراب..

**القاضى:** اشمعنى..

- الخبير يتزايد قلقه ويلتفت ناحية القفص ثم يقول..

**الخبير:** تحسباً لقدوم عبود الزمر.. مع مجموعة لاغتيال الرئيس من خلف المنصة.. عشان كده الحراسات فى معظمها انتقلت من قدام المنصة لوراها..

ويقفز محامى خالد متسائلاً..

**محامى خالد:** مين اللى أصدر هذه الأوامر..

- الخبير لا يرد.. وتثور ضجة فى القاعة تضطر القاضى لإعادة الهدوء إليها..

**القاضى:** سكوت.. هدوء فى القاعة.. «ثم يتوجه إلى عبود الزمر الذى يوجد بالقفص».

**القاضى:** قول لنا يا أخ عبود..

---

- عبود ينظر إلى القاضى.. والقاضى يكمل..

**القاضى:** هل كانت لديكم نية لمهاجمة المنصة فى هذا اليوم من الخلف؟؟

**عبود:** إزاي وأحنا مهاجمين من الأمام.. بالعكس إحنا كتنظيم كان تركيزنا كله على عملية الأخ خالد.. دى شائعة شبيهة بالشائعة اللى أطلقوها إننا هانفتال الرئيس فى المنصورة.. وهذا غير حقيقى..

**محامى خالد:** من الذى أطلق هذه الشائعة.. ولماذا أطلقها؟؟

**النيابة:** الدفاع ببسأل السؤال ده لمين وغرضه منه إيه؟؟

**محامى خالد:** بسأل السؤال ده للنيابة والمحكمة والتاريخ.. وغرضى منه هو التنبيه إلى أنه من الممكن جداً إطلاق شائعة من هذا النوع يكون الغرض منها هو إخلاء الساحة ليتم ما تم فعلاً وحتى لا يجد خالد ومجموعته من يمنعمهم من تنفيذ ما عزموا عليه..

- القاضى يوجه كلامه إلى الدفاع..

**القاضى:** المحكمة تلفت نظر الدفاع أن يسوق الدليل على أى استنتاجات يستنتجها..

ثم موجهاً حديثه للنيابة..

**القاضى:** النيابة جهزت شهود الإثبات؟؟

**النيابة:** أيوه يا فندم.. جاهزين.

**القاضى:** يقفوا كده لما نشوفهم.. يقف مجموعه من الجنود الشباب.

---



- يهز القاضى رأسه ويقول..

**القاضى:** احنا حا نبدأ واحد.. واحد.. اتفضلوا..

- نستطيع أن نرى لقطات سريعة لبعض ما يحكيه كل شاهد بشكل فوتومونتاجي.. ونبدأ بسائق عربية خالد..

أ - لقطة كبيرة لوجه السائق عصام..

**السائق:** جندى عصام عبدالحميد يا فندم.. قبل ما نوصل المنصة يجى بنص متر الضابط خالد خد الرشاش من جنبى وحطه على رجليه وأمرنى أقف وإذا ما وقفتش حايضربنى بالنار.. وقفت وفتح الباب ونزل طلع حاجة صفراء ورماها ولقيت الدنيا مرتبكة جريت بالعربية..

- لقطة كبيرة لوجه رئيس النيابة يسأل..

**النيابة:** ما سبب عدم نزع كتلة الترياس من الرشاش بتاعك بالرغم من صدور الأمر بنزعها؟

**السائق:** الضابط خالد قالى ما تنزعهاش أحسن تضيع وتتحاكم..

**النيابة:** هل كتلة الترياس بها إبرة ضرب النار؟

**السائق:** أيوه؟

**محامى خالد:** إنت قلت إن خالد خد منك السلاح ليه سلمته له وإزاي ده تم؟

**السائق:** السلاح كان بينى وبينه.. فى لحظة ما كنت باشاور للعربيات عشان تحاذينى خده من جنبى..

---

محامى خالد: خالد استعمل السلاح بعد ما نزل ٤٩

السائق: أنا خفت جريت بالعربية ما شفتش حاجة غير الحاجة اللي رماها ناحية المنصة.

ب - لقطة كبيرة لوجه أحد جنود طاقم خالد..

جندى: وصلنا المنصة.. ولقينا العربية هدت شوية.. افكرت أنها اتخربت أو عطلت لأن الأوامر كانت كل واحد يبص قدامه لا يمينه ولا شماله..

النيابة: مين اللي أعطى الأوامر دى..

الجندى: الضابط خالد قال إننا حانتصوّر ولو حد عمل حاجة هايحاكم..

النيابة: وبعدين..

جندى: بصيت بنص عين لقيت الضابط خالد نزل من العربية وبعد عنها ٣ أو أربع خطوات وفى يده حاجة بيرميها على المنصة والفرد اللي كان قاعد ورا الكابينة على طولرمى كمان شىء على المنصة برضة.. أنا اترميت على وشى وما حسستش بحاجة والعربة مشيت..

الدفاع: أحمد اللي رمى الشىء من فوق العربية ولا عزت..

جندى: لأ.. أحمد اللي كان قاعد ورا الكابينة على طول..

ج - لقطة كبيرة لوجه الجندى صبحى عبد المقصود يقول فى خوف معرفاً نفسه..

صبحى: صبحى عبدالمقصود محمد يافندم.. يوم الإثنين.. نادى على

---

الضابط خالد وقال لى يا صبحى صلح أفرول لعزت عشان أنا  
ترزى سيادتك يا فندم.. وأحمد قال لى قص لى شعرى..

**القاضى:** أنت ترزى ولا حلاق..

ابتسامة وهمهمة فى القاعة تشجع صبحى قليلاً فيبتسم قائلاً..

**صبحى:** الجيش بيقولك اتصرف سعادتك.. وأصل أنا وأنا صغير  
سعادتك..

القاضى يقاطعه مانعاً استرساله..

**القاضى:** تقدر تتعرف على المتهمين يا صبحى..

**صبحى:** أيوه يا باشا أمال..

**القاضى:** طب قرب من القفص كده وشاورلى عليهم..

صبحى يتجه إلى القفص ويشير إلى عبدالحميد قائلاً..

**صبحى:** ده عزت سعادتك.. وده أحمد سعادتك.. وده جمال  
سعادتك..

ثم يقترب من خالد متلجلاً خائفاً.. يهم بأداء التحية ويتوقف فى  
منتصف الحركة.. تضج القاعة بالضحك..

**صبحى:** وده الضابط خالد..

**القاضى:** طب تعالى كمل كلامك..

صبحى يعود إلى مكانه ليكمل كلامه وتظل الكاميرا مع خالد ورفاقه  
وهم يتهايمسون ويضحكون..

محامى خالد وهو يقوم متوجهاً بالسؤال إلى صبحى..

---

**معامى خالد:** يا أخ صبحى.. مين اللى رمى القنبلة من فوق العربية..  
أحمد ولا عزت؟؟

**صبحى:** والله مانى فاكر سعدتك أهو واحد منهم..

**معامى خالد:** إنت كنت جوه العربية.. حاول تفتكر يا صبحى..

**صبحى:** أنى.. أصلى كنت متتيل خالص.. بليت نفسى وبهدلت الدنيا.. فرقعة وضرب نار بقى.. وروحي راحت خالص يا باشا..

تضج القاعة بالضحك.. ثم ييزغ وجه الجندى كمال الطيب مشرقى..

**كمال:** يوم ١٠/٥ جمعوا السلاح وخلوا الثلاثة دول «يشير إلى القفص» جمال وعزت وأحمد خدمة عليه..

**النيابة:** مين اللى طلعهم خدمة على السلاح..

**كمال:** الضابط خالد.. إحنا نمنا على العربية وهم فى الخيمة.. والصبح استلمنا السلاح وفتشنا عليه فوجدناه منزوع إبر ضرب النار وفى مدينة نصر الضابط خالد قال انزلوا اعملوا صيانة وراح هو قعد فى كابينة العربية وكان الرئيس بيوضع إكليل الزهور على قبر الجندى المجهول عند النصب التذكارى وكان الضابط خالد فاتح الراديو وأثناء قراءة الرئيس الفاتحة على أرواح الشهداء قال لنا..

- - -

## ١١١- أرض الطابور.. فلاش باك

لقطة كبيرة لوجه خالد ينظر إلى الخلف وهو جالس في العربة بينما الجنود ينظفون المدفع ويقفون حول العربة في أرض الطابور..

خالد: اقرأوا الفاتحة على أرواح الشهداء يا رجاله..

يقف الجميع ليقروا الفاتحة وكذلك خالد ويدخل صوت الشاهد كمال..

صوت كمال: وبعدين جه دورنا نتحرك.. واتحركنا..

- - -

## ١١٢- قاعة المحكمة.. عودة من الفلاش باك

الشاهد كمال يكمل في المحكمة..

كمال: لما وصلنا عند المنصة أحمد رمى حاجة صفرا طلعتها من سترته وعزت برضه وحسين قام اتدور ناحية المنصة وضرب دفعة من الرصاص..

محامي خالد: مين اللي رمى القنبلتين..

كمال: عزت وأحمد..

محامي خالد: مين رمى الأول؟؟

كمال: عزت. لأ أحمد..

محامي خالد: لأ.. حاول تفتكر مين رمى الأول..


كمال: أحمد..

محامي خالد: أرجو إثبات التناقض في أقوال شهود الإثبات.. وشكراً..


القاضي ينظر إلى النيابة متسائلاً..

القاضي: لسه فيه شهود..؟؟

النيابة: عندنا ثلاث أفلام للحادث ونستسمح هيئة المحكمة بعرضهم.


















آخر صورة تم التقاطها للسادات قبل اغتياله بلحظات

## ١١٣- قاعة المحكمة..

شاشة التلفزيون والعرض يسير بالسرعة البطيئة..

قاعة المحكمة والجميع يتابعون بينما تقوم النيابة بشرح اللقطات ونراها على الشاشة..

**النيابة:** عربة خالد تتوقف.. ينزل منها جارياً.. يلقي بالقنبلة الأولى باتجاه المنصة.. فوق العربة عبدالحميد يلقي هو الآخر بالقنبلة الثانية..

ويقوم الدفاع معترضاً..

**الدفاع:** الدفاع يعترض على تسمية الأشخاص فالصورة لا توضح أى ملامح لهم.

على الصورة نرى اختلاط وهرج شديد.. تستمر النيابة دون أن تغير الدفاع اهتماماً ويشير ممثل النيابة إلى شخص يجرى ناحية المنصة من ظهره..

**النيابة:** خالد يندفع رافعاً الرشاش.. طلقات الرصاص تتطاير عبدالحميد يصعد درجات المنصة من ناحية اليمين..

على شريط الصورة نرى إختلاط.. وتتعدم الصورة.. ممثل النيابة.

**ممثل النيابة:** هذه هي الأفلام الثلاثة التي سجلت الحادثة.. ورغم اختلاط الصور بسبب الظروف غير الطبيعية التي سجلت فيها إلا أن الحدث واضح.. والأطراف التي شاركت فيه واضحة بما لا يدع مجالاً لأى شك.. شكراً سيدي الرئيس..

يعود ممثل النيابة إلى مكانه ويلتفت القاضي إلى خالد..

**القاضي:** يا خالد.. هل لديك تعليق على هذه الشرائط.

---

خالد: أنا أترك التعليق للمحامى..

القاضى: وأنت يا عبدالحميد..

عبدالحميد: نفس الشيء..

القاضى: كلكم كده..

يقوم محامى خالد متحدثاً..

محامى خالد: بعد إذن هيئة المحكمة إحنا اتفقنا أن نوحّد ملاحظات الدفاع والمتهمين حول الأفلام والصور الفوتوغرافية المقدمة من النيابة كدليل إثبات ونحن مضطرون للقول أن ما أذيع علينا الآن هو مونتاج لهذه الأفلام.. والمونتاج بالقطع يعنى التدخل والتدخل يفسد الدليل..

ممثّل النيابة يعلق..

النيابة: الشريط المصرى لم يحدث له مونتاج..

محامى خالد: إحنا بنقول أنه حصل مونتاج للشرائط كلها ثم أنها لا تظهر هى أو الصور الفوتوغرافية ملامح أى من الجناة..

محامى خالد فى إصرار يستطرد..

محامى خالد: ومع ذلك دعونا نناقش الموضوع بهدوء.. الملاحظ سواء فى الأفلام التى عرضت علينا.. أو فى الصور أن هناك شىء غريب.. لو سمحت دور لنا الفيلم من الأول..

ويتساءل المختص..

المختص: أى فيلم.

الدفاع: أى فيلم فيهم.. ولما أقولك وقَّف توقَّف..

المختص: حاضر..

- يبدأ المختص بإدارة الشريط وتدور الصور متتابعة..

- الجميع فى القاعة يتابعون ما يدور على الشاشة فى انتباه خصوصاً خالد ورفاقه فى القفص، الذين يشيرون بأيديهم إلى ما يحدث.. ومرة واحدة يقول محامى خالد..

محامى خالد: وقف هنا..

يقوم المختص بإيقاف الشريط عند لقطة عامه للمنصة..

- محامى خالد يقترب من الشاشة وفى يده إحدى الصور الفوتوغرافية ينظر فيها ويقارن بينها وبين الصورة على الشاشة وهو يقول موجهاً كلامه إلى هيئة القضاة..

- محامى خالد: الملاحظ فى أى لقطة للمنصة من الأمام أن هناك

كرسى محطوط هنا.. فى المكان ده «يشير إلى مكانه» واضح هنا فى الشريط.. وواضح كمان فى الصورة.. ومكان الكرسي ده فى منتصف المنصة أمام المكان اللى كان قاعد فيه رئيس الجمهورية.. وفى كل الأشرطة اللى التقطت للحادث وفى كل الصور بنلاقى إن الكرسي ده خالى.. أكيد الكرسي ده محطوط هنا عشان حد يقعد عليه.. يا ترى مين هو الشخص ده؟؟.. وليه ما شفنا هوش أبداً قاعد عليه؟؟

- القاضى ينظر إلى النيابة ويتساءل..

---

القاضى: الشاهد موجود..

النيابة: أيوه يا فندم..

القاضى: طب نشوفه بعد الاستراحة.. ترفع الجلسة للاستراحة..

يقف القاضى ويقف الجميع..

— • • —



## ١١٤ - قاعة المحكمة..

لقطة عامة للمحكمة فى من الخارج نسمع عليها صوت الحاجب  
ينادى..

**الحاجب:** محكمة..

- داخل قاعة المحكمة ونرى هيئة القضاة تجلس على المنصة وجمهور  
المشاهدين يجلس بعد جلوسها.. وينظر القاضى إلى النيابة..

**القاضى:** الشاهد جاهز..

**النيابة:** أيوه يا فندم..

**القاضى:** احلف اليمين..

- تقترب رؤوس هيئة القضاة أثناء حلف اليمين.. والقاضى يهز رأسه  
موافقاً ثم ينظر إلى الشاهد..

**القاضى:** إنت اللى كان مفروض تقعد قدام المنصة ؟؟

**الشاهد:** أيوه يا فندم..

**القاضى:** إنت بتشتغل إيه ؟؟

**الشاهد:** من حرس الرئيس سعادتك..

**القاضى:** من حرس الرئيس..

**الشخص:** أيوه يا فندم..

**القاضى:** ومكانك قدام المنصة..

---

الشخص: أيوه يا فندم..

القاضى: مهمتك إيه بالضبط؟

الشخص: ضمن طقم حماية الرئيس والمحافظة على حياته.

القاضى: إنت مسلح؟

الشخص: أيوه يا فندم كلنا مسلحين.

القاضى: ليه بقى.. حسب ما شفنا.. إنت موش فى مكانك قدام

المنصة..

يتردد الشخص قليلاً..

الشخص: هو.. سعادتك صدر لى الأمر.. إنى انتقل ورا المنصة..

القاضى: مين اللى أصدر لك الأمر ده؟

يصمت الشخص قليلاً.. ثم يقول بعد لحظة..

الشخص: الرئيس..

- القاضى يتساءل..

القاضى: ريس مين؟

الشخص: الرئيس السادات الله يرحمه هو اللى قالى أرجع ورا

المنصة - يسود الصمت القاعة تماماً.. وبعد لحظة يتساءل محامى خالد..

محامى خالد: وإيه اللى يثبت لنا صحة كلامك..

يتلفت الرجل حوله.. ثم يقول..

الشخص: ما فيش حاجة تثبت هى أوامر صدرت لنا نرجع ورا.. قمنا

رجعنا ورا..

---

**القاضى:** عشان فيه معلومات إنه حايحصل هجوم من ورا؟

**الشخص:** ما عرفش.. ما عنديش معلومات.. إسألوا..

تضج القاعة بالضحك والهمهمة.. ويقول محامى خالد فى انفعال مشيراً إلى الشخص..

**المحامى:** الرجل المائل أمامكم أيها السادة هو واحد من حرس الرئيس المدرب على أعلى مستوى والمجهز بأحدث الوسائل لحمايته.. لو أنه كان موجوداً فى مكانه لحظة نزول خالد من عربته وتصدى له لكانت الخطة كلها قد أحبطت.. ولكنه هو وباقى طاقم الحراسة لم يكن موجوداً أمام المنصة بل خلفها.. من الذى أبعدهم عن أماكنهم فى اللحظات الفاصلة.. سيدي الرئيس.. هذا سؤال يتحتم الإجابة عليه لنعرف لماذا قتل الرئيس ومن الذى قتله..؟

---

## ١١٥ - خارج المحكمة..

لقطة عامة للمحكمة من الخارج يأتى عليها صوت تعليق من خارج الكادر..

**صوت المعلق:** استمرت محاكمة قتلة الرئيس الراحل أنور السادات أكثر من أربعة شهور وتحولت من محاكمة للقتلة إلى محاكمة لعصر بكامله..

---

## ١١٦- داخل المحكمة..

داخل المحكمة مشهد فوتومنتاجى يبرز أهم لدفع التى دفع بها المحامون حيث نرى وجوههم فى لقطات كبير وهم يتحدثون وكذلك وجوه المتهمين يلوحون من داخل القفص بانفعال كما نستطيع أن نرى أيضاً بعض لقطات معبرة عما يشيرون إليه أو يتحدثون عنه.. بحيث ينتج من هذا الخليط من الصور ما يمكن أن يوضح لماذا قُتِلَ الرئيس السادات. ويبدأ الفوتومنتاج بلقطة كبيرة لوجه أحد المحامين وهو يقول فى انفعال..



خالد فى جلسات المحاكمة الأخيرة

---

**محامى ١:** إن الفعل الذى أقدم عليه هؤلاء الفتية ليس أكثر من رد ضرورى ومناسب للاعتداء على شرف الدين وعلى شرف الأمة وعلى شرف الإنسانية.

**محامى ٢:** ما فعله هؤلاء الشباب يدخل تحت باب الدفاع الشرعى الذى يستند إلى نصوص الشريعة وإلى نصوص قانون العقوبات..

**محامى ٣:** أوجه إلى الرئيس الراحل تهمة الخطف فقد اعتقل ١٥٣٦ مواطناً مصرياً دون أن يكون ذلك من اختصاصه لأنه من اختصاص النيابة فقط.

**النيابة:** الدستور فى المادة ٤٧ منه يتيح لرئيس الجمهورية اعتقال من يرى.

**محامى ٢** يقاطع النيابة صارخاً..

**محامى ٣:** فى حالة الضرورة القصوى.. أين كانت الضرورة عندما اعتقل من اعتقل..

**النيابة:** أحداث الفتنة الطائفية.

**محامى آخر** مقاطعاً..

**محامى آخر:** أى فتنة هذه.. مجتمعنا المصرى لم يعرف هذا التعبير إلا فى عصره الميمون ثم أن أحداث الزاوية الحمراء التى ارتكز عليها كانت قد انتهت ونامت فلماذا أيقظ الفتنة النائمة فى هذا الوقت بالذات.

**محامى ٥:** أنا أطالب بتشكيل محكمة لمحاكمة أنور السادات وأتهمه بالخيانة العظمى لأنه اتصل وأنشأ علاقة مع العدو الصهيونى فى زمن الحرب وإذا كان القضاء المصرى يحاكم

الجواسيس على هذه التهمة فلماذا لا يحاكم أنور السادات.

ييزغ وجه محامى خالد هو الآخر هادئاً وهو يلوح بورقة فى يده ويشير لمساعد له لينصب رسماً تفصيلياً على لوحة كبيرة فى قاعة المحكمة على حامل خصص لذلك..

**محامى خالد:** ما هى الرصاصة التى قتلت الرئيس السادات؟

حسب تقرير الطب الشرعى الرصاصات التى قتلت ٢ رصاصات.

الرصاصة الأولى أصابت جانب الصدر الأيسر فى اتجاه من اليسار إلى اليمين وبميل كبير من ناحية القدمين إلى ناحية الرأس ويشير قرار الاتهام إلى أن هذه الرصاصة أطلقها حسين عباس أو عطا طایل من فوق العربة التى كانا يركبانها وهذا مستحيل للأسباب التالية..

يشرح على الرسم وهو يقول موضعاً حيث الرسم يوضح كل شئء العربة ومن فوقها والمنصة ومن فوقها..

ويمكن استخدام المساعد أيضاً لتمثل ما حدث بالضبط..

**المحامى:** ارتفاع ظهر الكابينة الخلفية للعربة يبلغ ١٦٧ سم وارتفاع كتف الشخص العادى الذى يطلق منه النار من البندقية الآلية حوالى ١٣٠ سم عند الكتف وبذلك يكون ارتفاع البندقية من الأرض حتى موضعها على كتف الضارب حوالى ٣٠٠ سم تقريباً يعنى ثلاثة متر.. تعالوا بقى نشوف الرئيس..

---

- المحامى يشير إلى الرسم التوضيحي على اللوحة..

**المحامى:** المقصورة التى كان يقف عليها الرئيس تقع على رصيف ارتفاعه عن أرض الشارع ٢٠ سم وارتفاع السور من جهة الشارع ١٥٠ سم وطول الشخص العادى وهو تقريباً طول الرئيس من «١٦٥ - ١٧٠ سم» إذا فالشخص الواقف على المنصة يرتفع رأسه عن الأرض بحوالى ٢٥٠ إلى ٢٥٥ سم وهذا ما يقوله تقرير المعاينة المقدم من النيابة.. وبناء على هذا التصور فإن الرصاص المنطلقة من بندقية عطا أو حسين اللى واقفين فوق العربية حاتبقى ساقطة من أعلى إلى أسفل من ناحية الرأس إلى ناحية القدمين..  
فهل كانت كذلك..

يقرأ فى التقرير الذى فى يده وهو يتوجه إلى القضاء..

**المحامى:** يقول تقرير الطب الشرعى المؤرخ فى ١٩/١٢/١٩٨١ عكس ذلك تماماً..

- - -

## ١١٧ - خارج المحكمة

لقطة عامة لمبنى المحكمة من الخارج ويأتى عليها صوت رئيس النيابة صوت رئيس النيابة: لقد صال الدفاع وجال ألقى الكلام على عواهنه كيفما اتفق.

- - -

## ١١٨- داخل قاعة المحكمة

لقطة كبيرة لوجه رئيس النيابة وهو يكمل كلامه..

**رئيس النيابة:** فى محاولة يائسة منه لإيجاد مخرج للمتهمين تبريراً لفعلتهم الشنعاء.. وقد نسى. أو تناسى أن جريمة اغتيال الرئيس الراحل جريمة مشهودة.. حدثت وقائعها على مرأى ومسمع من العالم كله.. ونقلت تفاصيل مشاهدتها كاميرات التليفزيون على اتساع المعمورة ونقلتها إلى كل بيت وإلى كل مكان.. وقد أُلقي القبض على المتهمين فى مكان ارتكاب لجريمة وفى أيديهم سلاح الجريمة.. ليس هذا فقط.. بل اعترفوا تفصيلاً بارتكابهم للجريمة وتفاخروا بما أقدموا عليه..

## ١١٩- خارج المحكمة..

لقطة عامة للمحكمة نسمع عليها صوت المعلق..

**صوت المعلق:** تحولت قاعة المحكمة إلى ميدان للصراع بين الدفاع الذى بذل أقصى ما يستطيع لتخفيف الحكم على موكله وبين النيابة التى حاولت ما وسعتها المحاولة تطبيق أقصى العقوبة.. لقد كانت بحق محاكمة عصر بكامله.. بكل ما فيه.. وكان لابد أن تصل المباراة إلى نهاية لها..

— — —



## ١٢٠- داخل قاعة المحكمة..

لقطة كبيرة لوجه محامى خالد وهو يتحدث فى تؤدة وببطء وبلهجة مهيبة..

**محامى خالد:** إن الفصل فى هذه الدعوة يرتبط بمصير الأمة.. وإننا الآن نقف فى مفترق طرق.. إن أمامكم قضاة مصر رسالة تؤدونها وهى رسالة مقدسة.. فالتاريخ لا يرحم ولا يعرف المجاملة «أما الزيد فيذهب جفاء وأما ما ينفع الناس فيمكث فى الأرض» صدق الله العظيم والفرصة أمامكم لترسخوا مبدأ سار عليه آباءكم قضاة مصر العظام فى قضية الخازندار وفى غيرها من القضايا.. أولئك الأجداد الذين لم يخافوا فى الحق لومة لائم..

إن سبعين قرناً من الزمان تقف شاهدة على: بما يجرى فى هذه القاعة.. إننا لا ندافع عن القتل مهما كان مرتكبه ولكننا لا نفصله عن دوافعه التى كانت فى قضيتنا هذه دوافع نرى أنها حقيقية فقد حوّل الرئيس الراحل البلاد فى آخر أيامه إلى وطن لا يُحتمل.. هو فيه الحاكم الفرد المتسلط المتصرف الوحيد فى كل شئ ولا راد لكلمته..

ونظرة سريعة إلى ما حدث يوم ٢ سبتمبر من إلقاء القبض على كل قيادات الأمة السياسية والدينية وتغيبها فى غياهب سجونته دون ذنب جنوه سوى إنهم اختلفوا معه فى رأى.. لتبين لكم المدى الذى وصل

إليه من شطط..

سادتى قضاة مصر الأجلاء.. طالما كان السجن وقمع  
الحريات والقهر هى وسائل السلطة لفرض إرادتها  
على البشر فلن نسمع سوى صوت الرصاص..  
فأسكتوا صوت الرصاص بالعدل والحق..  
والديمقراطية..

- - -

## ١٢١ - أمام المحكمة

لقطة عامة للمحكمة من الخارج.. حالة من الصمت والثبات وينزل  
بعد لحظة تاريخ جانبى ١٩٨٢/٣/٦ ثم نسمع صوت رئيس المحكمة يتلو  
الأحكام بينما تتراجع الكامير إلى الخلف بعيداً بعيداً حتى لقطة عامة  
شديدة الاتساع لمدينة القاهرة التى تشغى بالحركة والحياة ويخفت صوت  
رئيس المحكمة تدريجياً.. ليعلو صوت المعلق على لقطات تسجيلية لجنابة  
الرئيس السادات..

ص. المعلق: كانت القاهرة يوم جنازة الرئيس السادات هادئة هدوءاً  
يدعو للتساؤل ويدفع للتأمل.. فهى المرة الأولى فى تاريخ مصر كله يقوم  
إنسان مصرى بقتل حاكمه.. وهو - بحكم طبيعته - لايفعل ذلك إلا إذا وقع  
تحت ضغطٍ يفوق قدرته الهائلة على الاحتمال..


يذهب الحكام.. ويذهب الزعماء.. وتبقى مصر.. مخزناً هائلاً  
للحكمة.. و.. الصبر..

و.. الحضارة..


- نهاية -



صورة نادره لخالد  
في محبسه قبل إعدامه بساعات







- نهاية -

بسم الله الرحمن الرحيم

استاذنا الحاج ساهه الشريف  
المسلم عليكم وجهه الله وبركاته

فاني اهد اليكم هذه  
سيرة تاجر ديني اهد وجهه اجيبه  
استاذنا البعل لند استعدت من اجل  
سرد ابي محمود بن رباحة لدراسة  
واذلت الغار المدة ونسب اهد  
ونسب الدنيا جهاد

استاذنا البعل لند استعدت من اجل  
سيرة تاجر ديني اهد وجهه اجيبه  
استاذنا البعل لند استعدت من اجل  
سرد ابي محمود بن رباحة لدراسة  
واذلت الغار المدة ونسب اهد  
ونسب الدنيا جهاد

مهاد السيوف

الاول اهد ابي...  
الاول من تاجر ساهه...  
الكلم بادو...  
على اياها...  
كما حدث...  
قد ان...  
شرايا...  
فهم القناع...  
بسم الله...  
والجمل...  
ما...  
لند...  
بعل...  
من...  
فصل...  
لند...  
بسم...  
لند...  
بسم...

مهاد السيوف

صورة وصية خالد بخط يده


السادات يتصدر أغلفة المجلات الأمريكية والعالمية





# TIME

## MIDEAST TURMOIL







## المراجع

- ١ - خريف الغضب - تأليف الأستاذ محمد حسنين هيكل - شركة المطبوعات للتوزيع والنشر.
- ٢ - أيام السادات الأخيره - عادل حمودة - سفنكس للطباعة والنشر.
- ٣ - اغتيال رئيس - عادل حمودة - سفنكس للطباعة والنشر.
- ٤ - قنابل ومصاحف - عادل حمودة - سيناء للنشر.
- ٥ - التحليل النفسى للسادات - سمير عبده - دار الكتاب العربى.
- ٦ - من قتل السادات - حسنى أبو اليزيد - الدار المصرية للنشر والتوزيع.
- ٧ - أسرار محاكمة قتلة السادات - حسنى أبو ليزيد - الدار المصرية للنشر والتوزيع.
- ٨ - لغز السادات - رشاد كامل - الناشر محمود الجراوى.
- ٩ - المبادرة والمنصة - رشاد كامل - سوزانا للنشر.
- ١٠ - كنت قاضياً لحادث المنصة - دكتور سمير فاضل - سفنكس للطباعة والنشر.
- ١١ - محاكمة فرعون - رشوان خالد - سيناء للنشر.
- ١٢ - النبى والفرعون - جيلز كييل - ترجمة أحمد حضر - مكتبة مدبولى.
- ١٣ - المنصة - علوى حافظ.

## فهرس المحتويات

٢٨ - محطة مصر .....	٣٩	٢٩ - ميدان رمسيس - القاهرة .....	٤٠	٣٠ - مادة تسجيلية - ميت أبو الكوم .....	٤١	٣١ - شوارع القاهرة .....	٤٢	٣٢ - مبنى التلفزيون المصرى .....	٤٢	٣٣ - داخل مبنى التلفزيون - مادة تسجيلية .....	٤٢	٣٤ - فوتومونتاج .....	٤٣	٣٥ - داخل مبنى التلفزيون .....	٤٣	٣٦ - قاعة المحكمة .....	٤٤	٣٧ - الوحدة العسكرية .....	٤٥	٣٨ - قاعة المحكمة .....	٤٦	٣٩ - الوحدة العسكرية - نهار خارجى ...	٥١	٤٠ - منطقة المنصة .....	٥٢	٤١ - مشهد متخيل .. كابوس .....	٥٢	٤٢ - شارع رمسيس - القاهرة - محل عبدالحميد لبيع الكتب قرب مسجد للأخوة .....	٥٣	٤٣ - مسجد من مساجد الأخوة .....	٥٥	٤٤ - خارج المسجد .....	٥٦	٤٥ - مسجد صغير - فلاش باك - نهار .....	٥٧	مقدمة الناشر .....	٣	مقدمة المؤلف .....	٥	المنصة .....	٩	١ : ١١ - قبل العناوين من .....	٩	١٢ - بعد العناوين .....	١٥	١٣ - طُرق سريعة فى الليل .....	١٦	١٤ - داخل إحدى عربات نقل المساجين .....	١٦	١٥ - طُرق سريعة فى الليل .....	١٦	١٦ - داخل المحكمة .....	١٧	١٧ - مبنى مجلس الشعب .....	١٩	١٨ - داخل مجلس الشعب .....	٢٠	١٩ - وحدة عسكرية .....	٢٠	٢٠ - داخل ميس الضباط بالوحدة العسكرية .....	٢١	٢١ - مكتب القائد بالوحدة العسكرية .....	٢١	٢٢ - منزل خالد الإسلامبولى .....	٢٢	٢٣ - سلالم منزل أنيسة أخت خالد ..	٢٣	٢٤ - شقة أنيسة أخت خالد .....	٢٣	٢٥ - شقة عبدالحميد .....	٢٥	٢٦ - مادة تسجيلية .....	٢٦	٢٧ - داخل المحكمة .....	٢٨
---------------------	----	----------------------------------	----	---	----	--------------------------	----	----------------------------------	----	---	----	-----------------------	----	--------------------------------	----	-------------------------	----	----------------------------	----	-------------------------	----	---------------------------------------	----	-------------------------	----	--------------------------------	----	--	----	---------------------------------	----	------------------------	----	--	----	--------------------	---	--------------------	---	--------------	---	--------------------------------	---	-------------------------	----	--------------------------------	----	---	----	--------------------------------	----	-------------------------	----	----------------------------	----	----------------------------	----	------------------------	----	---	----	---	----	----------------------------------	----	-----------------------------------	----	-------------------------------	----	--------------------------	----	-------------------------	----	-------------------------	----

- ٤٦ - شوارع - بولاق الدكرور - نهار ..... ٥٨
- ٤٧ - قاعة المحكمة - نهار ..... ٥٩
- ٤٨ - شقة فرج ..... ٦١
- ٤٩ - قاعة المحكمة ..... ٦٤
- ٥٠ - مقهى بشبرا ..... ٦٦
- ٥١ - شقة عبدالحميد ..... ٦٩
- ٥٢ - حجرة داخلية بشقة عبدالحميد ..... ٧٢
- ٥٣ - مقهى أو شارع ..... ٧٣
- ٥٤ - قاعة المحكمة ..... ٧٤
- ٥٥ - خارج قاعة المحكمة ..... ٧٦
- ٥٦ - داخل قاعة المحكمة ..... ٧٦
- ٥٧ - شقة عبدالحميد ..... ٧٨
- ٥٨ - مسجد صغير «من مساجد الإخوة» ..... ٧٩
- ٥٩ - قاعة المحكمة ..... ٨١
- ٦٠ - ساحة جامعة القاهرة - شباك ..... ٨٢
- ٦١ - قاعة المحكمة - عودة من الفلاش باك ..... ٨٣
- ٦٢ - مسجد صغير - فلاش باك ..... ٨٤
- ٦٣ - قاعة المحكمة - عودة من الفلاش باك ..... ٨٥
- ٦٤ - شقة فرج ..... ٨٦
- ٦٥ - قاعة المحكمة ..... ٩٠
- ٦٦ - أحد ميادين العاصمة المزدهمة .. ٩٢
- ٦٧ - قاعة المحكمة ..... ٩٣
- ٦٨ - إحدى المدن الصغيرة فى محافظة البحيرة ..... ٩٥
- ٦٩ - داخل محل الذهب الأول ... ٩٥
- ٧٠ - محل الذهب الثانى بالمدينة الصغيرة بمحافظة البحيرة ..... ٩٥
- ٧١ - قاعة المحكمة ..... ٩٦
- ٧٢ - إحدى العمارات الصغيرة ... ٩٧
- ٧٣ - داخل محل مجوهرات ..... ٩٨
- ٧٤ - الشارع فى المدينة الصغيرة - غروب خارجى ..... ٩٨
- ٧٥ - داخل محل المجوهرات ..... ٩٩
- ٧٦ - قاعة المحكمة ..... ١٠٠
- ٧٧ - شقة متوسطة المستوى «شقة ممدوح أبو جبل» ..... ١٠٢
- ٧٨ - مكان عام - فلاش باك ... ١٠٤
- ٧٩ - شقة ممدوح أبو جبل - عودة من الفلاش باك ..... ١٠٥
- ٨٠ - قاعة المحكمة ..... ١٠٦
- ٨١ - مادة تسجيلية ..... ١١٤
- ٨٢ - أمام المنصة ..... ١١٤
- ٨٣ - مادة تسجيلية ..... ١١٥
- ٨٤ - القاهرة.. مصر الجديدة ..... ١١٥
- ٨٥ - داخل الأتوبيس ..... ١١٦
- ٨٦ - مادة تسجيلية ..... ١١٧

- ٨٧ - ميدان العباسية ..... ١١٧
- ٨٨ - شقة عبدالحميد ..... ١١٨
- ٨٩ - شقة عبدالسلام فرج «عيادة أسنان بها مكان لنوم فرج ..... ١٢٢
- ٩٠ - شوارع مصر الجديدة - معسكر التجمع ..... ١٢٣
- ٩١ - قاعة المحكمة ..... ١٢٥
- ٩٢ - معسكر التجمع بمدينة نصر ..... ١٢٦
- ٩٣ - داخل معسكر التجمع بمدينة نصر ..... ١٢٦
- ٩٤ - المعسكر في الصباح التالي .... ١٢٩
- ٩٥ - معسكر التجمع ..... ١٣٣
- ٩٧ - شقة عبيد الزمر... نبل داخلى ..... ١٣٧
- ٩٧ - معسكر التجمع بمدينة نصر ... ١٣٩
- ٩٨ - مادة تسجيلية ..... ١٤١
- ٩٩ - معسكر التجمع ..... ١٤١
- ١٠٠ - مادة تسجيلية ..... ١٤٣
- ١٠١ - أرض الطابور ..... ١٤٣
- ١٠٢ - قاعة المحكمة ..... ١٤٥
- ١٠٣ - معسكر التجمع ..... ١٤٥
- ١٠٤ - قاعة المحكمة ..... ١٤٦
- ١٠٥ - أرض الطابور ..... ١٤٦
- ١٠٦ - أرض الطابور مكان آخر ..... ١٤٦
- ١٠٧ - أرض الطابور ..... ١٤٧
- ١٠٨ - قاعة المحكمة ..... ١٤٩
- ١٠٩ - أرض الطابور ..... ١٥٠
- ١١٠ - قاعة المحكمة ..... ١٥٠
- ١١١ - أرض الطابور.. فلاش باك ..... ١٥٧
- ١١٢ - قاعة المحكمة.. عودة من الفلاش باك ..... ١٥٧
- ١١٣ - قاعة المحكمة ..... ١٦٥
- ١١٤ - قاعة المحكمة ..... ١٦٩
- ١١٥ - خارج المحكمة ..... ١٧١
- ١١٦ - داخل المحكمة ..... ١٧٢
- ١١٧ - خارج المحكمة ..... ١٧٥
- ١١٨ - داخل قاعة المحكمة ..... ١٧٦
- ١١٩ - داخل قاعة المحكمة ..... ١٧٧
- ١٢٠ - داخل قاعة المحكمة ..... ١٧٧
- ١٢١ - أمام المحكمة ..... ١٧٨
- المراجع ..... ١٨٨
- مفهرس ..... ١٨٨

